

Le texte proposé ici a été établi à partir de l'édition parue à Paris, 'chez Colnet, libraire, quai Malaquais, n°9', en 1826.

LIBER PRIMUS.

C_1 v.1 Qui mare, qui terras, qui caelum numine comples,
 2 spiritus alme, tuo liceat mihi munere regem
 3 bis genitum canere, e superi qui sede parentis
 4 virginis intactae gravidam descendit in alvum,
 5 mortalesque auras hausit puer, ut genus ultus
 6 humanum eriperet tenebris et carcere iniquo
 7 morte sua manesque pios inferret Olympo.
 8 Illum sponte hominum morientem ob crimina tellus
 9 aegra tulit puduitque poli de vertice solem
 10 aspicere et tenebris insuetis terruit orbem.
 11 Fas mihi te duce mortali immortalia digno
 12 ore loqui interdumque oculos attollere caelo
 13 et lucem accipere aetheream summique parentis
 14 consilia atque necis tam dirae evolvere causas.
 15 Jam prope mortis erant metae finisque laborum
 16 Christo aderat, Solymumque ideo haud ignarus ad urbem
 17 Phoenicum extremis remeans de finibus ibat.
 18 Illum ingens comitum numerus juvenesque senesque
 19 sponte sequebantur, rerum quos fama trahebat
 20 undique collectos. Nam magnas sive per urbes
 21 ferret iter seu desertis in montibus iret,
 22 olli se innumeri jungebant, usque parati
 23 jussa sequi, vellet quascumque abducere in oras,
 24 atque novos erat hic semper fas cernere coetus,
 25 pinifero veluti Vesuli de vertice primum
 26 ih Padus exiguo sulcans sata pingua rivo ;
 27 hinc magis atque magis labendo viribus auctus
 28 surgit latifluoque sonans se gurgite pandit
 29 victor ; opes amnes varii auxiliaribus undis
 30 hinc addunt, atque inde, suo nec se capit alveo,
 31 turbidus haud uno dum rumpat in aequora cornu.
 32 Tum vero numero socios sejunxit ab omni
 33 bis senos, sibi quos olim delegit, ut essent

34 tantorum memores operum testesque laborum.
 35 Atque, ubi secretos nemora in seclusa vocavit,
 36 procerae innitens cedro, maestissimus ore
 37 eque imo rumpens suspiria pectore fatur :
 38 "Ventum ad supremum, socii ; data tempora vitae
 39 exegi in terris. Lux nunc infanda propinquat
 40 meque pii manes exspectant. Illius ergo
 41 en ultro infensam Solymorum ascendimus urbem.
 42 Illic informis leti mihi dira parantur
 43 supplicia ; immeritum me nunc conjurat in unum
 44 saeva sacerdotum manus, ut non inscius ipse
 45 praedixi toties ac vobis cuncta retexi.
 46 Ibo, morte mea veterum scelus omne piabo.
 47 His me prime malis oneras pater : ipse tulisti
 48 dulcia poma ; mihi sed nunc tua furta luendum.
 49 Cum tamen expulerit tenebras lux tertia rebus,
 50 aereas caede abluta revocabor in auras.
 51 Vos etiam, quos non pertaesum denique nostri,
 52 funera acerba manent. Audete, et lucis amori
 53 istius aeternum vitae immortalis honorem
 54 mecum omnes praeferte : domus non haec data, non hae
 55 sunt vobis propriae sedes : vos aetheris alti
 56 lucida templa vocant, stellis florentia regna,
 57 pax ubi segura ac requies optata laborum.
 58 Hic domus, hic patria : huc omnes contendite laeti
 59 angustum per iter ; vestras hic figite sedes."
 60 Dixerat. At socii defixi lumina maestis
 61 haerebant animis ac tristia multa putabant.
 62 Tum senior Petrus haud linguae vocive pepercit,
 63 et tali divum affatus sermone precatur :
 64 "Nate deo, quae tanta Deum te denique caeli
 65 vis agit, ut libeat letum crudele pacisci
 66 pro quoquam aut certis ultro te offerre periclis ?
 67 Quin age, te incolumi potius (potes omnia quando,
 68 nec tibi nequicquam pater est qui sidera torquet)
 69 perficias quodcumque tibi nunc instat agendum,
 70 non adeo exosus lucem ingratusque salutis.
 71 Hos animos, hanc confestim precor exue mentem,
 72 ipse tui miserere, tuum miserere, nec ultro
 73 projice nos, qui te, tendis quocumque, sequemur."
 74 sic ille ; increpuit dictis quem talibus heros :
 75 "Non pudet, o numquam sapiens, mortalia semper
 76 volvere, nube oculos pressum, caelestium inanem ?
 77 Nec potis es vanis umquam desuescere curis ?
 78 Haecne tibi consulta mei suasere labores ?
 79 Non hoc consiliis, non hoc auctoribus istis
 80 tempus eget ; genitor jussis haud mollibus urget.
 81 At vos o, rebus spretis mortalibus, omnes
 82 ferte viri et duros animo tolerate labores,
 83 oblitique hominem, caelo altas tollite mentes,
 84 et cum mortales linguas in jurgia solvent
 85 vos contra, falsis onerantes nomina vestra
 86 criminibus, gaudete ac firmo pectore ferte
 87 indignamque ignominiam contemnite laeti.
 88 Hinc fortunatos vos dicite ; praemia quando
 89 certa manent oriturque ingens hinc gloria vestra
 90 criminibus, gaudete, ac firmo pectore ferte,
 91 indignamque ignominiam contemnite laeti.

92 Hinc fortunatos vos dicite ; praemia quando
 93 certa manent, oriturque ingens hinc gloria vestra."
 94 Haec fatus, montes aditum fert tristis in altos.
 95 Incedunt una socii cum rege parati
 96 cuncta pati et juvenis sortem indignantur iniquam.
 97 Et jam palmosae subit Hierichuntis ad urbem.
 98 Zacchaei excipitur tecto mensisque paratis,
 99 cui quondam componere opes per fasque nefasque
 100 immensas amor acer erat ; sed luce recepta
 101 hospitis adventu coepit male parta luendo
 102 reddere cuique suum, partiri cetera egenis,
 103 tot facti infectique auri congesta talenta.
 104 Hic subito non laeta ferens, gravis impulit aures
 105 nuntius atque animum rumore momordit amaro.
 106 Lazarus haud procul hinc Bethanes regna tenebat,
 107 dives opum, clarus genus alto a sanguine regum.
 108 Nam pater ingentes Syriae frenaverat oras
 109 vique sibi captas quondam subjecerat urbes.
 110 Nemo illo hospitibus facilis magis ; omnibus illa
 111 noctes atque dies domus ultro oblata patebat.
 112 Huc etiam persaepe ipsum succedere Christum
 113 haud piguit creberque domus indulsit amicae
 114 hospitio atque Deum posita se nube retexit.
 115 Hunc igitur postquam morientem accepit et acri
 116 vix, morbo correptum, auras haurire supremas,
 117 et quasi jam leti portas luctarier ante,
 118 demisit lacrimas sociisque haec edidit ore :
 119 "Cedamus. Leto actutum revocandus amicus
 120 in lucem, modo me summus pater audiat ipse
 121 atque suas velit hic, ut saepe, ostendere vires."
 122 Haec ait, et gressum Bethanae tendit ad urbem.
 123 Prosequitur comitum manus ingens atque videndi
 124 innumeri studio socios se protinus addunt.
 125 Interea longe mundi regnator opaci,
 126 infelix monstrum, penitus non inscius, illam
 127 jam prope adesse diem, superi, qua maximus ultor,
 128 imperio Patris, infernis succederet oris
 129 manibus auxilio ac sedes vastaret opertas.
 130 Sollicitus partes animum versabat in omnes,
 131 si qua forte potis regno hanc avertere cladem
 132 molirique Deo letum meditatur ; ea una
 133 denique cura animo sedet, haec saepe una resurgit.
 134 Demens, qui id propter tantum non viderat ipsum
 135 demissum caelo juvenem, quo sponte piaret,
 136 morte obita, veterum culpam et scelus omne parentum.
 137 Protinus acciri diros ad regia fratres
 138 limina, concilium horrendum, et genus omne suorum
 139 imperat. Ecce igitur dedit ingens buccina signum,
 140 quo subito intonuit caecis domus alta cavernis
 141 undique opaca, ingens ; antra intonuere profunda
 142 atque procul gravido tremefacta est corpore tellus.
 143 Continuo ruit ad portas gens omnis, et adsunt
 144 lucifugi coetus, varia atque bicorpora monstra,
 145 pube tenus hominum facies, verum hispida in anguem
 146 desinit ingenti sinuata volumine cauda.
 147 Gorgonas hi Sphingasque obsceno corpore reddunt,
 148 Centaurosque Hydrasque illi, ignivomasque Chimaeras ;
 149 centum alii Scyllas ac foedificas Harpyias,

150 et quae multa homines simulacra horrentia fingunt.
 151 At centumgeminus flammanti vertice supra est
 152 arbiter ipse Erebi centenaque brachia jactat
 153 centimanus totidemque eructat faucibus aestus.
 154 Omnes luctificum fumumque, atrosque procaci
 155 ore oculisque ignes et vastis naribus efflant.
 156 Omnibus intorti pendent pro crinibus angues
 157 nexantes nodis sese ac per colla plicantes.
 158 In manibus rutilaeque faces uncique tridentes,
 159 quis sontes animas subigunt atque ignibus urgent.
 160 Nec minus illi etiam diversis partibus orbis
 161 conveniunt properi, qui terris omnibus errant
 162 hortantes scelera ac variis mortalia ludunt
 163 pectora imaginibus rectique oblivia suadent.
 164 Nec non ventorum tempestatumque potentes,
 165 nubivagum genus, haud certa regione locati,
 166 nimborum in media consueti nocte vagari.
 167 Ergo animis prompti atque opibus coiere parati
 168 una omnes ; fremitu vario sonat intus opaca
 169 regia ; rex donec nigram igne tricuspide dextram
 170 armatus coetu in medio sic farier orsus :
 171 "Tartarei proceres, caelo gens orta sereno,
 172 (quos olim huc superi mecum inclementia regis
 173 aethere dejectos flagranti fulmine adegit,
 174 dum regno cavet ac sceptris multa invidus ille
 175 permetuit refugitque parem) quae proelia toto
 176 egerimus caelo, quibus olim denique utrimque
 177 sit certatum odiis, notum et meminisse necesse est.
 178 Ille astris potitur, parte et plus occupat aequa
 179 aetheris ac poenas inimica e gente recepit
 180 crudeles. Pro sideribus, pro luce serena
 181 nobis senta situ loca, sole carentia tecta
 182 reddidit ac tenebris jussit torquere sub imis
 183 immites animas hominum, illaetabile regnum.
 184 Haud superae aspirare poli datur amplius aulae ;
 185 ingens ingenti claudit nos objice tellus ;
 186 in partemque homini nostri data regia caeli est.
 187 Nec satis : arma iterum molitur et altera nobis
 188 bella ciet, regnisque etiam nos pellit ab imis.
 189 Id propter juvenem aetherea demisit ab arce,
 190 seu natum, sive alitibus de fratribus unum.
 191 Jamque aderit fretusque armis caelestibus ille
 192 sedibus exitium vehet his et regna recludet
 193 infera concessasque animas nostro eximet orbe.
 194 Fors quoque nos, nisi non segnes occurrimus, ipsos
 195 arta in vincla dabit vincetosque inducet Olympo
 196 victor ovans ; superi illudent toto aethere captis.
 197 Iste autem, quanvis mortalia membra caducus
 198 induerit, tamen est nostris imperditus armis.
 199 Nempe ego saepe adii coramque interritus urgens
 200 tentavi insidiis nequicquam. (Non ea me res
 201 falsum habuit, neque enim nunc primum talia cerno.)
 202 Quas non in facies, quae non mutatus in ora
 203 accessi incassum ? Semper me reppulit ipse,
 204 non armis ullis fretus, non viribus usus,
 205 sed tantum veterum repetito carmine vatam
 206 irrita temptamenta, dolos et vim exiit omnem.
 207 Ergo quae mihi nunc surgit sententia pandam.

208 Ille iter antiquas Solymorum instaurat ad arces,
 209 sit licet invisus magnae primoribus urbis ;
 210 quippe sacerdotes odiis ingentibus illi
 211 infensi insidias, ut cuique est copia, tendunt,
 212 solliciti veterum pro relligione parentum,
 213 ut ferro incautum superent et funere mulctent :
 214 quandoquidem ille novos ritus, nova sacra per urbes
 215 instituit priscasque audet rescindere leges.
 216 Hic opibus vestris opus : en nunc confieri rem
 217 tempus adest ! In eum cuncti majoribus illos
 218 inflammate odiis et vera et prava canentes
 219 pestiferumque animis furtim inspire venenum,
 220 ne victi oblitique iras corda aspera ponant ;
 221 sed saevi magis atque magis stimulisque subacti
 222 acribus absistant numquam, nisi caede peracta.
 223 Si vero, si quis sociis ex ipsius unum
 224 bis senis capere atque dolis pervertere possit,
 225 res confecta, metus penitus sublatus et omnis.
 226 Praecipitate moras ; fluxis succurrite rebus.
 227 Nunc tectis opus insidiis, nunc viribus usus."
 228 Vix ea fatus, ubique ruentes jussa facessunt
 229 auctores scelerum portisque ex omnibus alte
 230 diversi rumpunt : tremunt abdita murmure tellus.
 231 Incubere auris, crinitas anguibus alas
 232 obscurum per inane movent terrasque capessunt.
 233 Non tam olim densa sublimes nube per auras
 234 florilegae glomerantur apes aestate serena
 235 nubifugo Borea et madidis cessantibus Austris,
 236 si quando exorta est inter discordia reges
 237 saevaque collatis invadunt proelia signis.
 238 Vae ! Quibus institerint terris, quibus orbis in oris
 239 dira cohors ! Quantas populis feret illa ruinas !
 240 Jamque emensus iter, multis comitantibus, heros
 241 vera dei soboles, Bethanes moenibus instat.
 242 Cernit ibi maestas crinem laniare sorores,
 243 munera fraterno tumulo suprema ferentes :
 244 expertem thalami Martham atque urbis avitae
 245 Magdali dictam de nomine Magdalenam.
 246 Progreditur bustumque petit. Maestissima Martha,
 247 hunc simul ac vidit, comites fratrisque sepulcrum
 248 deserit, ac multo venienti occurrit honore.
 249 Insequitur soror inde, oculos ambae imbre madentes,
 250 femineis ambae plangoribus indulgentes.
 251 "Ut te post cari germani funera tandem
 252 accipimus venientem ! Ut te saepe ille vocabat,
 253 magne hospes, gelidi perfusus frigore leti !
 254 Atque equidem, credo, tunc sors te si qua dedisset
 255 nobis, nunc etiam vitales duceret auras.
 256 Nunc quoque (nil quando clari tibi rector Olympi
 257 abnuat) haud penitus nobis spes omnis adempta est."
 258 Talibus orabant ; comites simul omnia luctu
 259 miscebant ; maestis resonabant cuncta querelis.
 260 Ast heros tristes dictis solatus amicis,
 261 spondet opem, superas redituum ad luminis auras
 262 actutum fratrem incolumem, quem faucibus haustum
 263 telluris quarto jam sol non viderat ortu.
 264 Diditur haec totam confestim fama per urbem,
 265 quae cunctis incredibilisque et mira videri.

266 Vicinis populi passim de montibus omnes
 267 concurrunt studio visendi, atque omnia complent.
 268 Ventum erat ad tumulum ; stat circumfusa juvenus ;
 269 ipse autem in medio duplices ad sidera palmas
 270 jamdudum tendens oculosque immobilis heros
 271 orabat, tacitusque parentem in vota vocabat.
 272 Orantem observant taciti, intentique tuentur
 273 quid jubeat, quae signa ferat, quo deinde cadat res.
 274 Bis toto color ore abiit ; bis pectore anhelio
 275 infremuit, nutuque caput concussit honestum.
 276 Ecce autem tumuit tremere ostia visa repente.
 277 Omnibus extemplo subita formidine sanguis
 278 dirigit, penitusque invasit pectora frigus,
 279 cum tandem Deus has effudit ad aethera voces :
 280 "Summe parens, quamvis precibus nil abnuis umquam
 281 ipse meis quaecumque petam, tamen hoc tibi grates
 282 munere semper agam. Tua quanta potentia vidit
 283 circumfusa manus, populi videre frequentes.
 284 Vos autem famuli, properate, recludite marmor,
 285 saxum ingens auferte viroque exolvite vittas."
 286 Nec mora praeceptis ; patuerunt claustra sepulcri.
 287 Concursu accedunt magno attonitique pavore
 288 inspectantque, videntque intus deforme cadaver,
 289 vixque sibi credunt nullo cogente moveri.
 290 Nec mora ; clamantis ter voce vocatus amici
 291 erigitur loquiturque, et caeli vescitur auris.
 292 Obstupuere omnes, nec sat : vidisse loquentem
 293 aut audisse semel, dum cuncta ex ordine narrat
 294 conventu in medio, quae funere passus in ipso est,
 295 quanto anima instantis vi leti exclusa dolore
 296 terrenosque diu eluctata reliquerit artus ;
 297 quas facies moriens, quam obscena aspexerit ora
 298 terrentum juxta furiarum irasque minasque,
 299 ut vix siderea volucres missi arce ministri
 300 auxilio possent avidas inhibere rapinis.
 301 His addit scelerum poenas ac laeta piorum
 302 praemia quaeve animas miseras subiisse necesse est
 303 arbitria aeternosque nigris fornacibus ignes.
 304 His actis, Deus orantis vicina Simonis
 305 tecta subit, quem tota olim lacerum ulcere membra
 306 eripuit morbo, atque in pristina reddidit ipse.
 307 Dum vero mensas grati dignatus amici
 308 accubat in medio procerum urbis ; protinus ecce
 309 ingreditur forma insignis cultuque puella,
 310 picta peregrinas tunicasque, sinusque crepanti
 311 argento saturos atque auro intertexto,
 312 cui caput implicitum gemmis. It flexile collo
 313 aurum ingens mixtis onerosa monilia baccis ;
 314 propexique nitent electro molle capilli,
 315 nexilibus quos in nodos collegerat hamis ;
 316 aureaque ex humero demissam fibula vestem
 317 Eois opibus gravidam et Gangetide gaza
 318 subnectit. Media micat ardens fronte pyropus,
 319 crebraque consertis pendent redimicula gemmis,
 320 qualis laeta sinus cum tellus veris honorem
 321 pandit opesque suas gremio explicat alma virenti.
 322 Haec olim amissis utrisque parentibus orba
 323 restitit, et proles in opes successit avitas

324 unica, quas pater immensas praedives habebat.
 325 Dumque aetas rudis, una illi super omnia cordi
 326 relligio fuit et servandi cura pudoris.
 327 Mox autem paulatim annis fervente juvena
 328 sensibus illapsa est Veneris malesuada cupido,
 329 quae mentem immutans furiis subjecit iniquis,
 330 ah miseram ! Abjecto non obstat cura pudoris.
 331 Non species, non fama movet. Cessit timor omnis
 332 relligioque oblita, domo jam nubilis exit ;
 333 jam convivia, jam spectacula laeta frequentat,
 334 vinclaque contemptis rectoribus omnia rumpit,
 335 ac veluti ratis Aegaeo sine remige in alto,
 336 sublatos simul ac fluctus inflaverit aura,
 337 nunc huc incerto, deinde illuc fluctuat aestu,
 338 quo ventique undaeque urgent spoliata magistro.
 339 Et jam freta opibus praedulces ambit amores
 340 florentum juvenum, si quis spectabilis ore
 341 egregio formaque alios supereminet omnes.
 342 Ergo laeta virum praestanti corpore postquam
 343 accepit venisse, Deum quem fama ferebat ;
 344 nullam passa moram studio correpta videndi
 345 venerat. Ast ubi conspicuos deperdita vultus
 346 hausit et egregiae divinum frontis honorem,
 347 divinosque oculos, ardentis pabula amoris,
 348 dirigit penitusque animo sententia versa est
 349 atque alias longe concepit pectore flammis.
 350 Ecce autem subito visae spirantis ab ore
 351 septem adeo circum offusa caligine, et atra
 352 nube exire faces, veluti cum torris obusti
 353 ultima sursum flamma fugit fumumque relinquit,
 354 "Haec, deus, haec, inquit, capitum foedissima septem
 355 correptam miserae mentem vexabat Erinnys."
 356 Tum Maria (hoc illi nomen) mutata, nec illa
 357 argento quae illusa sinus modo venerat aureos.
 358 Jam capiti crinale aurum colloque monile
 359 detrahit, et tunicas squalentes exuit auro.
 360 Jamque sui piget et curis mordetur honestis.
 361 Inde Deum orabat veniam genibusque volutans,
 362 ut canis ad mensam procumbere suetus herilem,
 363 lambebatque pedes nudos lacrimisque rigabat,
 364 veste fovens, alios tulerat quam nuper in usus.
 365 Tum de marmoreis varios deprompsit odores
 366 thesauris, casias et nardi mollis aristas,
 367 aut thuris lacrimam, atque auram fragrantis amomi,
 368 pronaque permulsit nudas liquido unguine plantas :
 369 suavis in aereas diffugit spiritus auras.
 370 Cuncta deus placida quae mente accepit, et illam
 371 dignatus venia monitis implevit amicis.
 372 Interea circumpositis ex urbibus aegrum
 373 cernere vulgus erat conventu accedere magno.
 374 Multi ibant oculis clausis, multi auribus orti
 375 indociles, fandi ignari, quique aegra trahebant
 376 membra, ferebantur ; quosve exagitabat Erinnys
 377 captos mente, sui immemores, Deus ipse juvabat
 378 auxilio validique omnes laetique redibant.
 379 Tandem hinc digrediens Solymorum tendit ad arces.
 380 Hanc fundasse Semes, soboles tua, dicitur urbem,
 381 vitisator pater, exactis simul imbribus ingens

382 cessavit vastis stagnare paludibus orbis,
 383 plurimaque immensi compressa licentia ponti.
 384 Tum venere suo bellis qui gente subacta
 385 urbem appellarunt de nomine Jebusaei.
 386 Protinus hinc reges, a prisco sanguis Iuda,
 387 finitimis late dominam coluere subactis.
 388 Hic templum Salomon per terras omnibus aris
 389 eversis, ope barbarica rex condidit olim,
 390 templum opulentum, ingens, eductam ad sidera molem.
 391 Huc mensas arasque sacras et aenea labra
 392 transtulit et veteris vestes ac munera templi,
 393 ostro perfusas vestes auroque rigentes ;
 394 tum lychnos lancesque cavasque invexit acerras,
 395 cymbiaque et tripodas fulvoque ex aere lebetas,
 396 inclusasque sacro leges ac foedera ligno,
 397 quae gemina in silice omnipotens Pater ipse notarat.
 398 Hic gentis rex atque omni cum gente sacerdos
 399 sacra ferens pecudum fundebat rite cruorem ;
 400 victima non alias maculabat sanguine sedes.
 401 Undique mos erat huc populos ter adire quotannis,
 402 et proprios genus Isacidum instaurabat honores :
 403 ipse etiam huc heros crebro se ferre solebat.
 404 Jamque viis plenis multis cum millibus ibat,
 405 unde urbis poterant turrets atque alta videri
 406 culmina. Laeti omnes ramos viridantis olivae
 407 quasque manu gestent, palmas a stirpe refringunt.
 408 Praecedit peditum late manus omnis ; it ingens
 409 pone equitum globus ; in medio pulcherrimus heros
 410 haud acri provectus equo, phalerisque superbo,
 411 eminet. At sibi pauperiem ut placuisse beatam
 412 admoneat socios, rex quadrupedantis aselli
 413 terga premit, vates quondam ut cecinere futurum.
 414 Nudus erat vertex ; humeris demissa fluebat
 415 ad talos vestis, quam festinaverat olim
 416 ipsa parens pueroque dedit gestare, nec illa est
 417 ullo attrita usu, nulla consumpta senecta.
 418 Taurea nudatis circumdat tegmina plantis.
 419 Talis iter tendit recipitque ad moenia gressum.
 420 Ante urbem pueri occurrunt mixtaeque puellae
 421 floribus ac variis ornatae tempora sertis.
 422 Omnibus in manibus palmae, omnes carmina laeti
 423 laeta canunt, tonsis et inumbrant ora coronis,
 424 certatimque Dei gaudent placida ora tueri.
 425 Tum demum portis urbem ingrediuntur apertis
 426 et propius regem servatoremque salutant,
 427 praetenduntque manu thyrsos oleasque coruscant
 428 frondentes. Superas ingens it clamor ad auras.
 429 Spargitur his rumor subito ac tota urbe vagatur.
 430 Consurgunt gentis primi. Procul ecce per auras
 431 pulveream cernunt tolli super aethera nubem ;
 432 ignari penitus rerum causasque requirunt
 433 tam subiti motus, quemnam tam multa sequantur
 434 millia ductorem, quis tantus clamor ovantum.
 435 Ast illi, quibus est divi haud incognita fama,
 436 occurrunt alacres regi plausumque sequentes
 437 ingeminant ; quaque ingreditur, passim ecce rubenti
 438 insternunt ostro sola barbaricisque tapetis,
 439 intenduntque vias sertis et floribus augent.

440 Vix ingressus erat, cum densam respicit ecce
 441 in bivio turbam clamoremque auribus haurit
 442 ingentem, et secum admirans vestigia pressit.
 443 Vallis erat circum frondosis undique saepta
 444 collibus ; in medio rivis atque imbribus humor
 445 collectus semper stabat laticesque perennes,
 446 quo solitae innuptae praedivitis urbis aquari,
 447 et potum pariter pecudes compellere prisci
 448 pastores lymphaque gregem curare salubri,
 449 unde lacum fama est Ovium dixisse minores.
 450 Huc concursus erat certis de more diebus
 451 turbaque adibat, inops, variis exercita morbis.
 452 Namque videbatur magno quandoque moveri
 453 cum sonitu, medio unda lacu et perculsa repente
 454 sublato ad caelum spumabant caerula fluctu.
 455 Sed vulgo subiti quae motus causa latebat.
 456 Impubes pueri tantum innuptaeque puellae
 457 signa prius manifesta dabant seseque canebant
 458 cernere pennatum puerum fulgere per auras
 459 undanti chlamyde atque auro radiantibus alis,
 460 delapsumque polo tranquilla impellere utraque
 461 stagna manu lateque viam signare cadentem.
 462 Qualis stella Pater superum quam misit Olympo
 463 aut nautis signum, aut populis in castra coactis,
 464 praecipitat flammis longe lateque coruscis
 465 scintillans : corda ignaris mortalibus horrent.
 466 Ergo exspectabant denso miseri agmine circum
 467 e caelo signum intenti laticesque quietos
 468 servabant oculis atque omnes auribus auras ;
 469 auditum ad signum subito ut se primus in undas
 470 quisque daret stagnoque sonanti immergeret artus.
 471 Quippe erat inde salus semper non pluribus, uni
 472 qui subito impulsus prior exsiliisset in aequor.
 473 Sicut ubi vacui tendunt medio aequore campi
 474 viribus et rapido, juvenes decernere cursu,
 475 arrexere animos cuncti signumque parati
 476 exspectant. Pulsat pavor intus pectora anhelus
 477 omnibus, atque locum spondet sibi quisque priorem
 478 hos inter longo detentus brachia morbo
 479 brachiaque et plantas, omnes et inutilis artus
 480 Jethrus erat, cui quondam et opes et avita fuere
 481 praedia opima, sed, ut juvenili e corpore morbum
 482 pelleret, heu ! nimium mendaci credidit arti ;
 483 dumque vias omnis medicaeque explorat opis vim,
 484 pauperiem morbo adjecit miserandus iniquam,
 485 ossibus ad vivum qui jam persederat imis.
 486 Jamque fere denu in luctu quater egerat annum
 487 innumeris circumventus morbisque fameque.
 488 Quem postquam aspexit propius stellantis Olympi
 489 rege satus, sic est ultro placido ore locutus :
 490 "Infelix, quae te segnis mora detinet unum
 491 servantem has frustra ripas et tristibus undam
 492 praesentem morbis, alii cum scilicet omnes
 493 protinus hinc abeant laeti oblitique laborum
 494 accipiant solitas reparato in corpore vires ?"
 495 Ille sub haec largoque genas simul imbre rigabat :
 496 "Non hoc crimen aquae, non vis mihi fontis iniqua est,
 497 verum ego dum motum opperior salientis aquai,

498 praecipites dant saltu alii se in stagna priores
499 ad sonitum ; invalidis nequeo ipse insistere plantis,
500 nec me tunc opis externae dignatur egentem
501 in stagno quisquam ante alios mersare salubri."
502 Talia narrantem placido deus ore tuetur
503 Atque ait : "Ipse tuis pedibus subsiste, valensque
504 carpe viam, nec cuncta undis debere necesse est."
505 Vix ea, cum subito cernentibus omnibus ecce
506 erigitur stratumque humeris, mirabile visu,
507 ipse suis referens pedes omnes passibus aequat,
508 atque suo solidae respondent robore vires.
509 Sicut ubi in silvis, dum ramos colligit, anguem
510 frigore sopitum pastor brumaeque rigentem
511 frondibus implicuitque admovitque inscius igni :
512 nulla mora est, propius flammam vix pertulit et jam
513 attollitque caput jamque ignea lumina torquet
514 perque domum serpens micat arduus ore trilingui.
515 Parte alia ante fores templi mediaque ministri
516 ingenti strepitu testudine dona sedentes
517 vendebant, quae plebs aeratae imponeret arae,
518 lanigeras pecudes taurosque paresque columbas,
519 voti ut quisque reus, rerumque ut copia cuique.
520 Quos simul atque heros ingressus vidit et omnem
521 discursu et clamore locum resonare profano,
522 haud tulit, et verbis graviter commotus acerbis
523 reppulit, intortum vibrans per terga flagellum,
524 verberaque insonuit sacroque a limine abegit.
525 Qualis ubi Arctois Boreas erupit ab antris,
526 aereos rapido perverrens turbine campos,
527 it caelo ferus et piceas toto aethere nubes
528 insequitur ; dant victa locum et cava nubila cedunt.
529 "Sacra deo domus haec, inquit, haec numinis aedes :
530 vos autem versam indignos scelerastis in usus.
531 Sanguine respersum est aras animaque litatum
532 hactenus antiquis concessio more sacrorum.
533 Indultum satis atque ovium jam caedis abunde est.
534 Nunc pater omnipotens pecudum volucrumque cruori
535 parcere vos posthac jubet ac fumantibus extis.
536 Vos diversa manent mutatis orgia sacris.
537 Discite justitiam tantum puraque litate
538 mente, Deumque piis precibus placate volentem.
539 Hi vestri ritus, ea deinde piacula sunt."
540 Sic ait, et supplex demisso poplite ad aram
541 cernuus arcana prece Patris numen adorat.
542 Jamque sacerdotum primis exarserat ingens
543 tristi in corde dolor, flammaeque iraeque coquebant.
544 Nec novus hic primum furor, haec odia aspera surgunt
545 antiquae irarum causae antiquique dolores
546 haudquaquam exciderant animis fixique manebant.
547 Non tamen hic ausi sunt illum surgere contra,
548 sed veriti ultricem plebem turbamque sequentum,
549 excessere adytis, nequicquam indigna minati.
550 Quales nocte lupi stabulis cum forte reclusis
551 appetiere gregem, verum custodia pernox
552 obstitit et canibus vocalibus inde revulsit ;
553 olli (dira fames stimulis agit intus) abacti
554 cedunt et montes nequicquam ululatibus implent.
555 Dum vero affatur Genitorem divus ad aram,

556 mirantes socii templum per singula lustrant,
557 suspectu molem vasto artificumque laborem,
558 cautibus excisas centum, centum aere columnas,
559 omnes e solido, omnes altis montibus aequas,
560 tignaue et aeterna ex cedro laquearia, aenoque
561 aeratas porro stridentes cardine portas,
562 sectilibusque minutatim sola levia saxis.
563 Tum puro ex auro postes mensasque metallo
564 e simili et fixos alta ad donaria currus
565 distinctos ebena et candenti elephanto.
566 Quae dum cuncta legunt, perfectis ordine votis
567 improvisus adest tacitusque supervenit heros,
568 atque ait : "Haec moles, adeo haec immania templa,
569 protinus ut vento radicitus eruta pinus,
570 versa repente dabunt labem ingentemque ruinam,
571 et tibi digna tuis, Solyma, instant praemia factis,
572 quae vates ad te missos divinitus ausa es
573 tot ferro petere aut duris detrudere saxis.
574 Ipse tuos quoties, praesens ut vera monerem,
575 tentavi cives incassum cogere in unum,
576 ceu cristata suos dispersa examina fetus
577 singultu volucris vocat et plaudentibus alis !
578 Ferro excisa cades ; jamjam labentia regna
579 protinus arma ruent tua, vindexque hauriet ignis,
580 et passim haec largo sudabit sanguine tellus.
581 Nonne vides jam ut nunc res procubet inclinata
582 et tibi jam votis non prosit nectere vota ?"
583 Longe alias Pater omnipotens sacra transtulit oras ;
584 longe alia vult ipse coli et placarier urbe.
585 Atque adeo hic alte depactus terminus esto."
586 Sic fatus, monstrat miras in marmore formas,
587 argumentum ingens, senium monumenta dierum
588 magna quibus magni compacta est machina mundi,
589 et veterum eventus, et prisca ex ordine avorum
590 facta, haud humanis opus enarrabile verbis.
591 Non illic hominum effigies simulacrave divum,
592 arcanis sed cuncta notis signisque notavit
593 obscuris manus artificis, non hactenus ulli
594 cognita, non potuere ipsi deprendere vates.
595 Hic superum sator informem speculatus acervum,
596 aeternam noctemque indigestumque profundum ;
597 prima videbatur moliri exordia rerum
598 ipse micans radiis ac multa luce coruscus.
599 Jamque videbatur fulva de nube creare
600 stelligeri convexa poli terrasque fretumque
601 et lucem simul undivagam, mox unde micantes
602 et solis radios et caeli accenderet ignes.
603 Ipsi jam denso crepitare examine circum
604 auctoremque ducemque suum plausuque sonare
605 aligeri fratres supera arce, volatile vulgus,
606 lucis opus primae. Necdum tamen aethera ab imis
607 flammiferum terris, terras discreverat undis ;
608 sed tantum confusa jacebant semina rerum.
609 Nec mora : vix caeli extuderat septemplex orbem,
610 ordine cui vario rutilos affigeret ignes,
611 et jam cuncta novam incipiebant sumere formam
612 paulatim caelumque sua compage teneri.
613 Cernere erat sicca in medio jam mole relictam

614 littoribus curvis circum maria humida fundi,
615 illisosque vadis spumare ad sidera fluctus.
616 Nondum pontivagae curvabant ampla carinae
617 carbasa, nec liquido lentari in marmore remi,
618 lata sed innocui verrebant aequora Cauri.
619 Ecce autem jam fagiferi capita ardua montes
620 attollunt, infraque jacent humiles convalles.
621 Continuo tellus summittens Saedala germen
622 flore renidescitque frondisque explicat arbos.
623 Jam videas viridi vestiri gramine campos,
624 jam colles densis frondere cacumina silvis
625 ilicibusque oleisque et coniferis cyparissis.
626 Nec mora : caeruleo flammis duo lumina caelo
627 incipiunt teneris primum lucescere rebus ;
628 et sibi ceu mundi vigiles statione vicissim
629 succedunt certoque suum dant foedere lumen.
630 Nam lucis fons dimensum sol ambit Olympum
631 ipse die terrasque novo splendore colorat.
632 Nocte suas vultu pallenti servat in umbris
633 Luna vices, fundens auratis cornibus ignem,
634 lucidaque exornant nocturnis aethera gemmis
635 sidera, perpetuo circumlabentia motu.
636 Tum bifidis passim verrebant marrnora caudis
637 squamigerum mutae pecudes pelagoque natabant,
638 at pictae volucres librare per aera pennis
639 corpora et inter se curvis decernere rostris.
640 Nec procul hinc errant latos armenta per agros,
641 lanigerique greges persultant pabula laeta.
642 Jam latebras videas meditari dira ferarum
643 semina, jam longos per humum reptare chelydros.
644 Desuper hortari clara de nube putares
645 caelicolum regem laetasque expromere voces :
646 "Crescite, propagate genus, mea semina, vestrum,
647 saeclaque perpetuis generatim jungite saeclis."
648 Tandem nudus homo emicuit tellure creatus,
649 quem superum sator affarique et dicere leges
650 ore videbatur coram ac praeponere regnis,
651 qui terras immortalis dicione teneret.
652 Mansisset dictis, servasset foedera pacta !
653 At campum arboribus juxta ac viridantibus herbis
654 lucentem aspicias, stellantia floribus arva,
655 poma ubi caeruleo multum vigilata dracone ;
656 in medio fons perspicuis argenteus undis,
657 quattuor adversis volvens regionibus amnes.
658 Qui terrae gremio infusi late arva rigarent,
659 Atque hic cernere erat malesuadi fraude draconis
660 deceptum juvenem vetitos ex arbore fetus
661 gustare, edicti immemorem legisque severae.
662 Et jam (vix pomum infelix admoverat ori)
663 paenituisse putes se frondibus involventem,
664 nec jam caelituum regis gravia ora ferentem.
665 Namque videbatur, fulvae inter vellera nubis,
666 horribili super impendens mortalibus ore
667 dura redarguere et saevas indicere poenas
668 pro meritis, quas ille olim, quas omnis ab illo
669 progenies lueret lucis ventura sub auras.
670 Interea conjux, quae, capta libidine dira,
671 jura prior legesque datas ac foedera solvit,

672 infelix fruticum frustra per densa latebat.
673 At victor, factusque potens jam fraudis, aena
674 effulget squama teretique volumine serpens,
675 ter superans stirpem, spirisque ingentibus ambit
676 tortilis, et motis insultat desuper alis,
677 virgineo irridens deceptos improbus ore.
678 Nec procul hinc ideo videas late infera circum
679 regna, subobscuras sedes lucemque malignam
680 solis, ubi casti manes animaeque piorum,
681 sedibus exclusae quondam debentis Olympi
682 unius ob scelus exspectabant ordine longo.
683 Stabant hic cani proceres vittataque vatum
684 agmina tendebantque manus ad sidera passas,
685 quos omnes humeris pater alte exstantibus Abras,
686 amplificam pandens chlamydem protentaque late
687 brachia subnixus dextra laevaue tegebat.
688 Orantes illos credas superumque parentem
689 supplicibus dictis affari, parceret irae,
690 parceret unius noxa omnes perdere gentes.
691 Substitit hic imo suspirans pectore Divus,
692 atque ait : "En nostrum deposcunt ista laborem.
693 In me nulla mora est ; ego tantae debitus irae
694 morte mea eripiam hos tenebris et claustra refringam.
695 Quin ea quae subito paucis deprensa sequuntur
696 sublegite, infandum mihi portendentia letum.
697 Omnibus hic pauci exstinctis mortalibus ibant
698 inclusi ligno summas impune per undas.
699 Ingens lativago fluitabat machina ponto
700 et vix exstabant immani corpore montes,
701 quos procul abruptus collisis nubibus ignis
702 ingeminans creber caelo rutilante petebat,
703 Hic natum senior nudo Isacon ense petebat,
704 infelix pater, exsequitur dum tristia jussa.
705 Aspiceres illum toto jam corpore niti
706 dextram attollentem ; nondum respexerat, et jam
707 nuntius ecce aderat caeli demissus ab arce,
708 jussa ferens primis contraria : victima juxta
709 pascebat pueri ignari pro caede parata
710 candidus et villis aries argenteus albis.
711 Hinc fratrem invisum narrata ob somnia fratres
712 vendebant, misero mentiti dira parenti
713 funera discerptumque feris ; pater ipse cruentam
714 versabat nati tunicam lacrimisque rigabat.
715 Hic etiam, Phariis dum cives ducit ab oris
716 post longa exilia in patriam promissaque regna
717 legifer, auxiliis fretus caelestibus heros,
718 orta lues populum errantem miseranda repente
719 serpentum afflatu leto dabat, atque jacebant
720 corpora tabifico passim morientia morsu.
721 Dux vero in medio campi suspendit aenum
722 ingenti e malo colubrum stratosque jubebat
723 dirigere huc aciem intentos lignumque tueri,
724 quae miseris erat haud dubiae via sola salutis.
725 "Parte alia rostro terebrans sibi viscera acuto
726 feta avis implumes pascebat vulnere natos.
727 Stant olli circum materno sanguine laeti
728 et pectus certatim omnes rimantur apertum."
729 His animadversis portis bipatientibus ibat

730 multa putans, necdum gradibus descenderat heros
731 omnibus, et magno jam longe urgente tumultu
732 ecce trahebatur passis per terga capillis
733 pallida longaevi conjux Susanna Manassei,
734 cui pater egregiam forma et florentibus annis
735 haud placitis taedis invitam aegramque jugarat.
736 Namque fidem ob thalami foedatam ad justa vocabant
737 supplicia ingenti juvenum sectante caterva.
738 Et jam saxa manu pueri vulgusque tenebant.
739 Ipse sed antevolans prohibebat tela sacerdos,
740 donec porticibus Christum conspexit in amplis,
741 ad quem, ubi concessit miseramque ad limina traxit,
742 ingressus versare dolos : "Haec prodidit, inquit,
743 conjugium thalamique fidem deprensa fefellit.
744 Sontem jura neci tali pro crimine dedi
745 nostra jubent duris (sed quae inclementia !) saxis.
746 Teque ideo, vatum interpretes mitissime, adimus,
747 et tua quaenam sit sententia quaerimus omnes."
748 Dixerat atque animo jam spes pascebat inanes,
749 his captum implicitumque putans sermonibus hostem,
750 praeclosos abitus, non effugia ulla relictas.
751 Illam quippe neci si solveret interceptam
752 miti animo miseratus, cum turba omnis in ipsum
753 saxaque et ultrices raptim converteret iras,
754 quod sanctas gentis leges everteret illex ;
755 si vero ad poenam jusset pro crimine duci,
756 sese odiis vulgi objiceret crudelis acerbis.
757 Haec agitans jam victorem se mente ferebat,
758 pectora laetitia multum tumefactus inani.
759 Ac veluti in somnis olim sibi visus arator,
760 dum terrae attrito suspendit vomere terga,
761 auri ingens pondus campo effodisse subacto,
762 gaudia vana fovet. Cernet somno ille relictus
763 pauperiem, duros et adhuc sibi adesse labores,
764 somnia fortunamque animo execratus inanem.
765 Ipse viam Deus invenit (fallacia numen
766 nulla humana valet contra) qua legibus illi
767 parceret illaesis. Nempe ut defixa tenebat
768 ora solo, tandem attollens turbamque paratam
769 aspectans, ait : "Haud dubium quin crimine letum
770 sit merita ; id prisca quondam sanxere parentes.
771 Ergo agite, o vestrum quicumque est criminis experts,
772 saxa manu primus rapiat feriatque merentem,
773 ecquis erit tanto e numero, qui vulnera prima
774 dirigat et sceleris purum se proferat ultro ?"
775 Sic memorans, omnes servabat lumine pronus
776 obliquo, horrendumque tuens illumque paratus
777 inscripsisse solo, cui mens interrita nullum
778 esset ob admissum foede securaque culpae.
779 Stabat conspectu in medio tremebunda puella,
780 jam suffusa oculos mortis nigrore propinqua,
781 et positis terram genibus submissa petebat,
782 non minus exanimata metu quam in retia cerva
783 acta canum latratu et longo exercita cursu,
784 cum jam consumptae vires, cum se undique cinctam
785 hoste videt mortemque instantem certa moratur.
786 His autem auditis responsis, omnibus ingens
787 confestim cecidit furor et vis fracta quievit.

788 Quisque suam tacito versant in pectore vitam,
789 inque vicem spectant sese atque adversa tuentur,
790 nec quisquam turba in tanta se prodidit ultro.
791 Saxa cadunt manibus furtim labentia et omnes
792 quisque sui memores abeunt templumque relinquunt.
793 Ut vero deus aspexit vacua atria circum,
794 linea detraxit pavitanti vincla puellae,
795 atque illam verbis monitam dimittit amicis :
796 "I melior, veterum famam jam exstingue malorum."
797 Talia dein socios fatur conversus ad ipsos :
798 "Heu durum genus ! Haud possunt desistere victi,
799 nil linquunt intentatum, nil prorsus inausum.
800 Nempe ego nunc festis fas contra et jura diebus
801 afferro opem invalidis aegrosque in pristina reddo ;
802 nunc sontes et sponte sua commissa fatentes
803 accipio noxaque animos et crimine solvo.
804 Nunc socii fruges tractant et vina, priusquam
805 dent manibus lymphas, cum victu corpora curant
806 nec dapibus parcunt et quae in nos plurima jactant.
807 Quin etiam me fraude petunt furta irrita adorti
808 vel cum Romanis astu me opponere tentant
809 incautum quaeruntque dolo, an fas pendere regi
810 per capita argentum, edicto quod quisque jubetur.
811 Nec caecos mea facta movent ingentia, quae non
812 humanis fierent opibus, non artibus ullis.
813 Nec qua vi haec agitem spoliati lumine cernunt,
814 consiliisque audent supremi obstare Parentis,
815 nec priscos tollo ritus legesve refigo ;
816 quippe alia arcanis longe sententia dictis
817 indepressa latet, longe altera sacra teguntur
818 nube sub obscura verborum. Ut cetera mittam,
819 quid suis horretis vetitis imponere mensis
820 viscera ? Non animis labem sublimibus affert
821 aut his aut illis jejunia solvere rebus.
822 Vobis intus obest mens ipsa et dira cupido.
823 Sed quoniam gaudet caeno immundaque palude
824 saetigerum genus et pecori huic innata libido est,
825 in sue adumbrantur Veneris mala gaudia foedae.
826 Quin etiam, ut jussis animos caelestibus auctor
827 paulatim assuescens posset mollire colendo,
828 nec nulla inciperet sub relligione tenere
829 indociles primum populos obtusaque gentis,
830 pectora jussit oves jugulare et sanguine terram
831 imbuere immeritosque aris mactare juvencos.
832 Quae tamen omnia erant, si cui mens alta vigebat
833 venturae speculum mox relligionis et umbra."
834 His actis jam devexum cum vesper Olympum
835 clauderet, egrediens malefida cessit ab urbe.
836 Tum Genitorem obitus affarier ante propinquos
837 exoptans coramque arcanas promere voces,
838 ignaros socios Taburi ima in valle reliquit ;
839 ipse autem ascensu superans capita ardua montis
840 constitit, aereae feriunt ubi sidera cedri.
841 Addiderant comites se tantum ex omnibus illi
842 fidus Joannes cum fratre Petrusque vocati.
843 Stabant orantes taciti pariterque supinas
844 tendebant sine voce manus ac lumina caelo.
845 Ipse autem his magno Genitorem affatur amore :

846 "O pater, en insons nunc dira ad funera pergo,
847 progenies tua, nec tot ferre indigna recuso,
848 quando certa tibi mens atque haec fixa voluntas,
849 et tanti mortale genus, nil demoror : adsum.
850 Hos saltem qui me patriaque suisque relictis
851 per varios casus lectissima corda sequuntur,
852 aspice, et immeritos caecis averte periclis.
853 Haud vereor quod se his homines, gens impia, passim
854 opponunt : nil facta hominum mortalia terrent.
855 Ipsi etiam (nihil hoc moveor) moriantur ad unum,
856 aut potius saevo, si vis, tu fulmine perde
857 correptos igni et penitus res attere fractas.
858 Tu, genitor, tanto finemque impone labori,
859 si tantae est genus humanum caelo addere molis,
860 saeclaque mutatis in pristina reddere rebus.
861 Tantum oro (scelus) inferno summissa barathro
862 gens, pestem meditata viris, nil improba furtis
863 officiat, non infando praevertat amore
864 insidiis captos nec corda improvida fallat,
865 dum scelera hortatur nostrique oblivia suadet.
866 Jamjam aderunt infandi hostes, armata dolis gens,
867 nondum animos satiata, graves nondum ultra dolores,
868 has fraudes jamque has fraudes artesque movebunt.
869 Quas non mentiti simulato corpore formas,
870 ut capiant genus innocuum vertantque venenis
871 pestiferis ? Tu frange dolos ferque irrita in auras
872 cuncta, Pater ; tandem victis edice quiescant.
873 Sint qui per terras gentes post funera nostra
874 justitiam erudiant et relligionis amorem.
875 Hanc veniam concede ; id gnati cedat amori."
876 Filius haec. Genitor contra cui talia reddit :
877 "Nate, Patris virtus nostrique simillima imago,
878 nulla tuis fraus (solve metum) nullaeve nocebunt
879 insidiae, quas nunc regni molitur operti
880 arbiter. Incoepti frustra irritus omnia tentat.
881 Induat in facies centum, centum ille figuras,
882 ipse adero, retegamque dolos fecundaque fraudis
883 agmina disjiciam et magna virtute resistam.
884 Unus erit tantum, cui mentem insania vertet,
885 infelix, jam nunc devoto pectore versat
886 infandum scelus, atque tui jam paenitet aegrum,
887 secum indignantem, tua quod praecepta secutus
888 exuerit blandum vitae mortalis amorem
889 malueritque graves sub te tolerare labores,
890 omnia quae mecum mundi ante exordia nosti.
891 Hunc tamen indignum numero coetuque piorum
892 addidimus memores vatum, qui talia quondam
893 praedixere, tuis exemplum insigne futurum.
894 Evadent alii insidias meliora secuti.
895 Omnes te propter contempto lucis amore
896 haud mortem horrescent pergentque in funera laeti,
897 innumeramque suo parient tibi sanguine gentem
898 projectu vitae et mortis amore superbi.
899 Efficiam caelo dignos post aspera tandem
900 funera, deserti magnum aetheris incrementum.
901 Quos tu olim aspicias hac relligione nepotes
902 surgere, nate, tibi ! Quam pectora certa videbis !
903 Tu modo, tu perge et coeptum decurre laborem.

904 Hi, quos cernis enim vix nunc tua jussa secutos
905 indociles, fandi ignaros (mora non erit) altos
906 pectore concipient sensus doctoque verendas
907 ore canent leges, afflati numine nostro,
908 et vastum in melius referent hortatibus orbem.
909 Succedent aliis alii sacrique nepotes ;
910 victores tua signa ferent trans ultima claustra
911 Oceani, latas undis cohibentia terras ;
912 clarescetque tuum passim per saecula nomen.
913 Sponte sua invicti reges tibi sceptrum, tibi arma
914 subjicient sua per terras arasque sacrabunt.
915 Atque adeo gravida imperiis Roma illa superba,
916 Appenninivagi quae propter Tybridis undam
917 ingentes populos frenat, pulcherrima rerum,
918 summittet fasces et, quas regit, orbis habenas.
919 Illic relligio, centum illic maxima templa,
920 centum arae tibi fumantes centumque ministri,
921 quique viris late atque ipsis det jura sacerdos
922 regibus et summo te in terris reddat honore.
923 Si qua tamen paulatim annis labentibus aetas
924 decolor inficiet mores versisque nepotes
925 degeneres surgent studiis, per dura laboresque
926 exercens lapsam revocabo in pristina gentem,
927 illa malis semper melior se tollet ad astra.
928 Saepe solo velut eversam excisamque videbis,
929 quam modo praedixi, populorum incursibus urbem,
930 verum quo magis illa malis exercita, semper
931 altius hoc surgens, celsum caput inseret astris,
932 moeniaque in melius semper recidiva reponet,
933 nec nisi subjecto passim sibi desinet orbe.
934 Sic placitum. Nostri sedes ea numinis esto."
935 Haec ait, et Natum dextra complexus inhaesit.
936 Ecce autem subito rubra vibratus ab aethra
937 cum sonitu fulgor micat, et polus intonat ingens.
938 Nam Pater omnipotens manifestus ab aethere nubem
939 ostendit radiis illustrem lucis, et igni.
940 Omnia collucent late loca. Turbine Christus
941 corripitur rapido mediaque in nube refulsit,
942 verus et aspectu patuit Deus, atque per auras
943 divinum toto spiravit vertice odorem
944 luminis aetherei specimen, genitoris imago.
945 Nec secus emicuit roseo pulcherrimus ore
946 insolita circum perfundens omnia luce,
947 quam cum mane recens lucis fons aureus ingens
948 lumine sol caelum exoriens rigat omne profuso,
949 Oceani in speculo longe resplendet imago,
950 et croceae effulgent aurata cacumina silvae.
951 Talem se sociis mirantibus obtulit heros,
952 amborum in medio vatum, quorum alter adivit
953 flammifero quondam invectus caeli ardua curru,
954 et tranavit equis insultans aeris auras.
955 Isacidum Phariis genus alter duxit ab oris,
956 dux profugum, legesque dedit moremque sacrorum.
957 Nec non caelicolum propius tum maxima pandi
958 visa domus caelique ingens apparuit aula.
959 Tum genitor, nubis fulgens candentis amictu,
960 oscula libavit Nato, et vox lapsa per auras :
961 "Hic mea progenies ; hic est mea magna voluptas.

962 Uni huic mortales omnes parete volentes."
 963 Nec plura his. Toto assonuit chorus omnis Olympo
 964 caelestum cantu vario plausumque dedere.
 965 Tum demum in faciem consuetam redditus heros,
 966 attonitos socios monstrisque metuque sepultos
 967 excitat atque hominis mortali apparuit ore.

LIBER SECUNDUS.

C_2 v.1 At Solymi, trepidi rerum et formidine caeci,
 2 noctem illam patrum primi templique ministri
 3 insomnem duxere. Animis adeo addita cura
 4 incubat ac nullam attonitis dat dira quietem.
 5 Omnibus ante oculos urbem ingredientis imago
 6 laeta Dei festique manus impubis honores
 7 illiusque vident late increbrescere nomen.
 8 Fama volat passimque canit miracula rerum.
 9 Quid faciant ? Magis atque magis jam vera patescunt,
 10 quae quondam prisca vates cecinere futura :
 11 terras caelesti regem de stirpe manere,
 12 cujus in adventu templum Judaeaque tandem
 13 regna ruant, Solymeque eversis desinat aris
 14 antiquo de more sacros imponere honores.
 15 Ergo infracti animis omnes, terrore subacti,
 16 tectis quisque suo saepti clausique manebant.
 17 Quales quae solitae florentia rura volantes
 18 carpere apes, ubi saevit hiems caelumque profusos
 19 solvitur in nimbos et aquosus regnat Orion,
 20 otia lenta terunt clausisque alvearibus aegrae
 21 cunctantur, circumque fores ac limine mussant.
 22 Tempus erat per membra quies cum grata soporem
 23 irrigat ac positis affert obliviam curis,
 24 et jam noctipotens manus, imo emissa barathro,
 25 horribiles visu formae furialibus omnem
 26 coetibus obsedere urbem. Pars turribus instant,
 27 pars apicem templi et fastigia summa coronant :
 28 cetera perque vias legio, perque alta domorum
 29 tecta volant tractimque haerent per culmina tignis.
 30 Haud secus Italiam repetunt ubi vere tepenti
 31 caerula aves longo fessae super aequora cursu,
 32 quae prior occurrit tellus, hanc agmine denso
 33 certatim arripiunt procurvaque litora complent.
 34 Principio spargunt occultum in pectora virus
 35 vipereamque viris animam caecumque furorem
 36 inspirant odiumque animis et crimina linquunt.
 37 Multi etiam in facies hominum vertuntur et omnem
 38 protinus incendunt variis rumoribus urbem.
 39 Irrepunt tectis alii somnoque solutis
 40 somnia dira ferunt varia sub imagine rerum
 41 atque hominum falsis simulacris pectora ludunt.

42 Jamque hujus subeunt, jamque illius alta potentum
43 limina et attonitos dictis hortantur in hostem
44 terrificantque animos facta atque infecta canentes.
45 Christum inferre faces arisque instare bipenni
46 armatum aerata atque adytis extrema minari,
47 et jam semusto in templo dominarier ignem.
48 Quin ipsos templi mentiti veste ministros
49 singula tecta adeunt patresque ad limina sacra
50 conciliumque vocant : nigri dux agminis ipse
51 impulit aerisono stridentes cardine portas.
52 Hinc atque hinc delubra petunt, concurritur ultro
53 undique, nec tenebris nox obstat euntibus atra.
54 Non aliter captam si rumor nuntiet urbem
55 nocte dolis intempesta atque latentibus armis
56 hostem inferre acies et jam summa arce receptum
57 culminibusque immissa voret fax atra penates,
58 plenis cuncta viis fervent, trepidoque tumultu
59 huc atque huc itur, nec sat rationis eundi est.
60 Praecedunt dirae facies, facibusque nefandis
61 sufficiunt lucem et summo dant vertice lumen
62 terrificas capitum quatientes undique flammis.
63 Nec miseri tamen agnoscunt : furor omnibus intus
64 eripuit mentem lapsumque in viscera virus.
65 Nec minus interea bis seni ex agmine missi
66 bis senos Christi ad socios, evertere si quem
67 possent, et furiis deceptum incendere iniquis.
68 Illi autem pleni monitis ducis (ante futura
69 praescius ista suis praedixerat omnia) servant
70 invictos animos inapertaque pectora fraudi,
71 quamquam hostis species sese transformet in omnes
72 nequicquam expertus mentesque indagine captet.
73 Unus non valuit sese his subducere vinculis,
74 Iscarius pesti infandae devotus Iudas,
75 lectorum procerum labes et pestis Iudas !
76 Hic se olim addiderat socium vestigia Divi
77 ingressus, patria atque opibus carisque relictis,
78 incerta exilia, incertas quacumque paratus
79 ire vias, talique necem pro rege pacisci.
80 At mox coeptorum piguit durique laboris
81 paulatim pertaesum. Animo tum volvere secum,
82 noctes atque dies tacitus, si qua potis artis
83 legibus exsolvi et priscae se reddere vitae,
84 indignans longum incassum cecidisse laborem.
85 Hos abitus jamque hos abitus et furta parabat,
86 impatiens operum, rebus non laetus egenis.
87 Talibus undantem curis animoque labantem
88 jampridem nigrae reperit dux ipse cohortis ;
89 haud minus exsultans animis quam monte sub alto
90 cum procul aspexit tendentem in pascua cervum
91 Gaetulus leo, quem siccis exercet hiantem
92 faucibus ex longo collecta insania edendi.
93 Ac prius in faciem Galilaei versus Iorae,
94 ipsi qui fuerat conjunctus sanguine Judae,
95 insomnem aggreditur verbis : "Tu nocte silenti
96 montibus in solis erras, insane, potesque
97 ultro saeva pati sub nudo frigora caelo,
98 atque tibi alterius sub nutu degitur aetas,
99 dum sequeris (quis te tantus furor incitat ?) istum

100 elatumque animis eversoremque sacrorum,
101 quem tantum illuvies adeunt taeterrima gentis
102 feminei coetus et semiviri comitatus ?
103 Primi omnes infensi odiis concordibus ardent
104 sacrilegoque necem intentant ; jamque ille furorem
105 vesanum expendet, cedit fiducia tanta.
106 Non illi auxilio magnarum gloria rerum,
107 quas mentitur, erit. Nil contra obtendere densa
108 nubila, nil solitas accingi proderit artes.
109 Rumpe moras. Eja instanti te surripe cladi."
110 Sic ait, ardentemque odiis instigat acerbis.
111 Tum mutata acri percussit pectora thyrso,
112 et subito nocti ablatum se immiscuit atrae.
113 Hinc miserum invadens praecordia ad intima sese
114 ingerit atque imis dirum implicat ossibus ignem.
115 Olim etiam in mentem veniunt quaecumque sub illo
116 jussus dura tulit, quaecumque exhausta pericla.
117 Et piget atque nefas polluto volvit amore,
118 immeritumque animo sedet hosti prodere regem.
119 "Ah miser, ah malesane, Deum non pectore sentis ?
120 Non oculis numen praesens, non auribus hauris.
121 Quis te mutavit tantus furor ? Aspice quo nunc
122 culmine praecipitas, quam trahis arce ruinam !
123 Nec qualis sentis tibi menti insederit error ?
124 Quid struis ? Aut quo te raptat tam dira cupido,
125 quae nunc te male habet mentisque et lucis egentem ?
126 Quam nunc amittis sortem, irreparabile donum,
127 optabunt seri post saecula mille nepotes.
128 Atque adeo quae vota foves, quam mente secas spem,
129 laetitia elatos animos inflatus inani,
130 omnia discerpent rapiuntque per aera venti.
131 Excute dum licet, infandam de pectore pestem
132 quaeque imis te nunc est addita cura medullis !"
133 Jamque sacerdotes totaque ex urbe senatus
134 secretam in templi sedem concesserat omnis.
135 Ipse sacerdotum primus, cui tempora sacra
136 infula cingebat, Caiphas in sede sedebat
137 celsior aurata ; inde alii longo ordine cives,
138 quos omnis circumsiliunt acuuntque furorem
139 Tartareae haud ulli visae sine corpore pestes.
140 Nec mora, nec requies sublapsae in pectora cunctis
141 eripiunt mentem atque animis incendia miscent.
142 Multa illi inter se vario sermone serebant
143 solliciti ; vasto strepit ingens murmure templum.
144 Sunt qui ipsum jubeant utcumque absumere Christum
145 seu vi sive dolo, juvenemque invadere ferro
146 qui rursum in lucem nuper revocatus ab umbris
147 venerat et totam monstro concusserat urbem.
148 Ast alii plebem metuunt vulgique furorem ;
149 namque sibi ingentis populos devinxerat heros,
150 hos meritis, illos divino affabilis ore.
151 Hic Nicodemus erat pesti impenetrabilis unus,
152 primores inter gentis non ultimus ipsos,
153 cui longe menti melior sententia, sed non
154 audebat dictis contra omnes tendere solus.
155 Ille deo quondam sese inscius intulit hostem
156 atque dolis frustra contra stetit : inde ubi numen
157 admonitus sensit, veluti de nocte profunda

158 in lucem revocatus, ei se junxit amore,
159 clam tamen, infensae vitans odia aspera gentis.
160 Tum vero illius de vita et sanguine cerni
161 ut vidit letumque insonti triste parari,
162 non tulit ulterius latebras haecque edidit ore
163 in medio : "Non obscuram, non lucis egentem
164 rem ferimus, neque enim vereor jam vera profari
165 pro patria, quamvis mihi sint extrema ferenda.
166 Cernitis hunc omnes manifesto numine ferri
167 majoremque homine et, nosmet nisi fallimus ipsi,
168 vera dei patuit soboles, verus Deus, ille
169 olim quem toties afflati numine vates
170 venturum cecinere, nefas quo triste piaret,
171 commendans genus aeterno mortale parenti.
172 Hoc liquet, hoc ultra non in discrimen agendum.
173 Hujus ope innumeri, quos nox obscura premebat
174 luminibus captos, jucunda luce fruuntur.
175 Multi etiam voces obstructis auribus orti
176 accipiunt redduntque. Aegris quot reddita venit
177 insperata salus, qui lenta aut membra trahebant
178 victa lue aut subito correpti corpora morbo ?
179 Tris etiam (nostis) obita jam a morte reduxit
180 elatos idem in lucem ; modo Lazarus omnem
181 perculit et monstro ingenti permiscuit urbem.
182 Pro laevas hominum mentis, pro pectora caeca !
183 Non haec Paeoniis succis, non artibus ullis
184 confieri possunt : major deus intus agit rem,
185 majus numen inest. Quoties divina loquentem
186 incassum contra stetimus, verbisque dolisque
187 instructi ? Quoties ausi vim tendere inermi
188 aut ferro aut duris nequicquam perdere saxis ?
189 Nube cava eripuit caput ex oculisque recedens
190 aligerum se caelesti subito agmine saepsit.
191 Et quisquam illius certum non numen adoret ?
192 Quid molimur adhuc ? Quid nobis deinde relictum ?
193 Quin potius, quando nobis demissus Olympo
194 auxilio venit, una omnes adeamus, ab ipso
195 suppliciter pacem oremus commissa fatentes."
196 Talia perstabat repetens. Violentia cunctis
197 gliscit et accensus semper per viscera sensus
198 conflatur magis et saevos furor aggerat aestus,
199 paulatimque animi turgescunt tristibus iris.
200 Exarsere omnes. Pestis latet intus et omnem
201 eripuit miseris lucem victisque veneno
202 pestifero nebulas offudit mentibus atras.
203 Tum demum erumpit quae cunctos ira coquebat :
204 infremuere omnes contra gemitumque dedere.
205 Qualiter aere cavo, dum sulfura pascitur atra,
206 inclusus magis atque magis furit acrior ignis
207 moliturque fugam, nec se capit intus anhelans,
208 nulla sed angustis foribus via, nec potis extra
209 rumpere, materiam donec comprehenderit omnem ;
210 tum piceo disclusa volat glans ferrea fumo.
211 Fit crepitus : credas rupto ruere aethere caelum.
212 Jamque illa et turres procul ecce stravit et arces ;
213 corpora et arma jacent late et via facta per hostes.
214 Haud illi secus accensi meliora monentem
215 excludunt adytis atque extra moenia trudunt.

216 Tum vero Caiphas, ubi facta silentia linguis,
217 sic orsus sibi, quae sedeat sententia, pandit :
218 "Haud equidem moror, o cives, quod versus ad hostes
219 iste etiam infando captus perfugerit astu,
220 qui toties summa pro re, pro legibus olim
221 objecit patriis caput ultro, ipsumque premebat
222 obnitens contra nuper sermonibus hostem.
223 Tanta est artificis pellacia, vis ea fandi,
224 ut quoscumque velit vertat superetque venenis.
225 Scilicet hunc credam caelo divinitus actum
226 nobis venisse auxilio, quo se impius ortum
227 patre Deo canit ac leges abolere parentum
228 antiquas cupit atque novos inducere ritus ?
229 Seque ultro excidio templi venisse fatetur,
230 quod nostri monitis olim caelestibus acti
231 impensis tantorum operum struxere parentes.
232 Quae novitas aut relligio, qui denique mores ?
233 Ille etiam, ne quid sceleris sibi restet inausum,
234 sacrilegus sontes et quorum crimina nota
235 prosequitur venia, haud veritus scelerata subire
236 limina, nec festis parcit de more diebus.
237 Ergo agite atque illi insidias letumque merenti
238 maturate viri ! Crescentem exstinguite flammam,
239 ne mox subsiliat victrix ad tecta domorum,
240 degustetque trabes perque ardua culmina regnet.
241 Subvertet solitis aliter totam artibus urbem,
242 seditione potens ; populos captabit et omnem
243 subjiciet sibi prodigiis fallacibus oram.
244 Hinc quae tot nobis annos tam prospera cessit
245 relligio eversis actutum desinet aris.
246 Tum metuo ne Romulidae, non talia passi,
247 quicquid adhuc juris superest, a gente reposcant
248 et profugos patria jubeant decedere terra.
249 Unum pro multis detur caput, unius omnes
250 expiet ac tutos mors tanto in turbine praestet.
251 Hoc habet. Haec melior superet sententia, cives ;
252 haec illi ob numen dona, hunc reddamus honorem."
253 Talia fatus erat. Furiis stimulantibus intus
254 experti passique senes eadem ore fremebant.
255 Omnibus idem animus, sed qua ratione quibusve
256 id fieri occulte queat artibus, exquirebant.
257 Cum subito, ecce suis clam se furatus, Iudas
258 improvisus adest cunctis mirantibus. Illum
259 excipiunt trepidi spirantem immane, locantque
260 sede inter primos farique hortantur et ardent
261 quid veniat dubiis animis audire silentque.
262 Ille autem torquens huc flammea lumina et illuc
263 sic fatur : "Scio vos Galilaei facta furentis
264 formidare, patres, patriae qui legibus affert
265 exitium ; moliri ideo vos plurima cerno.
266 Si mihi quae posco promittitis, omnia solus,
267 quae nunc vos frustra exercent, dispendia tollam.
268 Ille manus faciam in vestras hodie incidat ultro."
269 Dixerat. Argenti laeti pepigere talenta
270 ter dena, egregii pretium memorabile facti,
271 dimittuntque alacres, atque extra limina ducunt.
272 Ille petit montes iterum sociosque revisit.
273 Forte propinquabat genti sollempnis et orae

274 festa dies, veterum cum relligione parentum
275 immunes operum ducunt septem ocia soles,
276 perque domos ovium fetus epulantur et acri
277 fermento parcunt jussi, properataque liba
278 expediunt mensasque onerant agrestibus herbis,
279 laetitiae veteris memores. Hac luce ferebant
280 Aegyptum priscos olim, caelestibus actos
281 prodigiis, magna cum praeda exisse parentes,
282 ingressos pede iter salsas impune per undas.
283 Ergo ingens tum sceptriferam concursus ad urbem
284 undique erat, populique omnes ad sacra fluebant.
285 Non effusa tamen turba huc sine more ruebat,
286 verum quisque ducemque suum gentemque tribumque
287 una ibant comitati. Etenim licet omnibus idem
288 sanguis cognataque, orti sint stirpe nepotes
289 omnes Isacidae, paribus sub legibus omnes,
290 scindit se tamen in bis senas una tribus gens
291 atque Palaestinam late est diducta per omnem.
292 Libera gens olim multa munita virum vi
293 florentesque urbes populis opibusque vigentes.
294 Tunc autem patriis de finibus exturbati,
295 paene omnes aberant et Caspia saxa colebant.
296 Vix de bis senis tribus una intacta manebat
297 alteraque et patria sese tellure tenebant,
298 Benjamidum gens aque ipso domus incllyta Juda,
299 ambae tunc etiam populis opibusque vigentes.
300 Tantum autem imperio adjectam ceu cetera passim
301 contuderat bello et victricibus hauserat armis,
302 hanc quoque servitio partem Roma alta premebat.
303 Sceptrum urbi tantum sublataque ademerat arma,
304 linquens sacra viris ac leges victor avitas.
305 Nunc tellus deserta jacet. Tot clara fuere
306 moenia, tot populis pariter cum fortibus urbes,
307 hae bello, hae validis quassatae viribus aevi,
308 usque adeo saevas superum pater arsit in iras
309 nimbiopotens natiqque necem non passus inultam est.
310 Non tamen indecorem tantae solacia cladis
311 ipse sinam antiquam (superent modo carmina) terram,
312 ne penitus sedis obliviscentibus aetas
313 deleat extinctam pariter cum nomine gentem.
314 Regem illis superum prosit regionibus ortum
315 vagisse et caelo primum reptasse sub illo.
316 Vos ideo aligeri coetus, gens aetheris alti,
317 qui levibus magnum pedibus pulsatis Olympum,
318 (nam vos saepe polo missi peragrastis et oram
319 et gentis crebri hospitio indulsistis amicae),
320 este duces mihi, dum tota regione vagantem
321 raptat amor. Longum vos mecum ferre per aevum
322 nomina, quae cecidere, juvet deletaque gentis
323 oppida et antiquas antiqui nominis arces.
324 Post autem vestra sublatus ad aethera penna
325 carmine mortales oras visusque relinquam.
326 Vos me sublimi sistetis tramite vectum
327 avia per superum loca. Me juvet alite curru
328 aurea nubifugo mulcentem sidera cantu
329 intactas primum ire vias mortalibus aegris
330 et petere insolitam caeli alta e rupe coronam.
331 Haec olim, audentem ni deserat aetheris aura.

332 Nunc mecum populos percurrere templa petentes
333 non alias illuc aditum est majoribus umquam
334 et numero et studiis. Nec tantum sacra petebant,
335 quantum avidos Christi visendi traxerat ardor.
336 Orti autem a magno primi ingrediuntur Iuda,
337 per multos ductum reges genus. Haec tribus usque
338 et numero et virtute caput super extulit omnes,
339 tantum alias superans, quantum leo cuncta ferarum
340 semina inexhaustis animis et viribus anteit ;
341 litorea innumeri Gaza venere Sabeque.
342 Engada deseruere racemiferosque recessus,
343 urbis Adulaeae sedes humilemque Raphean.
344 Hic Lyde atque Selis ventosaque Jamnia et Hippa,
345 Ascalo Azotique arces Acharonque Sochonque,
346 quaeque fluentisonis Joppe perfunditur undis
347 projectae rupes pontoque minantia saxa.
348 Parte alia antiquam cives liquere Damascum,
349 primus ubi (ut perhibent) limo felice creatus,
350 natus homo est caelique novas erupit in auras.
351 Deseriturque Emaus Nepseque exhausta silescit,
352 quaesivitque suos Aegypti proxima regnis
353 Anthedon, natiue dei cunabula, Bethle.
354 Tum deserta silent et Galgala Bessuraque omnis
355 arvaque qua Marethon, qua proxima nubibus Erme,
356 qua Sigoris mirata nurum, dum incendia versa
357 respicit, humanos servasse in marmore vultus
358 concretique salis subitum traxisse rigorem,
359 qua calet Asphaltis flammis infamibus unda
360 ingentesque palus ad caelum exaestuat aestus,
361 aera contristans graveolenti sulfuris aura.
362 Quondam hic laeta seges riguisque rosaria campis ;
363 nunc stat ager dumis obductaque sentibus arva.
364 Crimen, amor malesuade, tuum, vim tendere adorti
365 infandam indigenae pueris caelestibus olim,
366 divina capti facie et florentibus annis,
367 fecissentque, fuga nisi se illi ad sidera lapsi
368 remigio nixos rapuissent praepetis alae.
369 Non tulit altitonans Pater atque ultricibus omnem
370 involvit flammis tractum immersitque profundo.
371 Squalet adhuc cinere et putri late ora favilla ;
372 infecunda ideo terra et sine frugibus agri
373 difficilesque aditus et inaccessi secessus.
374 Illic, ut fama est, nitidum florem educat arbos,
375 quem cupiunt juvenes, cupiunt quem ferre puellae.
376 At simul atque gravi perflante evanuit Austro,
377 succedunt poma hirsutis asperrima barbis,
378 quae nulli juvenes, nullae cupiere puellae.
379 Haec tamen aspectu solida et sincera putares,
380 foeda sed illuvies intus subitoque fatiscunt,
381 ad tactum cinefacta, hominum nihil usibus apta.
382 Pallida item flavis cum vix seges albet aristis,
383 dira immaturas messes interficit aura.
384 Protinus hinc subeunt populi Simeone creati,
385 qui Saroen Molodamque viri Sicelegidaque oram
386 felicem frugum laetosque uligine campos,
387 qui Sipabota colunt Asanesque biverticis arces,
388 quique Atharin, quondam generosos palmite colles,
389 Remmona qui cultisque erectam in collibus Ain,

390 et quos turilegae pascunt centum oppida Idumes
391 ruraque odoriferas Arabum vergentia ad oras.
392 Ecce autem Isachari magno clamore nepotes
393 ingressi delubra petunt aramque salutant.
394 Gens victu facilis contentaque finibus artis.
395 Hic adsunt quos Hermonius sub vertice pascit,
396 Hermonius generator apum, generator equorum ;
397 qui Taburi capita alta tenent, quibus ardua rupes
398 Carmeli domus. Haec rapido gens turbine quondam
399 sublatum vatem caeli per aperta repente
400 vidit flammifero ferri super aethera curru.
401 Sensena quos misit, quos Hennada, quos alit Affra
402 nobilis, in summis sitientes rupibus urbes ;
403 qui Senum et Reboten liquere Remetiaque arva,
404 vitibus et variis intersita litora pomis.
405 At taciti incedunt gens Dani e sanguine creti
406 dejectique oculos dejectique ora per urbem
407 templa petunt. Qualis cum frigora prima lacessunt
408 autumnum nec dum ramis decussit honorem
409 bruma suum, coluber latebras meditatur iterque
410 fert tacitum lapsu repens per saxa quieto,
411 sibilaque ora premit neque caudae surrigit orbis.
412 Jamque viros tristes credas, quodsanguine ab illo
413 praedixere ducem fore pleni numine vates,
414 qui genus humanum Christi sub imagine falsa
415 terreat atque hominum vitas et crimina quaerat,
416 deterior fas atque nefas ubi verterit aetas,
417 et rebus feret exitium mortalibus ignis.
418 Protinus at multis aderit cum millibus ultor,
419 vera dei soboles, verus datus arbiter orbi.
420 Illum nequicquam pugnantem et vana moventem,
421 turbine corripiens, terrae ima in viscera trudet.
422 Insequitur juvenum nimbus genus Asere ductum,
423 spicea, queis capita obnubit de more corona
424 omnibus et nexae ludunt per tempora aristae.
425 Hi Betagumque Hormamque serunt ; his Aphega sedes,
426 illos Ama dedit, illos misere Robaeae.
427 Non numero Arctipus Labanae, non Aziba cessit.
428 Hos juxta seram in noctem soliti urere myrtos
429 litoreas ponti gens accola Zabulones
430 dona ferunt. Pars Jeptaphiles ab sede profecti ;
431 pars Jedaba venere. Canam hi liquere, modo atra
432 miratam puras in vina rubescere lymphas.
433 Hos Nazara tulit, tulit illos ardua Sembros,
434 quaeque modo aerias iterum venisse sub auras
435 vidit morte obita puerum, Galilaeia Nais
436 millia multa tulit, totidemque uberrima Doha ;
437 atque suis Nalole Cathetiaque alta relicta est.
438 At quis Nephthalidum numeraverit oppida et arces
439 innumeras, quas et Cedar, quas et sacer altis
440 fert humeris Libanus caeli confinibus aequus ?
441 Qui celsam Nasona habitant, qui Nephthalis urbem,
442 gens oris fandique potens fecundaque veri,
443 nascentem gemino Jordanem fonte salutat,
444 omnis iit Galilaea, omnis Samaraea penates
445 deseruit, studio satus tantum accita videndi.
446 Saepe hac rege satus superum tellure moratus
447 sponte Deum se detexit. Miracula rerum

448 assecla nunc etiam meminit, meminere Caperna,
449 et vetus amisit quae nomen Graia Sebaste.
450 It Bethole, eductaque ad sidera Bessais arce,
451 et quos piscosis Gennesara proluit undis.
452 Levigenae vero sacrum genus omnibus ibant
453 immixti, neque enim propria his regio ulla colenda
454 sorte data est, sed diversas dux legifer olim
455 huc illuc oras aequae est partitus in omnes,
456 praefecitque sacros aris, proque ubere glebae
457 et jugulare dedit pecudes atque exta cremare.
458 At non contentus regnis sceptrisque Manasseus,
459 sortitus quae trans fluvium sibi junxerat ampla,
460 protulit imperium qua Nepheca Bersaque surgunt,
461 venatrix pecorumque altrix et Dora ferarum.
462 Olli etiam parent Tenachos nemorosaque Jebla
463 et Magedos nulli populis opibusque secunda,
464 quasque rigat Taphua claris argenteus undis,
465 ver ubi perpetuum scatebrisque recentia prata.
466 Succedunt qui trans Jordanis flumen opima
467 arva serunt, tribus ipso etiam deducta Manasseo.
468 Necnon Gade sati, necnon Rubene creati
469 belligero, fratrum cunctorum maximus aevo
470 qui fuit, una omnes urbem ingrediuntur, ut olim
471 una etiam sedem optarunt trans flumen eandem,
472 indigenis quondam regnata gigantibus arva.
473 Argobiae qui rura colunt Basanidaque oram,
474 qui saltus, Galadina, tuos, Ogique subactas
475 sexaginta urbes Galaticaque oppida : Jabin
476 et Sebamam Balmenque, Ramotha, Golanque Nabenque
477 Edrenque Selcamque et semirutam Cariathen.
478 Haec tunc nomina, nunc alio sunt nomine terrae.
479 Tum qui cedriferae pascunt asperrima Arimnes,
480 omnes fronde caput tecti, omnes terga veruti.
481 Qui Bosorim Rabathenque tenent, qui Gaulida et omnem
482 fortibus exercent tauris Bathaltidos oram,
483 et quos humectat praeceps de montibus Arnos.
484 Nec vos transierim, qui prata feracis Abillae,
485 quique Eleale viri metitis viridemque Aserota,
486 Seoniamque Esebon, saxis horrentia regna,
487 desertasque Cades, quas Phasga habet arduus et quas
488 hinc atque hinc Hermus praeruptas sustinet urbes,
489 quas Abaris, cujus nimbo e vertice quondam
490 pastores admirati videre morantem
491 Jordanem ingenti subsidere mole coacta
492 undarum et cursu cedentia flumina retro,
493 dum domus Isacidum promissa capesseret arva.
494 Postremi subeunt advecti e sede propinqua
495 Benjamidae, data sorte quibus laetissima tellus,
496 maxima ubi et Solyme totius regia gentis,
497 altaque Jarephile Luzaeque binominis arces ;
498 quaeque modo quarta regem jam luce sepultum
499 Bethane obstupuit revocari ad munera vitae,
500 et Tarela et Samare et lentisciferae Gabaothae,
501 gens infesta feris : ideo exuviasque luporum
502 induti incedunt juvenes, canibusque fatigant,
503 quas saepire plagis juvat usque et frangere, silvas
504 atque adeo assiduo venatu mane recentes
505 convectant humeris praedas, quas vesper Olympum

506 claudit ubi, gaudent partiri epulisque fruuntur,
507 atque inter sese per agros convivia curant.
508 Hic adsunt, quis Maspha domus, quibus arduus Hemen
509 difficiles colles ac scabra crepidine terga,
510 qui liquere Recen celsasque Berothidos arces
511 atque Sylum quondam gaudentem paupere templo,
512 qui longumque Helephon Avinque Amosamque Selamque
513 atque ululata Rhamae passim Rachellidos arva.
514 Qui Gabeone domo quique Ierichunte profecti.
515 Indigenas, est fama, viae assiduique meatus
516 oblitum, vidisse diu considerare solem
517 imperio ducis atque diem decedere serum.
518 Hos inter facie egregia puer altior ibat,
519 qui prisco genus a Saulo nomenque trahebat.
520 Jam tum illum vates uno omnes ore canebant
521 praestanti clarum eloquio factisque futurum.
522 Quantis ille tamen mentem caligine pressus
523 in nostros odiis primum furiisque feretur !
524 Omnipotens aderit pater et se pectore toto
525 altius infundet juveni excutietque furorem.
526 Protinus afflatus divinitus aetheris aura
527 implebit terras monitis, latumque per orbem
528 mortales meliora docens ad sacra vocabit,
529 nec letum horrescet pro religione cruentum.
530 Jam duodena tribus magnae successerat urbi.
531 Ipse etiam templo ut solitos inferret honores
532 munere nec tali tam laeta luce careret,
533 affatur socios Christus : "Lux sacra propinquat.
534 Omnis se dapibus festa domus apparat urbe.
535 Ecquis erit vestrum, primus qui ad moenia tendat,
536 si quis forte opibus fessos invitet abundans,
537 nos quoque ut ante meos obitus ac funus acerbum
538 solemnes epulas celebremus et annua sacra ?
539 Nec longe quaerendus. Erit puer obvius ultro
540 urnam humero lymphasque ferens de fonte recentes.
541 Quo tendat gressus aut quo sese ille receptet,
542 observate, locumque acie capite usque sequendo.
543 Limina vos eadem accipiant, tectumque subite.
544 Tum dominum affati coram hospitiumque rogantes,
545 exiguam sacris sedem, nostrum edite nomen.
546 Tectum auratum ingens pictisque insigne tapetis
547 protinus ostendet. Structas ibi ponite mensas.
548 Ipse adero atque eadem socios ad limina ducam."
549 Dixit. Joannes mandata Petrusque facessunt,
550 et maesti magnae succedunt moenibus urbis.
551 Ibant incerti atque oculis procul omnia obibant,
552 cum puer urnam humero gestans lymphamque recentem
553 vicino veniens de fonte occurrit : eum usque
554 servantes gressum ferret quacumque sequuntur,
555 quasque subit, subeunt ipsi quoque protinus aedes.
556 Huc atavis clarusque Simon et prole beatus
557 septena sese semper referebat ab agris,
558 si quando caris cum natis viseret urbem.
559 Namque illum potius campis rurique juvabat
560 degere civilesque procul contemnere honores.
561 Umbrae illi nemorum cordi rivi que secantes
562 praedia, quae centum dives vertebat aratris.
563 Jam gravis argutasque fides et carmina amabat

564 fluminis in ripis aut fontem propter amoenum.
565 Norat enim caeli numeros mensusque viasque.
566 Saepe deo plenus porro ventura canebat
567 agricolis quid sol, quid menstrua luna pararet,
568 sudique pluviaeque docens praenuntia signa.
569 Tum sacris intentam igitur concesserat urbem,
570 ut de more dies festos celebraret avito.
571 Dumque alia famuli mensas et dona pararent
572 parte domus, veterum facta ipse canebat avorum,
573 nunc citharae levibus digitis, nunc pectine eburno
574 percurrens molli attactu vocalia fila.
575 Praecipue a prima revocabat origine, quaenam
576 has ex more epulas atque haec solemnia priscae
577 religio intulerit genti. Verum ecce canenti
578 improvisus adest Petrus et sacra carmina rumpit :
579 "Rex, ait, est nobis, quo nusquam justior alter
580 aut pietate prior ; Christum omnes nomine dicunt.
581 Is tua nos ultro supplex ad limina mittit.
582 Exiguam sacris sedem mensisque rogamus."
583 His ille auditis gavisus nomine tanto,
584 imperat haud haerens animo tectum omne recludi ;
585 hinc hilares totis adolere penatibus ignes
586 et pingui suffire Arabum jubet atria silva,
587 interiusque viros media in penetralia ducit.
588 Inde locum ostendit mira testudine pictis
589 aulaeis circumvelatum ostroque rubenti.
590 Luxuriant sola strata, nitent argentea eburnis
591 fulcra torisque, scyphique, auroque e simplice lances,
592 et passim domus argentoque auroque renidet.
593 Atque haec deinde refert : "Non hoc mihi nomen ad aures
594 nunc primum venit, illius sed cognita fama
595 jam pridem virtus, neque enim mihi cernere coram
596 fas fuit aut vocem divinam hausisse loquentis.
597 Adveniat. Placidus tectis assuescat amicis.
598 Vos hic exspectate, viros, qui exacta reportent
599 omnia, dimittam meaque illum ad limina ducant,
600 atque utinam libeat longum his in sedibus olli
601 degere et hospitii dignetur nomine tectum,
602 quod nostros juvet interdum memorare nepotes
603 hospitibusque locum felicem ostendere seris.
604 Interea adventu vestro intermissa sequamur
605 carmina et antiquos patrum repetamus honores,
606 dum nigra roriferis nox terras obruat umbris."
607 Sic ait, ac nervis socians concordibus ora
608 obloquitur numeris ; quae concinit, ordine picta
609 cuncta putes aut textilibus simulata figuris.
610 Nempe Paretoniis cantu deducit ab oris
611 Isacidum genus, arrepta maris aequora virga
612 ut profugum dux findat aquasque impune per altas,
613 ut sine navigiis ierint pelagique profunda
614 sicco calcarint pede. Namque induruit humor
615 aridus et liquidas late est via secta per undas.
616 A tergo tota ex Aegypto curribus hostes
617 quadrjugis vecti instabant fulgentibus armis.
618 Jamque pios canit emenso pelago alta tenere
619 litora litoreisque metu se condere silvis,
620 nulla mora est : iterum telo tellure recussa
621 divino, redeunt in se maria ecce refusa,

622 quae media ingenti dirimebat semita tractu.
623 Inde hostes ruere et salsis in fluctibus arma,
624 armaque quadrupedesque et corpora mersa virorum
625 aspiceres magis atque magis subsidere in undis
626 semper et absumptos velut evanescere currus ;
627 qui medii exstabant, medios salis hauserat aestus.
628 Addit ut omnipotens rerum sator aethere ab ipso
629 paverit in vasta gentem regione locorum
630 errantem, dape caelesti miseratus egenos.
631 Cernere ibique putes epulas nivis instar ab aethra
632 defluere ad terram subitas coetusque paratis
633 accinctos dapibus latis epularier arvis.
634 Proinde etiam duras cautes pulsabat eadem
635 dux caelum aspectans virga, cum protinus amnis
636 prosilit et dulcem saxa erupere liquorem,
637 atque hausere novis populi de fontibus undam,
638 quos sitis ex longo collecta urebat hiantes.
639 Tum canit, ut primus Solymorum conditor arcis
640 dona laboratae frugisque recensque reperti
641 pocula plena meri obtulerit campestribus aris,
642 caespite quas viridi sectaque extruxerat orno.
643 Atque ea dum intentis hauribant auribus omnes,
644 haud rerum ignarus, Christus de montibus altis
645 cesserat infensaeque iterum successerat urbi.
646 Et jam declivi cum sol properaret Olympo,
647 hospitis intravit sociis comitantibus aedes
648 regifico instructas luxu dapibusque paratis.
649 Discubuere omnes. Una inter dirus Iudas
650 dissimulans sedet, et vultu mentitur amorem.
651 Jamque heros puras fruges properataque liba
652 accipiens, frangensque manu partitur in omnes.
653 Inde mero implevit pateram lymphaque recenti,
654 et laticis mixti dium sacravit honorem,
655 spumantemque dedit sociis, mox talia fatur :
656 "Corporis haec nostri, haec vera cruoris imago,
657 unus pro cunctis quem fundam sacra Parenti
658 hostia, ut antiquae noxae contagia tollam.
659 Vos ideo, quoties positas accedere mensas
660 contigerit sacrasque dapes libamina jussa,
661 funeris his nostri maestum referetis honorem,
662 et numquam istius <...> abolescet gloria facti." (vers lacuneux)
663 Nec plura. Ex illo mox servavere minores
664 hunc semper ritum memores, arisque sacramus
665 sinceram cererem et dulcem de vite liquorem
666 pro veterum tauris, pecudum pro pinguibus extis
667 ipse, sacerdotum verbis eductus, ab astris
668 frugibus insinuat sese regnator Olympi,
669 libaturque dei sacrum cum sanguine corpus.
670 In summos haec religio successit honores.
671 Ergo ubi pulsa fames sociis, sese ocius heros
672 exuit insignem tunicam et mantilibus albis
673 succinctus, poscit flammis undantia aena.
674 Tum gelidam irrorans dextra laevaue sonoris
675 pertentans labris, ferventem temperat undam.
676 Hinc genibus positus Petro reliquisque suorum,
677 plurima quamquam ille attonitus novitate recuset,
678 dat pedibus lymphas et molli siccatur amictu
679 accurvus, sociis linquens imitabile factum.

680 Mox gemitus imo ducens de pectore fatur :
681 "En mihi summa dies, socii, quamque ipse propinquam
682 praedixi toties ; nox illa advenit acerba.
683 Vos linquam et moriens genitoris jussa capessam,
684 unus erit vestrum (vix, o vix credere tantum
685 fas scelus) insidiis prodet qui me hostibus ultro.
686 Haud me animi fallit, furias jam perfidus ille
687 concipit insidiasque animo meditatur avaro.
688 Id pietas mea magna, mei meruere labores.
689 Non tamen ipse diu pulchro laetabere facto,
690 quisquis eris, satius, si numquam lucis amorem
691 gustasses, dulcis nec vitae limen inisses.
692 At vos este pii inque vicem (quae exempla reliqui)
693 inter vos aliis alii parete volentes,
694 summissisque animis fastus abolete superbos.
695 Non Erebi in tanto cessabunt cardine dirae
696 vestra potestates praevertere corda timore.
697 Pervigiles, quaeso, jam custodite proculque
698 consulite. Hic animos atque illos promite sensus,
699 quos toties mihi polliciti, ne cedite pesti ;
700 vos servate, viri, noctem non amplius unam."
701 Extemplo turbati omnes gemitumque dedere,
702 suspensi quem caecum adeo furiisque subactum
703 ore premens signet venturi praescius heros.
704 Quem senior tali aggreditur sermone precando :
705 "O caeli decus, in quemquam tam immane putandum est
706 posse scelus cadere ? Quisnam foedissimus ille ?
707 Faxo hodie numquam nobis illudat inultis.
708 Non adeo effugit cum sanguine vivida virtus
709 pulsa annis, nec dextra mihi tam frigida languet."
710 Sic ait, et pariter vagina liberat ensem.
711 Dux autem signis manifestis prodidit hostem,
712 sed cunctis mentem eripuit voluitque latere,
713 donec res perfecta. Dehinc haec edidit ore :
714 "Immo omni ex numero mihi nemo hac nocte suprema
715 vestrum non infidus eris, solusque relinquer.
716 Tu quoque, magnanimo cui nunc ea copia fandi
717 sub tecto atque amplis tendis super aethera dictis
718 omnes irritans ventos omnesque procellas,
719 hinc atque hinc circumfusos ubi videris hostes,
720 me capto, quaeres latebras jaciesque salutem
721 mendaci in lingua pedibusque fugacibus acer.
722 Atque ubi curriculo mediam nox humida metam
723 attigerit, ter me tibi notum ille ipse negabis
724 futilis, incutietque metus tibi femina inermis."
725 Dixerat. Ille animi robur magis usque magisque
726 spondebat turpique metu impenetrabile pectus :
727 "Foeda alios servet fuga ; nec tu me ante timoris
728 argue quam terga urgenti dare videris hosti.
729 Quo te cumque ferer, adero. Sequar ultima tecum.
730 Nulla tuis poterit me vis abjungere rebus."
731 His heus exactis mensas urbemque reliquit
732 et secum sociis pura sub nocte virentes
733 transtulit in colles olea et loca sola petivit
734 atque omnes secum jussit vigilare ; sed illi,
735 assiduis noctisque dieque laboribus hausti,
736 haud poterant invictum oculis defendere somnum,
737 et gelidi in summo recubantes aequore saxi,

738 infusum toto proflabant ore soporem.
739 Interea curis confectus tristibus heros,
740 caelesti velut oblitus se semine cretum,
741 indignos animo eventus, indigna labanti
742 supplicia atque genus leti versabat acerbum,
743 horrebatque. Id enim matris de corpore traxit,
744 ut quaecumque hominum mortalia pectora terrent,
745 ipse etiam haec eadem mortali corde paveret.
746 Mens immota tamen virtusque invicta manebat.
747 Ergo iterum atque iterum genitorem affatus et ambas
748 ad caelum tendens palmas, hac voce rogabat :
749 "Omnipotens talin" Pater o me funere obire ?
750 Mene aliena malis tantis commissa piare ?
751 Eripe me informi leto et tua flecte severa
752 consilia in melius duosque averte dolores.
753 Si tamen id fixum sedet atque haec certa tibi mens,
754 nec generi humano nati nisi morte sequestra
755 placaris : non fas orbis me deesse saluti.
756 Ibo ultro, crimen generis commune refellam."
757 Dixerat, atque graves curas sub corde premebat,
758 multa agitans. Toto simul ibat corpore sudor
759 proruptus, simul et sanguis vel sanguinis instar.
760 Ecce autem effulgens subito dilapsus ab axe
761 stelligero pictis juxta puer astitit alis,
762 dicta ferens patris in tanto solacia rerum
763 turbine, mulcebatque aegrum curasque levabat,
764 abstergens toto fluidum de corpore rorem.
765 Hortator vero scelerisque inventor Iudas
766 composito interea vocat hostes vertice ab alto,
767 seque ultro comitem atque ducem venientibus offert.
768 Ergo adsunt improvisi, illum in vincla petentes ;
769 longius aera micant tremulai lumine lunae.
770 Jam clypei resonant, jam ferri stridit acumen,
771 pinguiaque exsuperant noctem funalia longo
772 ordine multifidaeque faces, quas unguine supra
773 obduxit manus et ferro inspicavit acuto.
774 Fit strepitus ; vasto circum mons undique pulsu
775 armorum sonat atque virum clamoribus omnis.
776 Quos his nil trepidus compellans vocibus heros :
777 "Heus, inquit, jam state, viri ; quem quaeritis adsum.
778 Quo ferrum flammaeque ? Palam conspectus in urbe
779 conventu cecini magno praecepta Parentis.
780 Cur non una omnes vos tunc tenuistis inermem ?
781 Ista sub obscurum noctis cur agmina cerno ?
782 Quod si me tamen ad mortem deposcitis armis
783 insontem, et vobis adeo obstat gloria nostra,
784 hos sinite illaesos. Nihil hi meruere nec ausi.
785 Tantum dilecti comitis mandata facessunt.
786 Unus ego vestras explebo deditus iras."
787 Haec ait, et bis se quaerentibus obtulit ultro.
788 Illi autem ad vocem toties (mirabile visu)
789 procubuere soloque ingentem fusa dedere
790 arma sonum atque oculis subito nox plurima oborta est.
791 Consurgunt tandem, somno vinoque gravatis
792 assimilés, haerentque obliti, donec Iudas,
793 qui nusquam somno noctu se straverat illa,
794 signa dedit manifesta hostique objecit amicum.
795 Namque pii scelus id praetexens nomine amoris,

796 composuit sese et ficto dedit oscula vultu.
 797 Ille dolum praesensit et haec presso edidit ore :
 798 "Haec vero meruit, comitum fidissime, noster
 799 oscula amor ? Tanton' scelere ulla ad praemia tendis ?
 800 Haud equidem haec tecum pepigi commercia quondam."
 801 Vix ea fatus erat, cum circumfusa juvenus
 802 caeca ruit, densaque omnes indagine cingunt.
 803 Non aliter quam conjectum cum in retia rara
 804 cervum aut fulmineis metuendum dentibus aprum
 805 pastorum circum saevit manus, ilicet hastas
 806 comminus agglomerant certatim, ad sidera voces
 807 undique eunt : reboant montes clamore propinqui.
 808 Sic juvenem obsessum longe fulgentibus armis
 809 saeva cohors premere atque omnes incumbere inermi.
 810 Hi prensare manu, hi stupea vincula collo
 811 injicere, et nunc huc, nunc illuc ducere captum.
 812 Perfurit ante alios et sese turbidus infert
 813 Malchus, Idumaeis missus captivus ab oris.
 814 Nulli ferre manum, nulli contendere suetus :
 815 non ea vis illi, non tanta in pectore virtus.
 816 Verum ut se Caiphae praestantem ostendat in armis,
 817 cui datus haerebat famulus (nam tuta videbat
 818 omnia et audenti nullum hic obstare periculum),
 819 audet, cedentemque ultro petit improbus hostem,
 820 ventosam nequicquam acuens in jurgia linguam,
 821 et vix ille suas tumefactus corde capit spes.
 822 Non tulit hoc praeceps animi Petrus : arripit ensem,
 823 et super incumbens inhonesto vulnere tempus
 824 occupat ac patulam dicto ocius amputat aurem.
 825 Quod Deus aspiciens, subito dextramque tetendit,
 826 decisamque ab humo madido cum pulvere partem
 827 sustulit applicuitque manu medica, unde resecta est,
 828 affixitque loco ; nullo haesit fixa dolore,
 829 ulla nec apparent vestigia vulneris usquam.
 830 Mox socium increpitans, vim dextra arcere volentem
 831 condere tela jubet, vetito neque fidere ferro.
 832 Ni faciat, senior nequicquam magna locuto
 833 strictum ardens illi per costas exigat ensem.
 834 "Non istis opibus, non istis nitimur, inquit,
 835 viribus. Est genitor, qui me si funere acerbo
 836 eripere et fuso nati sine sanguine vellet
 837 placari generi humano, centum agmina posset
 838 caelicolum, mihi centum acies summittere ab arce
 839 siderea, infensum qui coetum hunc ense trucidant.
 840 Militiamne adeo superum pugnataque bella
 841 atque potestates varias et nomina nescis ?
 842 Nunc sine me imperiis magni parere Parentis,
 843 quae me sola premunt. Hominum nil demoror arma."
 844 Talibus auditis senior vix desinit irae
 845 invitus, veluti aspexit si forte magistri
 846 assuetum imperiis cervum media urbe Molossus,
 847 silvestrem ratus insequitur. Vix voce coercet
 848 venator rabido instantem cervicibus ore.
 849 Ergo sponte sua victum nec viribus usum
 850 corripiunt cuncti (heu species indigna !) trahuntque
 851 invalidum et dictis lapsantem immitibus urgent.
 852 Haec, pater omnipotens, superum regnator Olympi
 853 tam lentus cernis nec caelo tartara misces ?

854 Ecquando horrificum dextra jaculabere fulmen,
855 si nunc immoto facies innubila mundo est ?
856 Foedere jam rupto rerum confusa laborent
857 atque repente elementa ruant, ruat arduus aether.
858 Cur tua dextra vacat ? Cur non face terra trisulca
859 jam fumat ? Quos flamma vorax servatur in usus ?
860 Non genus humanum, non tanti regia caeli
861 alitibus supplenda choris, non aurea gens, quae
862 mox hinc se tollet pietate insignis ad astra.
863 Ne nostri tanto te cura incendat amore,
864 jactari ut tali patiaris turbine natum
865 unigenam desertum, inopem atque extrema ferentem.
866 Diffugere metu comites silvisque teguntur,
867 spumiferi ut suis adventu saevique leonis
868 semianimes. Passim insequitur ferus hostis euntes.
869 Aspiceres hunc jam captum, jam veste relicta
870 elapsum manibus rapido petere ardua cursu,
871 illum speluncas et sicubi operta subire
872 per silvam loca, saxorumque in fornice condi.
873 Nec mora, nec requies cursu nemora avia fervent,
874 et vasto intonsi colles clamore resultant.
875 Jamque sacerdotis summi tecta ampla subibant ;
876 protinus huc tota passim concurritur urbe.
877 Primores adsunt procerum poenasque reposcunt,
878 uni infensi omnes, atque illum torva tuentes
879 perterrent vinctumque minis crudelibus urgent.
880 Tum gentis primus Caiphas ita denique fatur :
881 "Res hodie bene gesta, viri. Non artibus ullis
882 infandum evasit caput ; illi nulla supersunt
883 effugia. Instaurandi animi et, quod restat, agendum.
884 Nunc est illa dies, qua gloria maxima sese
885 ostendit nobis. Sed opus properantibus astu.
886 Accipite et linguis omnes animisque favete.
887 Nulli fas nostrum quemquam demittere morti ;
888 Romani ducis arbitrio stat quisque caditve.
889 Quaeramus leti causas et crimina primum,
890 inde ducem instructi verbis adeamus, ut ipse
891 audiat et morti indefensum destinet hostem."
892 Sic ait. Hinc captum alloquitur : "Tunc ille supremi
893 Vera dei soboles, verus deus, aethere ab alto
894 quem vates oriturum orbi cecinere priores ?
895 Per patris obtestor numen qui sidera fulcit,
896 fare age, ne te dissimula quaerentibus ultra,
897 discussisque palam qui sis, nunc nubibus ede,
898 ne te divino ignari fraudemus honore."
899 Dixerat. Ille autem in medio defessus, inermis,
900 conspectu paulum sustollens lumina fatur :
901 "Sum quod ais. Quid me studio tentatis inani,
902 haec eadem toties scitati ? Parcite tectis
903 insidiis victique dolis desistite tandem.
904 Ipse palam fateor. Nec jam mora longior obstat,
905 cum mihi sublimis cedet plaga lucida Olympi
906 regnanda ; aetherea jamjam cernetis in aula
907 amplexum dextram patris omnipotentis, et inde
908 mox iterum terras petere aspicietis eundem
909 fulgentem clara in nebula, quem mille secuti
910 caelicolae auratis impellent aethera pennis."
911 Vix ea dicta, humeris sibi cum de more sacerdos

912 abscindens tunicam inquit : "Eget quid lucis adhuc res
 913 indiciis tot clara ? Palam scelus ipse fatetur.
 914 Nonne, Deo quicumque audet se fingere natum,
 915 fas et jura jubent mulctari funere acerbo ?
 916 Tollite, ferte moras ! Romani ad praesidis aedes
 917 abripite hunc, jubeo, meritasque repositae poenas."
 918 Interea casu Petrus perculsus iniquo
 919 Prosequitur maerens longeque observat amicum.
 920 Jamque sub ingentis devenerat atria templi,
 921 tecta sacerdotis magni, solusque sedebat
 922 tristis, inops animi, ante fores nocturnus apertas.
 923 Olli serva, domus cui curae janua herilis,
 924 id quod erat rata : "Tunc etiam fugis, inquit, et isti
 925 junctus eras scelerum consors, ideoque per umbras
 926 explorator ades, quando omnia nocte quiescunt ?"
 927 Dirigit Petrus ad vocem formidine turpi,
 928 oblitusque sui est (quae vitae tanta cupido ?)
 929 Nec jam scit, subita turbatus imagine rerum,
 930 quid faciat, quo se vertat, quas advocet artis.
 931 Qualis ubi dulci virgo decepta sopore
 932 parvula, quam mater campis ignara reliquit
 933 in solis abeunte die sub tecta revertens,
 934 confestim rupto circumtulit humida somno
 935 lumina, nec comites, nec matrem conspicit usquam,
 936 sed loca sola metu videt exanimata viarumque
 937 immemor atque horrere nigra circum omnia nocte.
 938 Talis erat miser ille animo confusus et haerens.
 939 At cari nomen tandem abjuravit amici,
 940 pro quo sponte neci modo se devoverat ardens.
 941 Quin etiam, quo se tegeter, succedere tecto
 942 hostili tulit et famulis se immiscuit amens.
 943 Nec latuit tamen. Illum omnes inimica tueri
 944 suspectum et latebras verbis urgere foventem,
 945 Terque adeo objectum nomen patriamque magistri
 946 audierat, ficto ter dissimulaverat ore,
 947 cum matutino mediae jam noctis abactae
 948 edebant cantu cristatae signa volucres
 949 auroram in tectis solitae acri voce vocare.
 950 Tum monitus verborum heros quae extrema canebat,
 951 ingemuit rupitque imo suspiria corde,
 952 et penitus duris tristi dolor ossibus arsit.
 953 Tum sese miser incusans turpemque timorem,
 954 erepsit furtim foribus, solusque per urbem
 955 totam illam ingemuit somni sine munere noctem,
 956 menti canitiem demissam in pectora vellens.
 957 Quin illum hanc perhibent mox semper flesse sub horam
 958 admissi memorem dum vixit. Eum aethera pandens
 959 saepe oriens solis, saepe acer vesper in antris
 960 invenit luctu indulgentem eademque querentem,
 961 dum nulla admittit maesto solacia amori.
 962 Deserti subeunt monita usque novissima regis,
 963 ac se perculsum muliebri voce recursat.
 964 Et jam ternpus erat, cum nondum Aurora relato
 965 orta die albentes caeli discriminat oras.
 966 Jamque Deum vinctis manibus post terga trahebant
 967 praesidis ad sedem, quo crimina quaereret ipse,
 968 quem penes arbitrium et morti damnaret acerbae.
 969 Illo Judaeam frenabat tempore missus

970 Caesaris imperio Tiberi Pilatus opimam
 971 Pontius, insigni Romanus origine gentis,
 972 quem furibunda manus trepido est aggressa tumultu
 973 vociferans : "Hunc dede neci ! Trabe fige merentem
 974 infami, auctorem scelerum fraudumque potentem."
 975 Haec crebra ingeminant densique ad limen inundant.
 976 Ille autem juvenis procero in corpore fixos
 977 intentusque oculos intentusque ora tenebat
 978 (nondum illi dulcis flos prorsum evanuit aevi),
 979 insolitam speciem, insolitos miratur honores
 980 oris et expleri nequit. Hunc e stirpe fatetur
 981 aut divum aut saltem magnorum e sanguine regum,
 982 et secum sortem capti miseratur iniquam,
 983 jamque favet tacitusque agitatur, si qua potis illum
 984 impune eripere et ruptis exsolvere vinclis.
 985 Quem sic alloquitur : "Quae te commissa fatigant ?
 986 Fare age, qui casus ? Unde haec effusa repente
 987 tempestas tibi ? Num tantis scelera impia mersum
 988 implicuere malis ? An divum tristior ira ?
 989 Unde domo ? Quo te memoras e sanguine cretum ?
 990 Aut quibus aspiras sceptris ? Quae debita regna ? "
 991 Christus ad haec paucis : "Non huc ego criminis ergo
 992 protrahor. Haud turpi mihi mens obnoxia facto,
 993 sed Patris, immensi caeli cui regia paret,
 994 jussa sequor, nec regna moror mortalia, quamvis
 995 haud equidem clara me regum e stirpe negarim."
 996 Haec tantum. Ille autem admirans decus oris honesti,
 997 nunc hoc, nunc illo sermone affatur et omnem
 998 explorat. Sed responso non amplius heros
 999 dignatur, saevo curarum exercitus aestu.
 1000 Tandem illum dux, ut turbam compescat acerbam,
 1001 servari jubet atque domo interiore recondit.

LIBER TERTIUS.

C_3 v.1 Fama volans jam finitimas impleverat urbes
 2 exceptum insidiis heroa dolisque suorum ;
 3 obscurus tamen atque incerto auctore vagari
 4 rumor adhuc, necdum matris penetrarat ad aures,
 5 cuncta licet numquam illa animo segura timeret
 6 praesago. Nempe audierat vatumque tremenda
 7 terrebant monita, pro libertate piorum
 8 natum sponte sua subiturum funus acerbum.
 9 Ast ubi Josephus senior praesensit (ei olim
 10 alma parens fuerat superum concredita jussis),
 11 Nazaren linquens Solymorum se intulit urbi.
 12 Vix introgressus videt omnia fervere multo
 13 concursu populi sublustri nocte per umbras,
 14 moeniaque ingenti misceri tota tumultu.

15 Ecce autem, elapsus manibus telisque cohortis,
 16 fidus Joannes pallenti tristior ore
 17 occurrit. Sed vix amens agnovit amicum,
 18 dum trepidat, casusque animo ducis haeret acerbus.
 19 Cui senior : "Heus, siste gradum. Quo te rapis ? inquit.
 20 Quo res nostra loco ? Sine te nunc vester ubi dux,
 21 patre Deo satus ? Aut strepitus quis tantus in urbe ?
 22 Hei mihi ! Non fallunt pavidam praesagia matrem."
 23 Sic ait. Illum autem juvenis complexus et haerens
 24 tantum fundebat lacrimas gemitusque ciebat.
 25 Tandem pauca refert : "Nostra, heu, spes occidit omnis
 26 atque absumpta salus dux foede carcere captus
 27 clauditur. Invidia primores urbis in illum
 28 conspirant poenasque graves cum sanguine poscunt.
 29 Fidi omnes petiere fugam terrore subacti.
 30 Mater ubi est ? Miseraene adeo jam nuntius aures
 31 perculit ? Hic utinam tecum nunc afforet ipsa :
 32 Pontius, aspiciens lacrimas gemitusque parentis,
 33 forsitan indigni casus miseresceret ultro.
 34 Ire tamen libet ac pacem veniamque precari,
 35 et populi invidiam atque odium crudele profari."
 36 Sic memorans gressum Syriae rectoris ad aedes
 37 tendit. Ei senior comitem se jungit et ambo
 38 incedunt pariter tristes, ceu forte boves cum
 39 agricola amisit pauper, quos hostis abegit
 40 depopulatus agros, quaesitum protinus illos
 41 longum iter ingreditur ; natorum maximus olli
 42 it comes. Hic illic saepe ambo ignota per arva,
 43 si quos forte suis similes videre vagari,
 44 subsistunt flentes atque avia questibus implent.
 45 Haud illi secus, et jam ventum ad limina tecti,
 46 quod regum quondam fuit antiquissima sedes,
 47 cum res incolumi regno Judaea maneret,
 48 sed tum Romulides orae moderator habebat.
 49 Fervere cuncta vident strepitu patresque sub ipso
 50 vestibulo ante fores dissensu tendere magno,
 51 jamque sacerdotes paulatim cedere ab aula
 52 Romano velut infensos ac dira minantes.
 53 His animum arrecti paulum lenire dolorem
 54 incipiunt, rebusque aliquam sperare salutem,
 55 atque ita Joannes : "Mihi se nonnulla aperit spes.
 56 Solve metum atque virum pro nato affare Deique
 57 dissimula sobolem et causas innecte precandi."
 58 His dictis, pariter succedunt aedibus ambo,
 59 atque ducem senior, qui re suspensus eadem
 60 his super in medio procerum consulta rogabat,
 61 alloquitur genua amplexans supplexque precatur :
 62 "Optime Romulidum, quem clari rector Olympi
 63 justitia voluit Syriam frenare superbam,
 64 parce piis saevumque hominum compesce furorem.
 65 Hinc ratio penitus sublata est ; vi geritur res.
 66 Illi ego sum genitor, quem primi gentis in unum
 67 conjurant omnes et ficto crimine terrent.
 68 Jamque tibi, ut scelere ante omnes immanior unus,
 69 traditus, immeritas quo pendat sanguine poenas.
 70 Illum autem virtus tantum et benefacta per orbem
 71 his mersere malis sua, dum gens effera laudi
 72 invidet eximiae, nec fert surgentis honorem."

73 Talibus orabat ; largo simul imbre rigabant
74 ora senis lacrimae, placido quem Pontius ore
75 accipit atque ambos verbis solatur amicis,
76 depositumque senem molli locat ipse sedili
77 atque haec deinde refert : "Ut vos hic tempore adestis
78 optati ! Nec enim forsitan venisse pigebit.
79 Tu modo vera mihi scitanti edissere pauca
80 nunc, pater, haud veritus ; fidei te credere fas est
81 omne meae. Caelum et caeli vaga sidera testor,
82 sollicito mihi cura tui est nunc maxima nati,
83 quem tibi mente agito incolumem servare, furoremque
84 et rabiem, ut potui, compressi gentis iniquae.
85 Fare age (namque mihi haud nunc primum venit ad aures)
86 quae fortuna viro, unde domo, quo sanguine cretus.
87 Ede tuum matrisque genus ; non ille creatus
88 stirpe humili, mihi si verum mens augurat. Ut se
89 incessu gerit ! Ut vultuque et corpore toto est
90 humana major species ! Ut lumina honorum
91 plena ! Ut regifici motus ! Verba inde notavi,
92 nil mortale sonat. Sensi illo in pectore numen.
93 Aut certe deus ille aut non mortalibus ortus.
94 Dicite vos ; nam me scitantem avertitur ipse
95 et vix responso tacitus solatur amicum,
96 contemptorque illi est animus lucisque meique."
97 His dictis, senior paulisper substitit anceps,
98 sene ultra tegeter quaerenti, an proderet illi
99 et divi genus et verum sine fraude parentem.
100 Cum breviter comes admotus sic fatur ad aurem :
101 "Regia progenies, nymphae dignate superbo
102 conjugio, quid adhuc haeres ? Absiste vereri.
103 Omnia sublatis aperi jam nubibus ultro.
104 Pone metus et rumpe moras ; video omnia tuta."
105 Dixerat. Ille igitur missa formidine coepit :
106 "Dicam equidem nec, dux, tibi magna arcana silebo.
107 Sed quando genus insedit cognoscere nostrum,
108 id primum, neque te suspensum ambage tenebo.
109 Quamvis res inopes opera ad fabrilia versum
110 exercent, tamen est mihi regum a stirpe propago,
111 admotumque genus superis clarique parentes.
112 Principio innumerae pater Abras gentis et auctor
113 maximus ille tuas non, ut reor, effugit aures,
114 qui generi legesque tulit moremque sacrorum.
115 Isacon hic dedit ; Isacides Jacobus ab illo,
116 bis senos qui mox proceres genuit, quibus omnis
117 nostra domos in bis senas gens secta tribusque est.
118 Hos inter pietate olim quam major Iudas,
119 tam sese sobole egregia super extulit omnes,
120 Judaeamque suo dixit de nomine terram.
121 Hinc (licet in medio series longissima patrum)
122 Davides ortus, regum pater, unde meorum
123 per bis septem exit genus actum ab origine reges.
124 Verum longe aliud juveni genus. Ille parentes
125 quamvis mortales mortalibus editus oris
126 dignatur, tamen est divo caelestis origo,
127 estque Deo genitore satus gaudetque parente,
128 cui mare velivolum, cui tellus paret et aether.
129 Illum autem aereas in luminis edidit auras
130 numquam mixta viro mulier, foetaeque remansit

131 Virginitas, olim ut vates cecinere futurum.
132 Nam pater omnipotens fecunda desuper aura
133 afflatam implevit ; tumuit divinitus alvus.
134 Quod vero genitor vulgo sum creditus ipse,
135 haud ita res, mihique alma parens accredita tantum,
136 qui cum animi posset curas durumque laborem
137 partiri ; mox me famae niveoque pudori
138 permetuens, eadem dignata est nomine veri
139 conjugis immeritum, nec tali munere dignum.
140 Haec erat (ut revocans rem cunctam ab origine pandam
141 Judaeas inter virgo pulcherrima nymphas,
142 centum optata procis (Mariam dixere) parentum
143 unica progenies urbe edita Nazaraea.
144 Ipsa autem aeterno prae virginitatis amore
145 oderat et thalamos et se sacra verat aris.
146 Anna tamen grandaeva parens, haud nescia vatum
147 plenaque venturi, e gnata praeviderat olim
148 egregiam factis sobolem regemque futurum,
149 qui populos magnos magna dicione teneret ;
150 id caelo fixum esse, pios id prodere vates.
151 Saepe illam in somnis monuit vox missa per auras
152 jungere connubio natam generosque vocare ;
153 jamque erat apta viro, jam nubilis. Hactenus autem
154 distulerant superum monitis parere parentes,
155 cum media, ecce iterum sublimes luce per auras
156 vox audita : "Viro properate o jungere natam,
157 nec generi longe optandi ; de sanguine vestro
158 quaerantur de more. Omnis mora segnis abesto."
159 "Continuo parvam vulgatur fama per urbem.
160 Tum consanguinei pulchrae spe conjugis omnes
161 conveniunt juvenes ; complentur virginis aedes.
162 Ipse etiam patri consanguinitate propinquus
163 accessi, quamvis aevi maturus, ut ipsi
164 aequaevae natae ob thalamos gratarer amico.
165 Stabant innumeri, forma atque aetatibus aequis
166 florentes, caelum cui munera tanta pararet
167 incerti, et sortem sibi quisque optabat amicam.
168 Dum spes ambiguae, dum turba ignara futuri,
169 in secreta domus omnes evasimus altae
170 tecta, ubi Joachides numen placare solebat
171 virginis ore pater. Fuit ara veterrima, nostrae
172 quam gentis primi posuere metuque sacratam ;
173 ter centum totos atavi coluere per annos.
174 Hanc humiles circum et prostrati fundimur omnes,
175 orantes pacem superos superumque parentem,
176 det signum caelo placidus quem poscat ab alto.
177 In medio astabat lacrimans pulcherrima virgo,
178 flarentis effusa comas demissaque largo
179 rorantes oculos fletu. Pudor ora pererrans
180 cana, rosis veluti miscebat lilia rubris.
181 Qualis, virgineos ubi lavit in aequore vultus,
182 luna recens stellis late comitantibus orta,
183 ingreditur gracili caeli per caerula cornu,
184 talis erat virgo, juvenum stipata corona,
185 multa deum verbis testata deque ministros
186 aligeros non sponte sua haec ad munera flecti.
187 Hortatur pavidam pater et lacrimantia tergit
188 lumina, jussa docens Superum, simul oscula libat.

189 Ecce autem, ut praesens aderat quoque pronuba, coetu
 190 in medio Anna parens, subito correpta furore,
 191 plena Deo tota (visu venerabile) in aede
 192 bacchatur tollitque ingentem caelo ululatum.
 193 Unum in me conversa oculos, me fertur in unum,
 194 nil minus hoc ducentem animo, nil tale verentem,
 195 corripuensque manu : "Solus tu posceris, inquit,
 196 annuit hoc uni superum tibi connubium rex."
 197 Obstupuere omnes, nec tunc ex agmine tanto
 198 exsortem quisquam seniori invidit honorem.
 199 Ipse, aevi quod eram seris minus integer annis,
 200 multa recusabam, multa huc venisse pigebat.
 201 Aequales aderant fidi, simul et renuentem
 202 hortari atque animum mihi blandis addere dictis.
 203 Cedo igitur victus tandemque uxorius illam
 204 accedo et lacrimans lacrimantem ad limina duco.
 205 Et jam nox aderat stellis fulgentibus apta,
 206 suffundens umbras mundo nigrantibus alis.
 207 Secretis thalamis pariter succedimus ambo.
 208 Flebat sponsa ; solum lacrimis juxta omne madebat,
 209 ac veluti, cum vere subest uberrimus humor
 210 arboribus, lentae vitis si forte cacumen
 211 falce putans stirpem feriat male providus unca
 212 agricola, immeritam et violarit vulnere matrem.
 213 Ipse aderam et dictis solabar mitibus aegram,
 214 virginis haud cupidus primum decerpere florem.
 215 Cum sic longa trahens suspiria pectore ab imo est
 216 orsa loqui : "Non religio mihi vana suasit
 217 et thalamos odisse et virginitatis amorem
 218 aeternum colere. Intus agit vis aetheris intus,
 219 longaeavam responsa licet contraria matrem
 220 sollicitent vatunqum minae, sunt et mea contra
 221 vatunqum jussa mihi, nulli succumbere labi,
 222 nullis virgineam taedis summittere mentem.
 223 Ante retro primos properet revolutus ad ortus
 224 Jordanis, sistantque suos vaga sidera cursus."
 225 Haec ait, inque genas stillantes undique honestae
 226 ex oculis simul incipiunt turgescere gemmae.
 227 "Nec mora, deinde mihi insinuans quatit ima repente
 228 ossa timor, genua aegra labant ; nox plurima oborta
 229 ante oculos. Ter sum conatus pauca profari,
 230 ter frustrata sono lingua est, nec verba secuta.
 231 Tum quoque vox audita : "Toro thalamisque paratis
 232 parce ; tamen concessa tibi connubia serva."
 233 Exsurgo, atque oculos jamdudum in virgine fixus
 234 horrenda, tali sum tandem voce locutus :
 235 "Quis mihi te virgo invito conjunxit Olympo ?
 236 Quis tantis (non hos equidem quaesivi hymenaeos)
 237 immeritum implicuit monstribus ? Haud talia quondam
 238 praedixit puero genitor ludibria vates,
 239 jam senior vates idem templique sacerdos.
 240 Ille quidem aut nullos thalamos, mihi nulla manere
 241 connubia, aut certe clarum fore me inde canebat.
 242 Verum age, quae menti surgat sententia pandam,
 243 quandoquidem superi mihi te junxere, sed idem
 244 absterrent monstribus, licet et mox usque licebit
 245 virgineum serves intacto corpore florem.
 246 Haud tamen ipse ausim injussus dissolvere sacri

247 connubii vincla ista. Domo degemus eadem,
 248 ipse tibi ut genitor, mihi tu ceu filia semper,
 249 teque adeo casus jam nunc complector in omnes.
 250 Hoc tua religio velit, hoc mea serior aetas."
 251 Annuit his aliaque domus in parte puella
 252 secubuit. Mitto totam quae monstra per illam
 253 sum passus, quam mira horrens insomnia noctem.
 254 Jamque dies pulsus tenebris invecata rubebat,
 255 et face sol rosea nigras disjecerat umbras.
 256 Corripio e stratis artus sponsamque reviso.
 257 Vix thalami impuleram bipatentis cardine portas,
 258 cum lux ecce oculis ingens offusa repente ;
 259 collucent summi radiis laquearia tecti,
 260 collucentque trabes, visumque ardere cubile.
 261 Ipsa autem thalami in medio sedet aurea virgo
 262 attonitae similis, nec enim me multa rogantem
 263 dignatur. Nihil illa meo sermone movetur.
 264 Tantum fixa oculos caelo palmasque tenebat
 265 aut stellae similis aut puniceae aurorae.
 266 O illa a solita quantum mutata figura !
 267 Quantus honos oculis, quantus decor additus ori !
 268 Haud aliter quam, cum simulacrum excidit acernum
 269 artificis manus e silvis in sede locandum
 270 sacrata, quod plebs dehinc supplex omnis adoret,
 271 si, postquam effigiem poliens trunco extudit arte,
 272 extremum super imposito decus induat auro.
 273 Immotam penitus circumdat lucida nubes
 274 solis inardescens radiis, stellaeque videntur
 275 lucentes capiti circum aurea tempora pasci ;
 276 sub pedibusque deae lumen dare candida luna.
 277 Pertimui, et mira stupefactus imagine rerum
 278 talia voce dabam : "Pater, his o me exue monstris,
 279 omnipotens. Non haec superi sine numine vestro.
 280 Vestra haec portenta agnosco manifesta que signa.
 281 Aspirate animo placidi dubiumque monete
 282 quid sequar aut quaenam vobis sententia constet."
 283 Tantum effatus eram. Tandem pulcherrima virgo
 284 ad sese redit, abrupto velut excita somno
 285 suspirans, lacrimisque sinus humectat obortis.
 286 Accedo atque rogo nova per connubia supplex
 287 atque illum aeternae per virginitatis amorem,
 288 unum quem niveo colit intemerata pudore,
 289 admittat socium curarum et magna recludat
 290 rerum arcana, nihil metuens, mihique omnia credat.
 291 Illa solo vultum atque oculos dejecta nitentes,
 292 rore velut demissa caput rosa matutino,
 293 cunctatur ; demum incipiens sic ora resolvit :
 294 "Dicam equidem pater. Haud patiar te nostra latere
 295 gaudia. Sed quae nunc aut unde exordia sumam ?
 296 Nam quis narranti rerum miracula credat
 297 tantarum ? Per ego has lacrimas quas excutit ingens
 298 laetitia, obtestor, quae fabor, pectore condas,
 299 ne prius incipiant in vanum serpere vulgus
 300 quam deus ipse aliis vulgaverit omnia signis.
 301 Jam monitrix operum stellas Aurora fugarat,
 302 et sol pallentes lustrabat lampade terras.
 303 Ipsa revolvebam vatum monumenta priorum,
 304 dicta animo recolens. Sed prae tunc omnibus unum

305 forte mihi ante oculos (neque enim sine numine certo
 306 oblatum reor) immotum fixumve manebat,
 307 quod cuncti pariter super omnia praedixere
 308 affore, concubitu nullo cum regia virgo,
 309 impatiens exsorsque viri (mirabile dictu),
 310 caelicolum regem sub luminis ederet auras.
 311 Cujus in adventu laetentur cuncta per orbem
 312 protinus et toto surgat gens aurea mundo.
 313 Illam felicem tacite mecum ipse vocabam
 314 quam Pater omnipotens tanto cumularet honore,
 315 jamque Dei matrem venerabar mente futuram,
 316 infantique Deo, si forte his ille diebus,
 317 his si forte oris nascatur, dona parabam.
 318 Talia dum mecum eventus ignara voluto,
 319 ecce mihi nova lux oculis oblata repente,
 320 suspicio : liquidas sine nube remetior auras.
 321 (Mira loquar) video medium discedere caelum
 322 pennatasque acies populos felicis Olympi
 323 exsultare polo superumque applaudere regi.
 324 Non obstant clausi postes, non pariete tectum
 325 marmoreo circumsaeptum. Video ignea caeli
 326 sidera sidereosque globos superum aurea tecta.
 327 Tum mihi se puer ante oculos allapsus Olympo
 328 ora deo propior radiantibus obtulit alis,
 329 et placidus tendens candentia lilia dextra,
 330 me sic affari laetasque expromere voces :
 331 "O una ante alias caelo acceptissima matres,
 332 magnus adest tibi praesenti regnator Olympi
 333 numine. Tu nuribus felix magis omnibus una."
 334 Hic mihi vix paucis auditis talibus ingens
 335 miranti gelidos subito tremor alligat artus.
 336 Tum sic ille animum divino pignore firmat :
 337 "Parce metu, virgo. Placuisti ex omnibus una
 338 caelituum regi, faciat quam prole parentem.
 339 Er jam concipies puerum gravis ; ille erit ingens,
 340 progeniemque Patris summi saecla omnia dicent.
 341 Et quoniam multis olim feret ipse salutem
 342 servabitque pios, patrio dic nomine "Jesum",
 343 sedibus infernis jam nunc lacrimabile nomen.
 344 Supra homines, supra aspicias se tollere et ipsos
 345 caelicolas fama insignem ac praestantibus ausis.
 346 Nam Pater omnipotens atavorum in sceptris reponet
 347 pristina regnantem late, regumque sedebit
 348 in solio, neque enim metas neque tempora regni
 349 accipiet : toto aeternum dominabitur orbe".
 350 Dixerat. Ipsa autem paulatim abeunte timore
 351 subjicio : "Sed qua vero ratione, quod inquis,
 352 confieri poterit ? Nam mens mihi denique fixa
 353 atque immota manet numquam violare pudorem
 354 virgineum semperque virum commercia fugi"
 355 his ego finieram paucis, his ille secutus :
 356 "Te superum pater afflabit caelestibus auris
 357 desuper, afflatu quo solo plena sine ullo
 358 concubitu, exacto gravis edes tempore partum,
 359 atque ideo, quem feta dabis, deus ille feretur
 360 aeterno genitore satus, qui temperat orbem.
 361 Quae, ne vana putes, scis quae tibi sanguine juncta est
 362 Elisabe sobolis, ut degerit hactenus exsors,

363 ut sterili sedis jamdudum effeta senectus
 364 spem cunctam abstulerit partus prolisque creandae,
 365 plena viro pariet tamen illa, et tempore luna
 366 perfecto gravidae jam sextum circuit orbem.
 367 Cuncta potest etenim qui me tibi mittit ab alto
 368 aethere, siderei rex idem atque auctor Olympi."
 369 Haec ait, et paribus se in caelum proripit alis.
 370 Quem super aspiciens tali sum voce secuta :
 371 "Quisquis es, o caeli juvenum pulcherrime, praepes
 372 obsequor ac votis, quod rex jubet, omnibus opto."
 373 Interea nubes maculoso discolor auro
 374 demissa ad terram croceis me amplectitur alis ;
 375 diffulgent intus radiique ignique coruscae
 376 scintillant veluti squamae vario ordine circum,
 377 squamaeque stellaeque auri fulgore micantes,
 378 adverso quales imitantur sole colores,
 379 cum picturato caelum distinxit amictu
 380 nubicolor liquidis effusis imbris arcus.
 381 Hanc simul omnipotens Genitor perflavit ab alto,
 382 continuo ruit ecce voluta liquentibus astris
 383 aura potens, quaque illa venit, procul undique circum
 384 scintillae absiliunt radiis vibrantibus aureae.
 385 Turbine corripior rapido, visque illa per omnes
 386 aurai, vis omnipotens mihi diditur artus,
 387 aethereusque vigor toto se corpore miscet,
 388 visaque praedulci mihi corda liquescere amore.
 389 Qualis secreto naturae foedere tellus
 390 concipit et vario clam fetu plena gravescit,
 391 matris ubi in gremium descendit plurimus aether,
 392 auraque fecundos afflavit verna tepores.
 393 His actis clarum sonuere per aethera coetus
 394 aligeri cantu vario plausumque dedere.
 395 Hinc tonitru ingenti tremuerunt ardua Olympi,
 396 crebraque per caelum hic illic rima ignea fulsit."
 397 Talia narrabat virgo ; simul ora rigabat
 398 laetitia illacrimans. Tum tendo ad sidera palmas,
 399 multa orans animi ambiguus. Nec credere quibam
 400 (mens adeo mihi laeva fuit) tam mira ferenti,
 401 quandoquidem juvenes plerumque innectere fraudes
 402 virginibus soliti incautis et fallere furto,
 403 ah ! Faciles dictis aurem praebere puellas.
 404 Quin etiam hanc volvi (scelus) olim linquere demens
 405 verum eadem in somnis pueri redeuntis imago
 406 visa mihi vultusque habitusque simillimus illi,
 407 ipsa sibi modo quem memorabat sponsa locutum.
 408 Nudus erat roseos humeros ; tantum aureo laevo
 409 pendebat demissa chlamys quam fibula subter,
 410 ilia tergemino mordebat rasilis auro ;
 411 rubraque compactis pendebant cingula bullis,
 412 molles a tergo tractim succrescere plumae,
 413 ac sensim geminas humeris assurgere in alas.
 414 Tum suras gemmis inclusit, cetera nudus.
 415 Oris multus honos gratique in corpore motus
 416 haud nostri puerum generis testantur adesse,
 417 sed caeli sobolem atque aulae stellantis alumnum.
 418 Nec minus ipsa etiam mira spectabilis arte
 419 vestis erat baccis superas illusa per oras.
 420 Textile Maeandro duplici infra circuit aurum

421 admirabile opus. Tres hic impune per ignes
 422 laeti ibant pueri intexti pariterque canebant
 423 caelicolum regi conversi ad sidera laudes.
 424 Cernere erat mediis acres fornacibus ignes
 425 parcere corporibus longaeque absistere flammis.
 426 Mirabar tacitus, cum sic pulcherrimus ore
 427 affatur trepidum juvenis : "Sate sanguine regum,
 428 quod tantum irrepsit menti scelus ? Omnia non te
 429 signa movent haud haec fieri sine numine certo ?
 430 Ne dubita, nam vera canit sanctissima virgo.
 431 Jam nunc congressus numquam perpessa viriles
 432 concepit, gravis aetherea divinitus aura,
 433 nam Pater omnipotens caelesti afflavit ab arce
 434 atque uterum implevit dilapsum numen ab astris.
 435 Casta fides nobis colitur. Desiste vereri.
 436 Haec vates olim vestri cecinere futura,
 437 cuncta sed obscura implicuere ambage tegentes.
 438 Namque haec illa quidem caeli in penetralibus altis
 439 porta ingens, clausa aeternum, nec pervia gressu
 440 ulli hominum : tantum omnipotens Deus ipse per illam
 441 itque reditque viam, nec claustra immota resignat.
 442 Hanc tibi commendat summi regnator Olympi,
 443 conjugio adjungens stabili ; sed conjugis usum
 444 effuge. Securum tecum sponsa exigit aevum,
 445 quamvis tuta Deo jam nunc sit praeside virgo."
 446 Sic fatus, subito in tenues evanuit auras,
 447 pernici liquida arva fuga per nubila carpens,
 448 et simul incussit mihi blandum in pectus amorem,
 449 utque rigor ferri rutilo lentescit in igne,
 450 sic mihi cor rapido sensu mollescere motu.
 451 Consurgo et veniam conversus ad aethera posco,
 452 meque ipsum incuso amens et lux reddita menti.
 453 Inque dies magis atque magis caeli alta patescunt
 454 consilia, antiquis quae vatibus omnia quondam
 455 obscuris vera involvens deus ostendebat.
 456 Haec virgo est rubus ille, procul quem in monte videbat
 457 ardentem vates igni crepitante cremari
 458 corniger, attactu cum nullo innoxia flamma
 459 lamberet et frondes illaesae in stirpe virerent.
 460 Haec eadem niveae quondam impenetrabile lanae
 461 nimbis vellus erat, cum late cuncta maderent
 462 imbris effusis circum, tellusque nataret
 463 humida, ni veterum vana est prudentia vatium.
 464 Haec mecum et toto penitus nox pectore abacta est.
 465 Haud mora, prodigiis tantis facit ipsa fidem res.
 466 Jam diffusa canit Galilaea per oppida fama
 467 inventam (portentum ingens) in montibus altis
 468 nuper anum, quae suprema jam affecta senecta
 469 plena viro attulerit sobolis spem, cum tamen acta
 470 infecunda illi fuerit sterilisque juvena.
 471 Tum mihi sponsa : "Puer caeli demissus ab oris
 472 hoc, inquit, mihi praedixit, nam cuncta recordor.
 473 Haec anus est, haec Elisabe mihi sanguine juncta,
 474 cui sextum luna gravidae jam circuit orbem."
 475 Nec plura. Extemplo placet ire et stirpe propinquam
 476 visere anum, gradimurque ambo super alta locorum,
 477 tectaque Zacchariae petimus procul ardua vatis.
 478 Vix primum attigeram limen (mirabile dictu)

479 occurrit tremebunda anus, intrantique puellae
480 optatos dedit amplexus. Deus amplexantem
481 invasit, subitusque sub ossa repente cucurrit
482 ima calor, talesque dedit venerata loquelas :
483 "Longe una ante alias tu fortunata parentes
484 tuque uterique tui, virgo sanctissima, pondus.
485 Unde repente mihi tanta indulgentia caeli ?
486 Unde haec affulsit serae tam clara senectae
487 tempestas ? Fas ecce Dei vidisse patentem,
488 et coram affari lectam de millibus unam
489 dignantem has sedes meaque ultro in tecta profectam.
490 Nam mihi (vix primum attigeras haec limina) pectus
491 emicuit, saliensque utero signum edidit infans.
492 Felix diva parens superum gratissima regi,
493 sincera spectata fide, quae credere veris,
494 dum tua nondum animo praesagis gaudia, dictis
495 haud vetita es. Promissa manent pueri alitis ecce
496 certa tibi. Jam nunc ades, orbisque aspice casus,
497 o caeli regina, hominum miserata labores."
498 Dixerat, at teneri qualis rosa plena pudoris,
499 haud animis elata tumentibus aurea virgo
500 caelicolum regi laudes laetata canebat,
501 quod se tam prope sidereo aspexisset Olympo
502 indignam bonus atque humilem, nil tale merentem,
503 exsultansque suos sibi vaticinatur honores
504 promissos atavis priscisque parentibus olim.
505 "Ex illo quanta immensum portenta per orbem
506 terruerint hominum mentes praesagaque signa,
507 limina dum vitae omnipotens attingeret infans,
508 longa renarrare est mora. Jam tunc Caspia regna
509 responsis vatium horrebant, Jam Nilus et omnis
510 Aegyptus trepidare, omnes orientis et urbes.
511 Vestri etiam audierant (si vera est fama) per oras
512 Ausonias jamjam venturum lucis ad auras
513 invictum regem, cui passim cederet orbis
514 regnandus, qui se patria virtute potentem
515 seque suumque genus sublimi inferret Olympo.
516 His tandem certus signis ego numinis instar
517 plenam utero supplex sponsam venerabar, et ultro
518 parebam. Victum gravidae et divina ferebat
519 pocula de caelo volucer puer. Illum ego saepe
520 intrantem thalamum manifesto in lumine vidi.
521 Jamque optanti animo divini tempora partus
522 exspectabam ardens, sed spem mora iniqua trahebat,
523 et saepe haec cupido repetebam pectore mecum :
524 "Si modo, si mihi caelestis se ostendere coram
525 non fugiat puer ante obitus, quando omnia de se
526 rettulit ipsa mihi virgo pulcherrima vera.
527 Purpureos flores metite et candentia plena
528 lilia ferte manu, venienti ad limina lucis
529 dona parate Deo puerumque invisite regem.
530 O mihi si quoque tam longe suprema senectae
531 pars maneat, quantum valeam tua cernere facta,
532 sancte puer, cum sublata formidine mundum
533 pacabis, patrioque Deus regnabis Olympo.
534 Tum pax alma colet terras pietasque fidesque,
535 quaeque labat nunc religio atque resurgere ubique
536 justitiam in melius versus mirabitur orbis.

537 Tum ferus in falces curvas conflabitur ensis,
538 aureaque incipient mundo succedere saecula."
539 Sic ego saepe moras mecum lenire solebam,
540 et magis usque animo mihi spes accensa vigebat.
541 Forte recognoscens populos numerare jubebat
542 Augustus Caesar, rerum cui summa potestas.
543 Ipse igitur veteris repetebam moenia Bethles,
544 unde genus duco, quo me quoque civibus urbis
545 insererem nomenque meum nomenque meorum.
546 Sponsa sequebatur Nazarae ab sede profecta.
547 Vix patriae intraram muros et rara domorum
548 tecta, soporiferis cum nox caelum abstulit umbris.
549 Est sedes deserta humilem ingredientibus urbem
550 horrenti culmoque et carice tecta palustri,
551 agricolis olim statio gratissima, si quos
552 rure procul patrio nox deprendisset in urbe :
553 namque aliis procul a tectis summota recedit.
554 Huc igitur fessi pariter succedimus ambo
555 seu casu, seu sic rector sortitus Olympi,
556 ut potius reor et potius fas credere duco.
557 Natum etenim non solum extrema per omnia vitam
558 ducere et in terris indignos volvere casus,
559 verum etiam tecto voluit sub paupere eundem
560 nasci humilique domo miserabilem et omnium egenum.
561 Principio in stabulis pandum ad praeseptia sisto
562 quadrupedem auxiliumque viae onerumque levamen,
563 quem juxta in stipulis sese locat incluta virgo,
564 quippe alia interior domus ulla haud parte vacabat.
565 Bos erat a laeva, tepidum flans ore vaporem,
566 quem pauper campis luce exercebat arator,
567 pauca soli curvo suspendens jugera aratro,
568 nec sera nisi nocte domum repetebat ab agro
569 conducto, vitam ut posset tolerare labore
570 ipse suo atque famem parvis avertere natis.
571 Et jam nox medium spatium confecerat horis,
572 cum mihi, qui saxo haerebam jam lumina victus,
573 somnus abit, neque enim mersum tunc me altus habebat
574 Ecce oculos fulgore novo lux occupat ingens.
575 Diffulgent intus late magalia, quaeque
576 stramina taetra modo horrebant, nunc aurea cernas.
577 Exsurgo. Aspicio juxta praeseptia nudum
578 infantem radiis illustrem ac luce coruscum,
579 quem virgo tenerum in duris modo pauper avenis
580 ediderat nullo nixu, nullo aegra dolore.
581 Astabant taciti bos hinc, hinc tardus asellus,
582 pabulaque obliti pariter capita alta tenebant.
583 Ipsa etiam radiis fulgebat mater utroque
584 poplite subsidens, oculos demissa nitentes.
585 Ah, nudum lacrimis parvum spectabat abortis,
586 tendebatque manus suffuso lumine junctas.
587 Astrorum qualis facies rorantibus umbris
588 post imbrem, siccis Boreas ubi frigidus alis
589 ingruit ac caelum populans cava nubila differt,
590 talis virgineo species accesserat ori.
591 Quid facerem ? Partem subjeci ambobus amictus
592 ipse mei atque olidae substravi terga bidentis
593 pro picturatis cunis, pro murice et auro.
594 Cetera pauperies noxque intempesta vetabant.

595 Necdum clara dies merso diluxerat orbi ;
 596 jam conferto aderant pastores agmine, et antri
 597 floribus ac variis auxerunt limina sertis,
 598 rustica multifori fundentes sibila canna.
 599 Ut stabula ingressi, ad praesepia lumina vertunt
 600 summissi terramque petunt, et numen adorant.
 601 Mirabar mecum tacitus, fama unde per agros
 602 haec subito exisset deque ipsis quaerere coepi.
 603 Unus quaerentem sic est affarier orsus :
 604 "Pastores sumus ; in vicinis saltibus omnes
 605 pascimus. Insomnem ut nobis mos ducere noctis
 606 haud partem exiguam atque gregem servare coactum,
 607 nocte fere media vigilantibus astitit ingens
 608 lux cunctis supra caput, attonitisque pavore
 609 ingenti talis vox est audita per auras :
 610 "Ne trepidate, viri, vobis nova gaudia porto.
 611 Ille piis toties promissus vatibus olim
 612 finibus his hodie natus deus. Eximet ille
 613 e tenebris hominum genus atque in pristina reddet.
 614 Illum vicina fas vobis cernere in urbe
 615 effultum stipula atque humile ad praesepe jacentem."
 616 His moniti vicinam oculos torquemus ad urbem.
 617 Ecce autem volucer pictis exercitus alis
 618 caelestes supra pueri toto aethere visi
 619 nubibus impositi liquidas equitare per oras
 620 et mirum in morem celeri proludere coetu.
 621 Atque ubi ter caelum ternis toto agmine versi
 622 lustravere choris, ter lustravere choreis,
 623 concentu petiere polum. Longe ardua Olympi
 624 responsant ; laetis dissultat plausibus aether."
 625 "Talia narrabant, nec sese explere corusci
 626 infantis facie poterant, fixique manebant
 627 haerentes oculis, haerentes pectore toto.
 628 Fulgebat puer ore, oculis ac corpore ab omni
 629 divino longe circum loca lumine complens,
 630 qualis puniceo se pandens ore, rosarum
 631 cum primum dias flos visit luminis oras,
 632 aut ubi sole novo roseis orientis in oris
 633 enituit verni species patefacta diei.
 634 Nos vero interea, quamquam indubitabile numen
 635 novimus atque Deum, nec opis nec lactis egentem,
 636 parvum alimus tamen, ut mortali semine cretum ;
 637 ubera siccantem matris tenerumque fovemus
 638 invalidumque artus. Mortalem quippe creatus
 639 mortali matris traxit de corpore partem.
 640 Atque ideo, ut veterum mos est antiquus avorum,
 641 imprimimus generis signum, Samiaque putamus
 642 exiguam testa pellem genitalia circum ;
 643 addimus et nomen, memoresque vocamus Iesum,
 644 ut quondam admonuit puer actus ab aethere praepes.
 645 Idem etiam, quod sit regum de stirpe sacerdos,
 646 gentibus est Graio dictus de nomine Christus.
 647 Quin etiam, quamvis nullo intemerata remansit
 648 concubitu mater, tamen intra tecta morata est,
 649 usque quater denos dum solis cerneret ortus.
 650 Tum demum sacram Solymorum advenimus urbem
 651 cum puero, quo se lustraret regia virgo,
 652 torquatasque arae attulimus de more columbas.

653 Stabat sacra ferens altaria ad ipsa sacerdos
 654 succinctus lino albenti capitisque bicorni
 655 tegmine, pervigilem adservans penetralibus ignem.
 656 Hunc circum ante aram natorum intonsa corona
 657 fundebant pateris vituli, ut tunc forte, cruorem,
 658 quem pater, ut sontis populi commissa piaret,
 659 mactarat superum regi veniamque precatus
 660 suppliciter solitos aris adolebat honores.
 661 Circumfusi aderant primores gentis et omnes
 662 tempora tangebant dextris vittata juvenci.
 663 Jamque levi fusum delibans ille cruorem
 664 terque quaterque sacram digito irroraverat aram,
 665 araeque impositam flammam, et septem ordine lychnos,
 666 linteaque ampla, quibus sacrorum arcana teguntur.
 667 Et jam finis erat sacris, fessusque sacerdos
 668 cum gnatis dapibus sese accingebat opimis.
 669 Tunc humili gressu virgo procedit ad aram,
 670 infantem laeva gestans dextraque volucres.
 671 Quid memorem quae signa polo Pater edidit alto
 672 testatus veram sobolem ? Quantum ipse sacerdos
 673 horruerit pueri aspectu ? Quam mira repente
 674 ignibus insolitis lux circumfulserit aram ?
 675 Ter tura accensos venerans conjecit in ignes ;
 676 ter subjecta tholo subito ingens flamma reluxit.
 677 Ille tamen collo patrio de more volucres
 678 immolat intorto, atque effundens rite cruorem ;
 679 porricit et plumas et aperti gutturis exta,
 680 solis ab occasu nitidos conversus ad ortus,
 681 diffringitque alas ; tum sacros suggerit ignes
 682 visceribus. Grato vapor it super aethera fumo,
 683 araque Panchaeos flagrans exhalat odores.
 684 Ecce hominum subito turbantur pectora casu.
 685 Nomen avi Simeon referens erat obsitus annis,
 686 quo nemo tota urbe fuit servantior aequi.
 687 Huic, ut erat longe venturi praescius, olim
 688 aetherae vis omnipotens promiserat aurae
 689 visurum sese ante Deum auctoremque salutis
 690 exspectatum orbi, quam lucis linqueret auras.
 691 Jamque erat hunc vitae pertaesum aegerque senectae
 692 optabat duros leto finite labores ;
 693 sed spes illa animo cupido usque infixam manebat.
 694 Ergo ubi adesse Deum praesensit numine plenus,
 695 qualis ubi gressum per agros comitatus herilem
 696 forte canis leporem vi longe sensit odora,
 697 continuo intenditque aures atque aera captat
 698 naribus, et coeptum rumpens iter avius errat
 699 atque oculis incerta ferae vestigia lustrans,
 700 nunc hos, nunc illos cursus fert atque recursus
 701 incertus ; longe latratibus arva resultant.
 702 Talis erat senis in templo exsultantis imago.
 703 Tum puerum tremulis correptum amplectitur ulnis
 704 atque arte premit. Hinc lacrimis ita fatur obortis :
 705 "Macte, infans, virtute, Dei indubitata propago,
 706 mundi opifer, qui nostra venis veterumque parentum
 707 sponte admissa tui largo lavere amne cruoris
 708 et liquidas aperire vias ad sidera caeli.
 709 Exoptatus ades, nec me tua maxima fallunt,
 710 summe Pater, promissa. Mori me denique fas est.

711 Nunc o me nunc ad requiem finemque laborum
712 corporis exutum vinclis dimittis, ut olim
713 pollicitus : jam viderunt mea lumina quem tu
714 auxilium mundo misisti, ut gentibus esset
715 in tenebris lux, Isacidos nova gloria prolis."
716 His dictis, matrem versus mox fatur ad ipsam :
717 "O cui te forma assimilem ? Cui laudibus aequem ?
718 Quasve tibi referam grates, quae sola salutem
719 felici peperisti utero mortalibus aegris ?
720 Quamquam etiam exitio multis hunc affore partum,
721 et tempus fore praedico, illaetabile tempus,
722 cum tibi cor gelidum gladius penetrabit acutus
723 ah miserae ! Et magno virgo dotabere luctu,
724 mutataque fluet Jordanis decolor unda.
725 Tum serus segnisque dies nascetur, et aegre
726 lutea vix terris ostendet pallidus ora,
727 atque gravi tellus optabit mole relinqui
728 ipsa sua et rupto per inania foedere labi."
729 Haec ubi, confestim veluti cedentia somno
730 lumina demisit, placidaque ibi morte quievit.
731 Obstupuere alii, sed nos, quis cetera nota,
732 terremur magis, inque vicem disquirimus ambo
733 solliciti quosnam matri denuntiet enses,
734 aut quibus exitio tantum puer ipse futurus.
735 Haud longum fuit in medio dehinc tempus ; utrumque
736 exitus edocuit dubiosque ambage resolvit,
737 ni nobis majora etiam nunc vulnera restant,
738 atque alia ex aliis semper graviora parantur.
739 Illis extremo quippe ex oriente diebus
740 tres adeo magni reges dicione profecti,
741 huc sese intulerant puero dona ampla ferentes,
742 aurumque et turis glebas stactaeque liquorem.
743 His vis astrorum ac ratio volventis Olympi
744 monstrarat regem nostris in finibus ortum,
745 quoi caeli terraeque paterent debita sceptra,
746 sancti igitur partus studio huc venere videndi.
747 Stella facem ducens venientibus usque coruscantem
748 dux erat atque viam signabat lumine largo,
749 ceu quondam patribus deserta per avia nostris
750 in patriam tandem Pharia redeuntibus ora
751 praecurrens monstrabat iter nocte ignea lampas
752 desuper et mirum spargebat lucida lumen.
753 Jamque urbem ingressi sedes adiere tyranni
754 Herodis causamque viae docuere, rati olli
755 hanc sobolem, quod erat rex his in finibus, ortam.
756 Obstupuit simul atque animo perterritus ille est.
757 Nec mora, permetuens sibi ne succederet haeres
758 quaesitus puer in regnis externus avitis,
759 indigenas vates jubet intra moenia cogi
760 regia scitarique omnes tempusque locumque
761 nascentis pueri, patriamque domumque requirit.
762 Illi autem Bethlen veterum monimenta minari
763 cuncta docent, dux unde ortus se tolleret olim
764 fama ingens, claris ingens super aethera factis.
765 Tum magis atque magis curarum fluctuat aestu
766 sollicitamque gerit cassa formidine mentem.
767 Tandem his affatus reges dimittit Eoos :
768 "Quae vos causa, viri, nostris nunc applicat oris,

769 haec eadem longe spe nos suspendit, aventes
770 cernere promissos pueri tot vatibus ortus.
771 Haud procul hinc saxo Bethle fundata vetusto
772 urbs colitur nostris. Natum illuc quaerite regem.
773 Mox jubeo, inventum nobis qui nuntiet, inde
774 mittite : nostro etiam puer accumuletur honore."
775 Sic ait, et falso simulat nova gaudia vultu.
776 Verum longe aliud male amico pectore agebat
777 demens, qui caeli regem, cui sidera parent,
778 crederet in terris mortalia regna morari.
779 Ergo iter instaurant conspecto sidere laeti.
780 Jamque propinquabant magna stipante caterva,
781 cum subito supra rectum ingens substitit astrum
782 irradians largoque mapalia lumine complens,
783 quales cum belli motus aut funera regum
784 portendunt, crinem irato sparsere minacem
785 aethere, ni diri rubeant lugubre cometae.
786 Tres adeo angusti subter fastigia tecti
787 pauper ego excepi reges in rebus egenis.
788 Vidi illos auro illustres ostroque decoros
789 ante pedes pueri sese demittere pronos
790 suppliciter, genibusque piae procumbere matris,
791 dum sua quisque facit sortiti ex ordine dona.
792 Barbarici ante fores exspectabant comitatus
793 interea, Tyrioque instratus murice terga
794 stans sonipes teres exercebat dentibus aurum.
795 His dehinc perfectis, abeunt laetique sequuntur
796 quod longo irradians aperitur tramite sidus.
797 Sed non inde via moniti referuntur eadem
798 regia linquentes a laeva moenia longe,
799 rursus Idumaei sedem ne regis adirent.
800 Ille autem, ut sese delusum denique sensit,
801 accensus furiis suspectam misit ad urbem
802 mille viros ferro instructos, qui moenia furto
803 per noctem ingressi teneros, quicumque reperti
804 infantes matrum jugularent ubere raptos,
805 quo numero in tanto caderet quoque regius haeres.
806 Ipse sed in somnis visus sum voce moneri
807 praecipitem celerare fugam, loca relinquere nota.
808 "Surge, age, rumpe moras, puerum tecum arripe matremque
809 et septengemini cursu pete flumina Nili ;
810 hinc terram cole, quae procul his haud dissidet oris,
811 nec refer inde pedem, nisi te prius ipse vocaro :
812 rex etenim letum infanti molitur acerbum."
813 Consurgo, et plenus monitis matri omnia pando.
814 Vidisses visu exanguem exanimemque puellam
815 huc illuc trepidare fuga et vix fidere nocti.
816 Jam tum illi pectus gladius trajecit acutus,
817 Ah miserae ! Ingenti labefactaque corda dolore.
818 Cedimus, et taciti malefidam linquimus urbem
819 per noctem ac propero petimus nemora avia gressu.
820 Et jam palmosae saltus atque ardua Idumes
821 praetervectus eram, veteris jam moenia Elusae,
822 quaque Asiam Libycis disjungit finibus omnem
823 Mapsa, ferax oleae. Ingredior pluviae inscia regna,
824 regna Phari, quibus est caeli vis cognita primum
825 astraque lunaeque globus solisque meatus.
826 Ignotos passim montis, ignota saluto

827 flumina turrigerasque legens praetervehor urbes.
828 Jamque papyriferi ripis Anthedonis ibam.
829 Aurae omnes terrent pavidos, capitique timentes
830 tam caro. At puero blandiri murmure silvae
831 lauricomae et ramis capita accurvare reflexis,
832 aurarumque leves animae indulgere susurro.
833 Ipsae etiam nobis cautes, ipsique videntur
834 verticibus leviter motis alludere montes,
835 signaque laetitiae dare stagna loquacia circum.
836 Audires blandum fessas erroribus undas
837 perstreperere et molli lapsu per saxa sonare
838 humida saxa super nitido viridantia musco.
839 Praecipue ripis volucres et fluminis alveo
840 assuetae liquidis mulcebant vocibus auras,
841 et jactu alarum resonabant corpora plausa.
842 Sese etiam omnifero gremio venientibus offert
843 laeta dei aspectu tellus : flant gramina odorem
844 cuncta suum et mollem praetexit amaracus umbram.
845 Nec vero incerta latebrosus origine Nilus
846 non manifesta dedit salienti flumine signa
847 adventante deo ; laetis se sustulit undis
848 stagna arcana ciens fundoque apparuit imo.
849 Ad bivias nobis fauces flexusque viarum
850 increpitans clypeo fulgentique ense per auras
851 ocius usque aderat caelo pulcherrimus ales,
852 et monstrabat iter sibi per divortia nota,
853 ne recta regione viae deprenderet hostis.
854 Caeruleis huic terga notis suffusa rubebant,
855 multum illi assimilis qui me connubia quondam
856 solventem increpuit tenebrasque a mente fugavit.
857 Supra nos alii pendentes aere pennis
858 ibant et noctis resupini infantis ab ore
859 humorem arcebant lentum plumaque tegebant.
860 Jamque ego perplexum per iter prope fida tenebam
861 arva legens sistris bacchata sonantibus, et jam
862 tutus erat longe nostris a finibus infans ;
863 attamen Aegypti penetro interiora, nec ulla
864 fida satis tellus mihi visa aut regis iniqui
865 sat sceptris divisa : animo timeo omnia tuta.
866 Nec placet Hermopolis, nec centum pervia portis
867 visa satis Thebe tanto procul esse periclo.
868 Nos igitur regum turritis clara sepulchris
869 accepit Memphis : hac demum sede quievi
870 paupere sub tecto veteris securus amici.
871 Jam vero Pelusiacas vulgata per oras
872 fama Palaestinum subito serit undique regem
873 florentem teneris orbasse nepotibus urbem,
874 quos frustra insontes passim ferro impius hausit,
875 dulcia linquentes vagitu lumina vitae.
876 Palluit applicuitque sinu perterrita mater
877 infantem, atque animum sceleris perstrinxit imago.
878 Quos ibi tum gentis fletus qualive per urbem
879 funestam credis matres errasse ululatu !
880 Sanguine diluta est tellus, cava tecta natarunt.
881 Non si forte olim incautis pastoribus orta
882 ingruerit subito tempestas omnibus arvis,
883 omnibus et silvis, tot fusi grandine dira
884 spectentur per humum afflictis cum matribus agni,

885 corpora quot passim puerorum abjecta jacebant
886 per fora perque vias urbis. Sic denique multis
887 exitio fuit, ut vates praedixerat, infans.
888 Nunc etiam lugent orbae sua pignora matres.
889 Non tamen ille diu scelere est laetatus ab illo,
890 nam membra immundo correptus tabida morbo,
891 illaudatam animam parvo post tempore fudit.
892 Ipse iterum in somnis divina voce coactus
893 linquere monstriferi septemflua flumina Nili,
894 in patriam redeo, atque memor vestigia retro
895 observata legens pignus cum matre reduco.
896 Forsitan et puero fuerit quae cura requiris,
897 quae mens, an virtus illi maturior aevo,
898 ecquid non puerile annis puerilibus ausus.
899 Si tibi nunc, quaecumque olim admiranda notavi,
900 primaevo dum flore virens adolesceret aetas,
901 enumerate vacet, me vox prius ipsa relinquat
902 defessum atque diem clauso nox condat Olympo.
903 Nam quoties dictis tener haud mortalibus ambos
904 terruit ! Aut quoties sanctos expavimus ignes
905 flammarumque globos et terrificos fulgores,
906 saepe quibus visus puer est ardere nitentem
907 caesariem, caeli dum splendet luce corusca !
908 Nec referam quoties genitorem audivimus illum
909 affari solum arcanasque expromere voces.
910 Alma parens, tenues arguto pectine telas
911 percurrens, saepe humana sub imagine coetus
912 caelituum tectum intrantes exterrita vidit
913 blandiri puero et pictis colludere plumis,
914 aut violis tegere et nimbo vestire rosarum.
915 Nos tamen interea custodes ille vereri
916 summissus, carae et mandata facessere matris
917 nostraque, et implebat veri genitoris amorem,
918 dum membris habilis vigor et vis firma veniret.
919 Et jam bis senos crescens exegerat annos,
920 necdum se populis signo detexerat ullo.
921 Tum primum coepit Judaea per oppida vulgo
922 illius apparere palamque est prodita virtus.
923 Forte dies aderat genti solemnis, et urbi
924 huic magnae sacer ante alias, quo regia mecum
925 venerat et virgo, atque sequens sese aureus illi
926 implicuit dextrae puer. Et jam rite litatis
927 ipse domum sacris magna cum matre redibam.
928 Jamque labore viae fessis lux prima peracta,
929 et piceam clauso nox caelo involverat umbram.
930 Defuit hic puer et genitricem meque fefellit.
931 Tum consanguineos frustra et scitatus amicos,
932 terque quaterque viam repetens clamore replevi.
933 Flebat se incusans unam pulcherrima mater,
934 flaventem fusa crinem per eburnea colla.
935 Ora decent lacrimae, disjecti colla capilli,
936 qualis virginea cum mollis amaracus urna
937 et pluviam et ventos pariter perpessa procaces
938 demisit turbata comas, iterumque resurgens
939 extulit os caelo ac priscum meditatur honorem.
940 Dumque viam relego, invitum comes aegra secuta est.
941 Tres adeo incerti soles erravimus urbe
942 nequicquam ; quarta est vix demum luce repertus.

943 Namque mihi et miserae cum spes sublata parenti
 944 cuncta foret penitus, in mentem venit utrique
 945 templa iterum petere atque preces effundere ad aram.
 946 Vix ingressus eram limen, cum protinus ambo
 947 ecce sacerdotum in medio conspeximus illum
 948 (prima rudimenta et virtutis signa futurae),
 949 alta recensentem vatum monimenta patrumque
 950 primores ultro scitantem obscura docentemque.
 951 Illum omnes admirari haud vulgata canentem
 952 supra aciem captumque hominis mentemque vigentem,
 953 humana non vi edoctum, non arte magistra,
 954 maturumque animi nimium puerilibus annis.
 955 Nec minus insigni cunctis spectantibus ore
 956 gratus erat. Neque enim poterant se explere tuendo
 957 flagrantisque Dei vultus blandosque serena
 958 luce oculos magis aut propexum verticis aurum
 959 et florem grati, qui vix inceperat, aevi.
 960 Nam quocumque caput circum torsisset honestum,
 961 luce recens orta vel sidere pulchrior aureo,
 962 laeta serenato ridebant omnia mundo,
 963 et toto dulcem jactabat corpore amorem.
 964 Inculti qualis nitet inter gramina campi,
 965 purpureus se cum primum foliis narcissus
 966 exseruit ruptoque caput detexit amictu,
 967 aut qualis nitidi species micat alma smaragdi,
 968 Cum tenui argento tenuive includitur auro.
 969 Prima mali fuit hinc nobis scintilla, puerque
 970 ex illo formidata primoribus urbis
 971 virtute invisus fuit, et corda aspera movit ;
 972 atque hoc deinde ingens succensa est fomite flamma,
 973 inque dies gliscens furor atque insania crevit.
 974 Omnia quae porro ipse videns metuensque futuri
 975 orabam impavidum, ne vitae prodigus hosti
 976 objiceret, ne se perdendum proderet ultro.
 977 Verum luce prius lateant in montibus arces,
 978 aut nocte in summis celetur turribus ignis,
 979 obruta quam longum jaceat sine nomine virtus.
 980 Non tamen ille odiis magis ussit pectora acerbis
 981 quam cum ter denis jam vir volventibus annis
 982 fontis aquam latices Bacchi convertit in atros.
 983 Forte Canam mecum Galilaeae advenerat urbem,
 984 mater et ipsa aderat, veteri dum accitus amico
 985 obsequor ; intactam genero qui jungere natam
 986 conventu procerum magno de more parabat.
 987 Jamque omnes circum positus discumbere mensis
 988 atque alacres epulari et vina repscere laeti.
 989 Necdum finis erat dapibus, cum murmur ubique
 990 exoritur totasque auditur triste per aedes,
 991 laetitiae causam exhaustis liquentia vina
 992 defecisse cadis turbarique omnia visa.
 993 Tum res alma parens tenues miserata puellae
 994 innuit, et natum summissa voce precata est,
 995 ferret opem. Vidi hic juvenem primum ore moveri
 996 turbatum, carae precibus tamen inde parentis
 997 annuit et fesso rerum succurrit amico.
 998 Sex, ut erant ibi tot numero, carchesia lymphis
 999 impleri jubet actutum, mensisque reponi,
 1000 quae simul aspexit propius deus, omnibus ecce !

1001 Mutatus subito nigrescere cernitur humor,
 1002 vinaque pro pura mirantes hausimus unda.
 1003 "Audisti, dux, et genus et cunabula nati
 1004 primitiasque dei. Ne cetera deinde requiras,
 1005 hanc omnem erexit factis forentibus oram.
 1006 Quae si audire tamen tibi nunc fert corde voluptas,
 1007 is longe memoret melior (simul ore sedentem
 1008 signat Joannem) vidit namque omnia praesens,
 1009 errabunda ducis semper vestigia servans,
 1010 dum mihi cura domi servandae virginis haeret."
 1011 Dixit, et hic facto defessus fine quievit.
 1012 "Immo, ait, istius causas ab origine partus
 1013 exsequere, aut quae religio, si vera per oram
 1014 percepi, Judaea Deum non amplius unum
 1015 aeternum colit, haud mortali semine cretum,
 1016 indigetesque suis divos altaribus arcet.
 1017 Inde tibi noti recolens ex ordine divi
 1018 cetera mira refer. Namque hunc in corpore vires
 1019 deficiunt, teque auxilio jubet ipse subire."
 1020 Pontius haec ; cuncti intenti simul ora tenebant.

LIBER QUARTUS.

C_4 v.1 Hic juvenis, facie quo tum non gratior alter,
 2 puberibusque annis erat ingrediente juvena,
 3 multa prius veniam praefatus, multa recusans
 4 verba diu premit ; inde animo mortalia linquens
 5 paulatim oblitusque hominem, penetrabilia Divum
 6 mente subit caelum peragrans, fruiturque beato
 7 caelituum aspectu omnipotentique aetheris aura,
 8 admissus superam depasce lumine lucem,
 9 inque Deo tota defixus mente moratur.
 10 Qualis ubi alta petens terris aufertur ab imis
 11 alituum regina, vagas spatia per auras,
 12 dat plausum gyro atque in nubila conditur alis.
 13 Aetherea jamque illa plaga levis instat, et acrem
 14 intendens aciem criniti lumina solis
 15 suspicit, obtutuque oculos fixa haeret acuto.
 16 Illum adeo tacitum interea mirantur, in unum
 17 versi omnes velut exanimum somnoque gravatum,
 18 et crebri excutiunt. Demum sibi redditus ipse
 19 cum gemitu ex imo sic fari pectore coepit :
 20 "Principio pater omnipotens rerum sator et fons,
 21 ingens, immensus, solus regnabat ubique,
 22 nondum sidereos mundi procuderat orbes,
 23 nondum mundus erat, necdum ibant tempora in orbem,
 24 nullaque caeruleo radiabant lumina caelo.
 25 Quicquid erat, deus illud erat, quodcumque ubicumque
 26 complexus circum, penitus sese omnis in uno.

27 Filius huic tantum, quem non effuderat ulla
28 vel dea vel solito mortalis femina partu,
29 ipse sed aeterna genitor conceperat illum
30 aeternum aeternus (dictu mirabile) mente.
31 Haud olli terreni artus moribundave membra,
32 sed sine corpore erat, Patris alta ut mente suprerni
33 conceptum arcanoque latens in pectore "Verbum",
34 quod nondum in volucres vox edita protulit auras,
35 omnipotens verbum, finisque et originis expers,
36 quo mare, quo tellus, quo constat maximus aether,
37 utque pater Deus, aequae etiam Deus unica proles.
38 At geminos tu proinde deos fuge credere porro :
39 numen idem simul ambobus, Deus unus uterque est.
40 Quin etiam, quo inter se ambo junguntur, amorem
41 (namque ab utroque venit conspirans mutuus ardor)
42 omnipotens aequae numenque deumque vocamus,
43 afflantem maria ac terras caelique profunda,
44 afflatu quo cuncta vigent, quo cuncta moventur,
45 tresque unum esse Deum, ter numen dicimus unum.
46 Quove magis mirere, deus, quem cernimus ipsi
47 factum hominem atque hominum mortali corpore cretum
48 non minus ac prius aetherea nunc regnat in aula
49 cum genitore, pari simul omnia numine torquens.
50 Nempe locis nullis, spatiis non clauditur ullis,
51 omnibus inque locis idem omni tempore praesens,
52 suffugiens nostras acies sensuque remotus,
53 cuncta replet Deus ac molem se fundit in omnem.
54 Lux humiles veluti perfundens lumine terras
55 solis ab orbe venit suppostaque circuit arva,
56 non tamen aethereo divisa ab sole recedit
57 illa usquam, quamvis longinquas ambiat oras.
58 Nec sine sole suo est lux, nec sine luce sua sol.
59 Quid vero impulerit tantos adiasse labores
60 atque haec ferre deum, dum morti obnoxius errat,
61 dicam equidem, et repetens altas ab origine causas
62 expediam. Caelum et caeli quos suspicis orbes
63 vix opifex rerum extuderat terrasque jacentis,
64 cum simul aligeros populos sanctosque volucres
65 ter ternas acies, celerem et sine corpore gentem,
66 qui caeli incolerent ipsos septemplex orbes,
67 condidit aeterno Genitor succensus amore,
68 ut sua, qua fruitur solus Natusque per aevum,
69 communis foret et multis concessa voluptas.
70 Continuo, fuerat quos aequum dicere laudes
71 auctorique Deoque suo ac persolvere grates,
72 regnandi vesanus amor (quis ferret inultus ?)
73 Haud partem exiguam invasit furiisque subegit,
74 ut cuperent summo sese praeferre parenti,
75 immemores, animis victi caecique furore.
76 Non tulit omnipotens sator et meliora secutos
77 armavit contra. Nulla hinc mora, talia adortos
78 indecores caelo sedes detrusit in imas,
79 noctis ubi horriferae nigror aeternaeque tenebrae.
80 Primus natus homo hinc, terris quem maximus auctor,
81 et liquidis late dominum praefecerat undis,
82 quo mox pro superis excussis astra teneret
83 desertasque domos ipse, et genus omne suorum
84 omnigenumque uni subjecit saecula animantum,

85 corpora montivagumque simul genus omne ferarum
86 squamigerum pecudes et pennis picta volantum
87 tantum floriferis dominum cum imponeret arvis,
88 arboris unius fetu illum parcere jussit.
89 At vetito captus mali infelicis amore
90 conjugis hortatu, quam fraude illexerat anguis,
91 immemor, heu ! Superi violavit foedera regis.
92 Vix avido arreptum pomum foedaverat ore,
93 cum pater imbripotens jam fulva e nube tonare
94 desuper auditus, saevasque indicere poenas
95 iratus quas ille olim, quas omnis ab illo
96 progenies lueret lucis ventura sub auras.
97 Continuo ingenti caelo sunt addita claustra ;
98 impia tum primum proles exorta repente
99 et subito tellus scelere est imbuta nefando :
100 emersit fraus, emersit malesuada libido.
101 Hinc durus generi humano labor additus, hinc fons
102 curarum et tristis patefacta est janua leti
103 morbique et dolor atque fames et turpis egestas,
104 cum genus humanum curis sine degere posset
105 plurimaque in terris vivendo vincere saecula.
106 Ex illo sine more homines, sine lege per agros
107 degebant ; tantum placabant sanguine fuso
108 caelicolum regem, bonus ut gregibusque sibique
109 afforet atque satis vim caeli averteret arvis,
110 indociles, rerum ignari ac rationis inanes.
111 Isque fere status annorum bis millibus orbi
112 constiterat, jam jamque magis Pater optimus iras
113 oblitus veteres paulum mitescere coepit.
114 Nondum homini tamen aethereum patefecit Olympum,
115 sed genus humanum fingens acuensque monendo
116 et leges dedit et ritus moremque sacrorum,
117 instituitque genus nostrum discriminis ergo
118 lege jubens, testa circum praecidere acuta
119 exiguam, unde viri sumus, omni in corpore partem.
120 Tum vatium implevit venientis pectora veri,
121 qui populis laetum canerent demum affore tempus,
122 janua aperta piis caeli cum sponte pateret.
123 Casti autem interea manes animaeque piorum
124 sub terram umbrosa exspectabant valle sedentes.
125 Jam vatium memores numerabant tempora et ambas
126 tendebant paribus votis ad sidera palmas,
127 caelestum regem orantes, desisteret ira,
128 parceret unius genus omne extinguere noxa.
129 "Parce pater, parce omnipotens," vox omnibus una,
130 "nos promisso olim, longe disjungimur unde
131 luminis expertes blandi, memor assere caelo.
132 Haud nos eduxti nequicquam lucis ad auras.
133 Si qua tamen veteris superant vestigia culpae,
134 dilue rore tuo facilis, fontesque reclude
135 divinos. O quis superum caelestia tandem
136 flumina, caelestes nobis bonus irriget imbres.
137 Vos, o flammiferi labentes aetheris orbes,
138 irrorate. Vagae nobis succurrite nubes ;
139 optatam pluviam, felicem effundite rorem.
140 Tuque adeo, quem jam exspectant tot saecula votis
141 promissum, inferni cui nutant moenia mundi,
142 summi vera patris soboles, caeli aureus imber,

143 rumpe moras, age, sidereos rumpe ocius orbis,
144 aetheris huc fractis vi multa allabere portis !"
145 Talibus orabant omnes, eademque canebant.
146 "Quos pater omnipotens superum, sarcire ruinas
147 jam meditans, caeli penitus miseratus ab arce est.
148 Cum vero aethereas nutu recludere portas
149 posset et alitibus potius de civibus unum
150 mittere, qui regnis manes divelleret atris
151 in superum referens sedes, stellantia templa,
152 ipse sui ut memores magis ac majoribus artos
153 vinciret meritis homines, qui cuncta piaret,
154 factum hominem e summo natum ipsum misit Olympo
155 ne tamen ignaris mortalibus appareret
156 ignotusque novusque suis, neve ilicet illum
157 finibus arcerent pulsum, quod se ipse Deimet
158 progeniem leges contra memoraret avitas,
159 praemisit vatem egregium his in finibus ortum,
160 nomine Joannem, Elisabe quem numine plenum
161 Zacchariae extrema parit infecunda senecta,
162 gentibus ipse Deum ut natum praenuntius ore
163 proderet atque suas spes fesso ostenderet orbi.
164 Ille hominum primis vitans vestigia ab annis,
165 horridus in solis agitavit montibus aevum,
166 montibus et silvis et litoribus desertis.
167 Speluncae tectum horrentes, victum aspera nullo
168 arbuta terra dabat cultu aut sudantia truncis
169 mella cavis ; liquidi praebebant pocula fontes.
170 Vestis erat pellis hirsutis horrida vilis.
171 Tantum laetificas gaudebat spargere voces,
172 affatus nemora et montis ac litora ponti.
173 Tanta sed haud latuit virtus tamen : ilicet ingens
174 fama viri circumfusas penetravit ad urbes.
175 Jamque illum caelo demissum credere gentes,
176 qui, tot veridicae ut quondam cecinere Sibyllae,
177 humanum genus horrificis educeret umbris.
178 Et jam concursu populi illum accedere magno
179 scitatum, quisnam, unde domo, quid ferret an ipse
180 afforet e caelo, miseris qui gentibus olim
181 auxilio venturus, eum bis terque rogabant.
182 Ille sed umbrosis repetebat talia ab antris :
183 "Gaudete o tenebris jamdudum ac nubibus atris
184 obductae gentes ! Lux ecce optata propinquat !
185 Ne vero, ne me ignari vos credite lucem
186 promissam (immeritos neque enim furamur honores) ;
187 tantum ego ceu solem nascentem lucifer ante
188 exoritur nitidoque diem denuntiat astro ;
189 praedico actutum vobis jubar affore vestrum.
190 Jamjam aderit Deus, ecce Deus mortalibus oris
191 ceu mortalis adest ! Venienti occurrite laeti,
192 fronde vias festa decorate, tapetibus agros,
193 et numen digno venerati agnoscite honore.
194 Discite justitiam interea atque assuescite recto,
195 et, duce me, scelus infectum lavite amne liquenti.
196 Ipse autem aetherea divinitus eluet aura
197 omne malum ac veteris penitus contagia culpae :
198 saeculaeque mutato succedent aurea mundo."
199 Talibus auditis, cunctis ex urbibus ibant
200 finitimi, qua Jordanes fluit agmine dulci,

201 orantes pacem atque ultro commissa fatentes :
 202 quos vates puro nudos lustrabat in amne,
 203 rite cavis capiti invergens sacra flumina palmis.
 204 Ecce autem Deus ipse etiam, ceu cetera turba
 205 lustrandi sese studio clam tendit ad amnem,
 206 nil ut inexpertum moribundo in corpore linquat,
 207 mortali quod fas homini et subiisse necesse est,
 208 ne pigeat seros imitari facta nepotes.
 209 Abstinuit primum vates tactusque refugit,
 210 agnoscensque Deum palmnas utrasque tetendit
 211 supplex accurvusque vadis mirantibus ipsis.
 212 Paruit inde tamen jussus, divinaque membra
 213 horrescensque tremensque liquenti perluit amne.
 214 Protinus aurifluo Jordanes gurgite fulsit,
 215 et superum vasto intonuit domus alta fragore.
 216 Insuper et caeli claro delapsa columba est
 217 vertice per purum, candenti argentea pluma
 218 terga, sed auratis circum et rutilantibus alis.
 219 Jamque viam late signans super adstitit ambos,
 220 caelestique aura pendens afflavit utrumque.
 221 Vox simul et magni rubri genitoris ab aethra
 222 audita est, Nati dulcem testantis amorem.
 223 Interea aligeri juvenes, gens incola caeli,
 224 missi aderant, liquido pendentes aere circum,
 225 carbaseosque sinus mantiliaque alba ferebant,
 226 jussa ministeria, ut nati membra humida herilis
 227 rorantemque sacro sicarent flumine crinem.
 228 His actis Deus evasit fluviumque reliquit.
 229 Quem vates longo ripam ordine circumfusus
 230 ostendit, talique abeuntem est voce secutus :
 231 "En ego quem terris toties jamjam affore quondam
 232 pollicitus, Deus ! ecce Deus, qui crimina nostra
 233 thuricremas agnus veluti mactatus ad aras
 234 morte luet superoque volens cadet hostia Patri.
 235 Hunc optate duces, hunc vobis optate magistrum."
 236 Ex illo vates, nemora et loca sola relinquens,
 237 urbes per medias ibat populisque canebat
 238 advenisse Deum, promissum numen adesse.
 239 Credita res paucis, donec se ostendere coram
 240 supra hominem coepit Deus ipse ingentibus orsis.
 241 Nam primum numero ex omni delegit amicos
 242 bis senos, quiscum curas durumque laborem
 243 partiri et casus posset deducere in omnes ;
 244 ante quidem solus ter denos egerat annos.
 245 Sed ne forte putes multis e millibus illi
 246 nos ideo placuisse, dolis quod et arte magistra
 247 spectatos longe ante alios deprenderit omnes
 248 aut opibus claraque domus a stirpe potentes,
 249 omnibus obscurum genus et sine luce penates
 250 atque humilis fortuna, nec astu praedita vita.
 251 Quinque adeo sumus exigua Bessaide creti ;
 252 nobis ars erat insidias piscosa secundum
 253 flumina squamigerum generi hamo tendere adunco,
 254 atque innare salum fecundaque piscibus arva.
 255 Tunc etiam, cum nos ad se primum ille vocavit,
 256 humida litorea sarcibam retia arena.
 257 Ipse Jacobus adhuc salientes litore pisces
 258 servabat frater. Nec tum procul inde secabant

259 Andreas parvaque Petrus vada salsa carina
 260 Iisdem acti fratres studiis, eadem aequora circum.
 261 Tum mihi conjunctus patriaque domoque Philippus
 262 accitus pisces et retia torta reliquit.
 263 Addunt se socios Thomas, Thaddeus eademque
 264 arte Simon, Cana quem genuit Galileia, amicum
 265 fluminibus patriis mutisque natantibus hostem.
 266 Namque Jacobus, ei cognato sanguine fretus,
 267 Alphaeo natus patre se subjunxerat ante.
 268 Ut genus indecores paene omnes, sic quoque nostra
 269 nomina dura vides, insueta atque aspera dictu.
 270 Haud facies sola est impexis horrida barbis.
 271 Tres alii, neque enim longe meliore secuti
 272 fortuna, addiderant sese : Matthaeus, et aevo
 273 jam gravis effetisque Petri jam proximus annis
 274 Bartholomaeus, et ipse mali fabricator Iudas.
 275 Vix memorem quaecumque oculis, quaecumque sub illo
 276 auribus his hausi repetens miracula rerum
 277 tempore tam parvo (vix terna hiberna peracta,
 278 ex quo illi socii dignatus nomine jungor),
 279 nec me tam vastum nunc currere oporteat aequor.
 280 Pauca sed e multis, et ea haud mihi mollia fatu,
 281 ingrediar tamen et breviter tua jussa capessens
 282 expediam. Mitto modo quae monimenta reliquit
 283 finitimas (tibi nota reor) non parva per urbes,
 284 namque omnem egregiis factis insigniit oram.
 285 Quis nescit nuper revocatum ad munera vitae
 286 palmiferae regem Bethanes, lumine quarto
 287 quem vidit sol exstinctum impositumque sepulcro ?
 288 Ut sileam innumeros, quibus ipse in limine leti
 289 affuit et durae de mortis fauce revulsit ?
 290 Nam prius enumerem quot ponto aquilonibus undae
 291 spumescant vasto, quot inundent litora arenis,
 292 quam quot opem morbos varios in corpore passis
 293 supplicibus tulit et validos laetosque remisit.
 294 Multi capti oculis, clausis multi auribus orti,
 295 ne possent ullas audire aut edere voces ;
 296 claudi alii imparibus vix aegre passibus ibant.
 297 His rigor ex longo immotos sopiverat artus ;
 298 illis semeso serpentina corpore hiabant
 299 ulcera et illuvies membris immunda fluebat.
 300 Nec deerant tumefacta quibus praecordia et alvus
 301 insincera sitim miseris adduxerat acrem,
 302 nullae artes poterant, quam nulla exstinguere aquae vis.
 303 Tum quibus assiduis concussa tremoribus usque
 304 nutabant tremuloque lababant corpore membra,
 305 ignea quos febris aut corrupti corporis humor,
 306 et quos praeterea vis caeci incognita morbi
 307 versabat lecto totos distracta per artus,
 308 quosve animis captos agitans male habebat Erinnyes.
 309 Omnibus aspectu solo tactuve ferebat
 310 Divus opem : subito linquebant corpora morbi,
 311 et stratis ipsi surgebant protinus aegri.
 312 Atque ideo quacumque viam observatus agebat,
 313 semper eum opperiens turba ingens strata jacebat
 314 per fora perque vias sanctique ad limina templi.
 315 Nondum aliquem tamen infernis revocaverat umbris
 316 morte obita, cum Sidonia remearet ab ora,

317 et Naim ingressus sociis comitantibus altam est.
318 Ecce autem ingentem longo procedere pompam
319 ordine flammaram aspicimus maestamque per urbem
320 audimus luctum, causam tum denique luctus
321 cernimus : egregii juvenis miserabile corpus
322 impositum molli feretro, quem mersit acerba
323 morte dies, dulci cum vix pubesceret aevo,
324 atque omnem vultu florenti dempsit honorem.
325 Qualis, quem pede pressit agro bos signa relinquens,
326 paulatim lassa languet cervice hyacinthus,
327 aut rosa quam molli decerpens pollice virgo,
328 vepribus in densis lapsam sub sole reliquit.
329 Urbe furens tota genitrix miseranda, capillos
330 scissa genasque ambas manibus foedata cruentis,
331 ibat. Eam circum pariter per densa viarum
332 pulsabant saevis matres plangoribus astra ;
333 ipsi orbam cives miserantur : ei unica proles
334 ille relictus erat, vidui solacia lecti.
335 Ut Deus exanimis juvenili in corpore vidit
336 pallorem et molli pictas lanugine malas,
337 parcere lamentis jubet et considerare pompam ;
338 admotusque manu mulcens immobile corpus
339 rursum animam gelidis membris innexuit. Ecce
340 erigitur puer et (cunctis mirabile visum)
341 prosiluit raptim in medios vacuumque feretrum
342 liquit et amplexans solatus voce parentem est.
343 Nec vero multis etiam post mensibus idem
344 egregiam amissa donavit luce puellam,
345 cui calor et toto de pectore fugerat omnis
346 halitus, aereas penitus dilapsus in auras.
347 Virginis ipse pater factum testatur Iarus,
348 largus opum, pollens lingua et popularibus auris.
349 Quid repetam, purum vivo cum e fonte liquorem
350 in vinum convertit, opes miseratus amici ?
351 Forte olim aerei spectans de vertice montis,
352 cum sol emenso depressior iret Olympo,
353 ingentem vidit numerum affluxisse sequentum,
354 matres atque viros, quos per deserta locorum
355 duxerat oblitosque sui oblitosque suorum.
356 Substitit hic miseratus. Eos jam tertia namque
357 muneris expertes cereris lux acta videbat.
358 Hic neque erant fruges, vicina nec oppida possent
359 unde dapes petere argento victumque parare,
360 arboreos necdum fetus decoxerat aestas.
361 Vix tandem inventus puer est ex agmine tanto
362 quinque, viae auxilium, qui secum liba ferebat
363 atque duos, dederat quos huc pia mater eunti,
364 inclusos myrto et bene olenti gramine pisces.
365 Sed quid enim haec adeo tam multis millibus autem ?
366 Et jam diffisi socii mussare querentes,
367 quos bonus affatu Christus solatus amico,
368 in coetum vocat ac paucis ita deinde profatur :
369 "Nemo hodie numero e tanto non laetus abibit."
370 Hinc supplex tali Genitorem voce precatur :
371 "Summe parens, ope cujus alit terra omnia quique
372 et sole et liquidis fecundas imbribus agros,
373 si quondam Isacidum generi per inhospita eunti
374 divinas epulas caelo es largitus ab alto,

375 semine si nullo constant quaecumque creasti
376 et nihil omnino fuerant caelum aequora tellus,
377 adsis, obscenamque famem tot millibus arce."
378 Haec tantum. Dehinc gramineo discumbere campo
379 imperat effusos coetus dapibusque parari.
380 Inde in frustra secat laeto cerealia vultu
381 liba minutatim et populos partitur in omnes.
382 (Millia quinque hominum campis saturanda sedebant).
383 Ecce (incredibile auditu, mirabile visu)
384 omnibus in manibus visae succrescere partes
385 exiguae, dapibusque epulati largius omnes.
386 Et frugum pariter laticumque expleta cupido est ;
387 quin et reliquias mensis superantia frustra
388 vix cava congestas bis sex cepere canistra.
389 Accipe nunc aliud quod paucis ante diebus
390 vidimus. Arbor erat foliis densissima in agro
391 deserto, unde olim pendentia poma viator
392 carpebat sitiens. Heros qui has forte tenebat
393 pulverulentus iter, quaesivit in arbore fetus
394 incassum, infecunda comas nam et brachia tantum
395 luxurians late circum tendebat opaca.
396 Non tulit, ac verbis sterilem exsecratus acerbis.
397 Continuo (manifesta audis) exaruit arbos,
398 et folia aereas volitarunt lapsa per auras.
399 Nec minus est olli imperii maris aequora in alta.
400 Uni omnes undae assurgunt fluctusque quiescunt
401 unius edicto. Vidi, vidi ipse furentes
402 illius hibernos ad vocem ponere Coros
403 vimque omnem, motas quae flabris asperat undas.
404 Nondum luna suum ter cursum plena peregit,
405 cum subito in lento deprensus marmore nobis
406 nocte fere media, dum retia ducimus, orta est
407 turbida tempestas et pontus inhorruit ater
408 fluctibus elatis et concursantibus undis,
409 inflictamque ratem jamjam salis hauserat aestus.
410 Nos trepidare metu leti discrimine parvo,
411 cum procul ecce duces, quem nuper liquimus alto
412 litore spectantem fluctus scopulo illidentes,
413 ferre iter aspiciamus medias impune per undas
414 suspensum tumidoque pedes haud tinguere ponto.
415 Horruimus visu subito, nec credere quibam
416 me veram faciem, haud simulatum cernere corpus,
417 tam celeres egisse vias sine remige in undis,
418 ni sese, verbis dum nos hortatur amicis,
419 ultro ostendisset : "Quonam fiducia vobis
420 jam nunc pulsa mei cessit ? Timor omnis abesto.
421 Indubitare meis tandem dediscite dictis."
422 Sic ait, atque ratem, quae jam superantibus undis
423 cesserat, insiliens solo tumida aequora nutu
424 placavit, posuitque minacia murmura pontus.
425 Sic terrae in tutum positus adnavimus undis
426 incolumes celerique volavimus aequora cursu.
427 Nec mora, vix siccum attigerat tellure potitus,
428 ecce aliud dictu magis ac mirabile visu.
429 Namque magistratus aderant in litore missi
430 aera reposcentes, quae pendere lege quotannis
431 regibus antiqua pro sese quisque jubemur.
432 Accipit hos placidus quos, dum sermone moratur,

433 Petrum ad se vocat, et fidam summissus ad aurem :
434 "Vade," ait, "et jacto quem primum traxeris hamo
435 aequoribus piscem cultro scrutabere acuto.
436 Intus erit regi quod jussi pendimus ambo."
437 Jussa facit senior. Trahit hamo ad litora praedam,
438 argentumque viris dat piscis in ore repertum.
439 Horresco quoties stimulis immitibus actus
440 quidam animo subit, idem illo quem tempore vidi,
441 dum legerem expositos hoc ipso in litore pisces,
442 obsessum furiis atque ore immane furentem.
443 Hunc olim (ut perhibent) vetito genuere parentes
444 concubitu juncti atque inconcessis hymenaeis ;
445 quippe torum ascendere, dei cum sacra vetarent,
446 cum scaenis gens indulget nostra omnis opacis.
447 Sed non gavisi scelere illi tempore longo.
448 Nam subito amplexus interque et gaudia adulter
449 sacrilegam tenues animam exhalavit in auras
450 infelix, scelerique eadem nox prima nefando,
451 et pariter suprema fuit discrimine parvo.
452 Illam autem aethereis flammis divinitus ignis
453 corripuit, cum jam maturi pondera partus
454 urgerent, eademque duos leto hora dedisset,
455 infans ni foret exsectae genitricis ab alvo
456 exemptus, parvum patris eduxere sorores.
457 Ipse etiam mox immeritus scelerata parentum
458 facta luit, jucunda oculorum luce negata
459 obstructaeque aures penitus mansere, nec illi
460 aut ullas haurire datum est aut reddere voces.
461 Quinetiam simul atque adolevit, protinus aegrum
462 arripuit furor, infernae vis effera gentis,
463 centum illum furiae, centum illum (flebile) pestes
464 victum exercebant, Erebi legio acta latebris,
465 horrendasque hominis singultus ore cientes
466 edebant voces ac terrificos mugitus.
467 Illum omnes exclamantem atque insueta frementem
468 horrebant trepidique fuga se in tecta ferebant,
469 si quando nodis ruptisque immane catenis,
470 incautis liber custodibus evasisset.
471 Jamque ille oblitus fratres, jamque ille sorores
472 amplius haud gressum patris intra tecta ferebat,
473 verum more ferae silvis degebat et antris,
474 sicubi saxa cava aut aevo consumpta sepulcra,
475 ater, egens corpusque abjecto nudus amictu.
476 Talem igitur nodo manibus post terga revinctis
477 Christi ad conspectum, si fors miseresceret ipse,
478 vi multa consanguinei carique trahebant.
479 Ille autem obniti contra, dum rumpere nodos
480 tendit et horrendos clamores tollere ad astra,
481 qualis, ubi longis pugnator taurus ad aras
482 funibus arripitur, saevo fremit ore per urbem
483 et spumas agit et cornu ferit aera adunco ;
484 instant hinc famuli atque illinc et verbera crebri
485 ingeminant quassantque sudes per terga, per armos ;
486 diffugiunt vulgus trepidum, in tutumque recepti
487 porticibus gaudent longe spectare periculum.
488 Talis erat juvenis species immane furentis,
489 quem tandem ante Deum fessi statuere rogantes
490 ferret opem, saltem furiis tam tristibus illum

491 solveret excuteretque animo crudelia monstra.
492 Hic heros palmas in caelum sustulit ambas,
493 concipiensque preces genitorem in vota vocavit.
494 Ecce autem magnum, subitum et mirabile monstrum !
495 Auditi exululare lupi, latrare canes ceu,
496 tam diras jactat voces lymphatus ab ore.
497 Non tam immane sonet sese frangentibus undis
498 rupibus ex altis ingens decursus aquarum,
499 rumpantur claustra alta lacus si forte Velini,
500 totaque praecipitent valles stagna ardua in imas,
501 omnis ea ut regio fiat mare et oppida circum
502 mersa natent metuatque sacris Roma obruta templis.
503 Nunc caeli crepitus imitantur, cum superum rex
504 fulminat et tonitru quatit aetheris aurea templa ;
505 nunc ferri sonitum aut ruptarum mole catenarum
506 ingenti horrificum stridorem aut murmura ponti.
507 Circum omnis tellus, circum caelum omne remugit.
508 Instat vi multa Deus increpitatque morantes.
509 Jamque illi trepidare intus pacemque precari :
510 "Quid nunc, vera Dei atque indubitata propago,
511 concesso in poenas nos o de corpore trudis ?
512 Egressis saltem pecora haec invadere detur,
513 (saetigeri tum forte sues ea litora propter
514 pascebant) nosne horrifero sic merge barathro,
515 neve jube terrae inferioris operta subire."
516 Annuit. Extemplo videas procul ecce nigrantem
517 mollibus haud stimulis furiarum errare subactum
518 in diversa gregem nunc huc, nunc protinus illuc.
519 Nec mora, nec requies : intus vis effera saevit,
520 donec praecipites sese alta in stagna dedere,
521 et cunctis pariter vita est erepta sub unda.
522 At juvenis fessos subito collabitur artus
523 exemptus tandem nodosis brachia vinclis.
524 Mordicus ora solo impressus cunctatur adhucque
525 singultans pectusque lacescit anhelitus ingens,
526 exspiransque animam pulmonibus aeger agebat.
527 Quem juxta genitore Deo satus astitit oraque
528 attingens dextra atque oculos auresque recludit,
529 jamque videt loquiturque, et corda oblita residunt.
530 It vulgi clamor super aurea sidera ovantis,
531 supremique patris sobolemque deumque fatentur.
532 Sed quid non ipse evaleat ? Quin nos quoque missos
533 aegris jussit opem ferre auxilioque levare
534 praesenti, mortis multos de faucibus atris
535 non opibus hominum, nulla revocavimus arte,
536 Verum implorato ter tantum voce magistri
537 nomine surgebant stratis ibantque refecti.
538 Omni autem ex numero sese vix obtulit unus,
539 quem stimulis actum saevis caecoque furore
540 incassum victi tentavimus ; acrior illum
541 usque adeo magis atque magis vis intus agebat.
542 Cui cum ferret opem Divus mox optimus ipse,
543 iratus quod parva sui fiducia nobis,
544 "Corporibus tales facile," inquit, "pellere pestes.
545 Parcendum dapibus tamen e caeloque petendum
546 nec solis vero haec vobis concessa facultas,
547 sed nomen quicumque meum vulgaverit, omnia
548 fas audere, mei modo ne fiducia desit.

549 Ille etiam jussos immani corpore montes
550 transferet et verso sistet vaga flumina cursu.
551 Ite animis igitur certi, confidite, neve
552 instabili titubate fide. Jacite aurea veri
553 semina ubique ; orbem vestra perfundite luce
554 obductum tenebris atque alta nocte sepultum :
555 vos hominum lux, vos squalentis lumina mundi."
556 Sic fatus, nobis alios subjunxit, ut essent
557 consortes tantorum operum sociique laborum,
558 et septem elegit decies, tamen ipse dolebat
559 exiguum numerum, neque tot satis esse ferebat
560 tanto operi, ac veluti qui centum vertit aratris
561 tellurem et campos rastris exercet avitos,
562 cum matura seges jam flavis canet aristis,
563 si desint qui messem operis (quae plurima) condant,
564 fluctuet atque viros aliis conducat ab oris.
565 Quid memorem, ut mentes hominum curasque latentes,
566 quod fieri certo nequeat sine numine, cernat ?
567 Quippe animis dubios, taciti dum vana timemus,
568 castigans dictis nos saepe erexit acerbis
569 mirantes. Quoties ipsis etiam hostibus olim
570 praedixit, quos mente dolos, quae furta pararent
571 incassum, dum caeci odiis agitantur iniquis ?
572 Femina nec latuit bis senos passa per annos
573 sanguinis immundi manans de corpore flumen.
574 Illa quidem ardentis morbi confecta dolore
575 pone sequebatur, si qua illum tangere posset,
576 hanc unam rata nempe viam restare salutis.
577 Ergo, dum pubes fluit undique et agmina inundant,
578 illa subit leviterque extremum apprendit amictum.
579 Ad tactum veter effugit de corpore morbus,
580 jamque abitum latuisse putans clam mente parabat.
581 Praesensit Deus et pavidam seseque tegentem
582 affatus placide monitis implevit amicis.
583 Vidi oculos ante ipse meos mortalia nuper
584 aut membra exutum aut perfusum luce superne ;
585 non infra solis speciem dare corpore lumen.
586 His multisque aliis, ego quae creberrima vidi,
587 per terras patuit signis Deus. Haud tamen umquam
588 sese hominem oblitus moribundo corpore cretum ;
589 multa tulit quoque, mortales quae ferre necesse est,
590 atque id sponte quidem, nobis imitanda relinquens.
591 Saepe hilares mensas ideo et convivia adivit,
592 nec coetus bonus est hominum aspernatus in urbe.
593 Saepe etiam insidias inimicae gentis et iras
594 suffugiens, ut homo male tuti limina templi
595 exiit objecitque cavam pro corpore nubem,
596 nec se in conspectum latebris dedit abditus atris,
597 dum fremerent hostes nequicquam, et saxa pararent.
598 Atque equidem memini (vix actus volvitur annus)
599 nuper Joannis comperta caede recenti
600 quem rex, uxorem praereptam reddere fratri
601 admonitus, tenebris ferro obtruncarat in atris,
602 urbibus his abiit cautus populisque relictis
603 digressus, silvae elapsus acceperere profundae.
604 Nec rex ipse Erebi, generis foedissimus hostis
605 humani, nostras qui recto avertere mentes
606 nititur, abstinuit dominove deove pepercit.

607 Forte etenim comitum strepitus turbamque sequentum
608 dum fugeret quondam, se clam subduxerat heros
609 coetibus et solus lucis degebat in altis.
610 Jamque quater denos frugum sine munere soles
611 condiderat totidemque famem per inhospita noctes
612 pertulerat, cum jam tempus ratus ecce nocendi
613 affuit extemplo multis cum millibus hostis
614 noctipotens, quos Tartareis ducebat ab antris,
615 flammea semiferi capitis gestamina quassans.
616 Jamque sui frustra spe praemia percipit astus ;
617 ergo illi meditans nequicquam illudere dictis
618 talibus aggreditur : "Superi tu certa Parentis
619 progenies verusque deus, tibi que omnia parent ;
620 quid durare fame confecto corpore pergis ?
621 Nec subito in totidem convertere adorea liba
622 haec circum quae saxa vides ingentia tentas ?"
623 Non divum latuere doli atque haec reddidit ore :
624 "Sunt mihi mortali tostae pro munere frugis
625 sermones patris auditi divinaeque verba,
626 quae, quoties animo repeto memor, effugit omnis
627 pulsa fames subito mensaeque oblita cupido."
628 Dixerat. His tamen auditis haud destitit hostis
629 congressu victus primo, pugnamque retentat
630 atque aliis super atque aliis assultibus instat ;
631 terque novos semper coepti irritus integrat astus
632 nequicquam, nunc regnorum, nunc laudis inani
633 immotum tentans animum praevertere amore.
634 Ut cum sollicitum tollunt mare fluctibus Euri,
635 crebra ferit saevitque minaci verbere in alta
636 litora, sed saxis allisa revertitur unda.
637 Nec Deus, haec subito quamvis praesentiat, arcet
638 conantem patiturque dolos sibi nectere vanos.
639 Nunc se marmorei supra fastigia templi,
640 nunc rupem supra scabrumque crepidine saxum
641 subvectari ultro sinit et spem accendit inanem.
642 Cum vero vicisse ratus jam gaudia dira
643 conciperet frustra ille inhians, se protinus heros
644 ipse deum claro confessus numine coram
645 irrita furta dolosque exhibat semper apertos.
646 Qualis, ubi excussis per plana evasit habenis,
647 liber equus ludit famulos hinc inde sequentes,
648 saepe hic dissimulans atque illic improbus haeret,
649 perque viam oblatas interdum pascitur herbas ;
650 ast ubi jam videt instantes, elabitur alteque
651 emicat et spatia transmittit maxima campi.
652 Quam speciem expertus nequicquam ubi denique sensit
653 hostis atrox, abiit victusque, deumque reliquit,
654 cui volucres centum pluma pernice ministri
655 astabant missu genitoris opemque ferebant.
656 Si vero causas odiorum ac semina quaeris
657 tantorum, cur gens omnis opponitur uni,
658 haec norint ipsi. Certe non talia gessit,
659 quae capto affingunt odiis crudelibus acti.
660 Non homines inter magis est affabilis alter,
661 non pietate prior, venia complectitur omnes.
662 Hostis, civis ei nullo discrimine habentur.
663 Multi impune ideo digna atque indigna ferenti
664 objecere, omnes nutu cum perdere posset.

665 Sera olim cum Sidoniam sub nocte per oram
666 ferret iter fessus, nos parva exclusit ab urbe
667 gens fera, nec tecto est dignata heroa precantem.
668 Nos igitur tristes supremum orare Parentem
669 aspiceret caelo nec Natum ferret inultum,
670 sed populum immitem caelesti protinus igni
671 corriperet subitis et inhospita moenia flammis.
672 Non tulit ac verbis nos indignatus amaris
673 increpuit, potiusque urbem miseratus iniquam est.
674 Saepe etiam auctores scelerum haud ignarus adibat
675 infamesque domos scelerataque tecta subibat,
676 quo moniti exuerent fastus moresque sinistros,
677 et secum inciperent paulatim assuescere recto.
678 Sic Matthaeus, agri dives sic noster et ipse est
679 Zacchaeus, centumque alii ad meliora vocati.
680 Nec tamen, id faceret dum creber, defuit olim
681 qui falli ratus incautum, pro crimine magno
682 objiceret, quod non fugeret contagia dira.
683 Ipse sed, ut medicam veluti languentibus aegris
684 ferret opem, totam quaerebat sponte per urbem,
685 sicubi mortales mentem caligine pressi,
686 quos nocte eriperet bonus ad lucemque vocaret,
687 in tenebris caeco miseratus pectore volvi ;
688 id superis, superum id magno cordi esse parenti,
689 seque ideo claro missum memorabat Olympo.
690 Insuper et caelum compleret quanta docebat
691 laetitia, aetherei quanto gens incola regni
692 acciperet plausu, si quis mortalibus oris
693 inventor scelerum atque pii contemptor et aequi
694 justitiam colere inciperet rectumque tueri.
695 Sicut ovem incautus pastor qui e millibus unam
696 amisit serae oblitam decedere nocti
697 cum gregibus, ubi per rupes perque aspera tristis
698 quaesivit dumeta diu joca cuncta volutis
699 convisens oculis, demum si forte reposta
700 pascentem valle invenit, subito arripit illam
701 sublatamque humero stabulis laetissimus infert.
702 Intranti dulces occurrunt oscula nati
703 praeripere et reducem plausu domus excipit omnis.
704 Idcirco neque colloquiis muliebribus heros
705 abstinuit, nuperque legens Samaritidos orae
706 rura sub antiquis Sicharaeae moenibus urbis,
707 viderat ad fontem venientem ut forte puellam,
708 imploravit aquam supplex putealiaque hausit
709 munera, qui pelago, qui fluminibusque sonoris
710 imperat et vastum largis rigat imbribus orbem,
711 cujus ad imperium populis sitientibus olim
712 delicuit rupes atque undis plurima fluxit.
713 Secreti nos interea mirarier omnes,
714 ipse sed admonitam atque ultro commissa fatentem
715 in lucem e tenebris altaque e nocte vocabat.
716 Saepe illi pueros aevo et florente puellas
717 florum comam pressos et molli fronde revinctos
718 summisere piae, metuunt dum cuncta, parentes,
719 quo teneris animis pulchrae virtutis amorem
720 insereret stimulisque rudes impleret honestis.
721 Impubem turbam affatus placido ore monebat
722 lustrabatque manu, ne carmina dira nocerent,

723 neve ulla infernis premeret vis edita ab oris.
724 Quin etiam elatos animo super omnia acerbis
725 urgebat dictis rebusque exempla reliquit.
726 Mecum olim socii, absentem dum quaerimus illum,
727 tendebant, fessique via consedimus omnes
728 speluncae ante fores, densis quam plurima opacat
729 frondibus et flexu ramorum proteggit ulmus.
730 Multum hic inter nos quaerentes vana moramur,
731 quis nostrum foret e numero praestantior omni,
732 dilectusve ipsi magis acceptusve magistro.
733 Mira loquar : nos ut primum ipse in limine vidit,
734 haesit acerba tuens iterumque iterumque rogavit,
735 quis sermo foret aut quaenam certamina nobis.
736 Nos contra taciti nihil hiscere, dum piget omnes
737 verborum memores, fuerant quae plurima vana.
738 Tum subito ostendens puerum, cui mollibus annis
739 laudis adhuc erat et tumidi mens nescia flatus :
740 "Nulli fas, inquit, superum aspirare beatis
741 conciliis, si non fastus dediscat inanes
742 et penitus famae exuerit contemptor amorem,
743 ceu puer hic nullam suspirat pectore laudem.
744 Non aliter caelum pateat. Prius aequore salso
745 esse queant nubes aut pisces vivere in arvis,
746 arboris aut stirpes frondescere in aetheris oris."
747 Horret adhuc animus, mihi cum fratricum poposcit
748 illum praecipuos frustra pia mater honores,
749 scilicet aetherea superi Genitoris ut aula
750 Caelicolum in medio celsa cum sede sederet
751 subnixus, propior nostrum resideret uterque
752 dextram alter juxta amplexus, laevae alter inhaerens.
753 Extemplo gravis ille obtutuque asper acerbo
754 non matrem (quid enim mater pietate merebat ?)
755 sed nos, qui vano ignaram summissimus astu,
756 corripuit meritos verbis haud mollibus urgens.
757 Usque deum premere elatos longeque superbos
758 averti, quos famae agitat, laudumque cupido.
759 Ipse ideo haud impar Genitori cum sit, et illa
760 quae Pater aequae eadem possit, tamen ora canentum
761 saepe sibi laudes genitorem vertit in ipsum,
762 nil se audere hominem supra confessus, ab alto
763 ni Pater omnipotens vires aspiret Olympo.
764 Idcirco gravibus morbis quemcumque levasset,
765 plerumque edixit ne factum proderet usquam.
766 Quove suas tegeter vires, cum tabida posset
767 ulcera corporibus solo depellere nutu,
768 aegros saepe tamen medicas legabat ad undas,
769 ut vitium exuerent omne auxiliaris aquae vi.
770 Quid referam quot eum populi, quot moenibus urbes
771 optavere sibi et voluere imponere regem,
772 mittentes trabeam sceptrumque sacramque tiaram ?
773 Ipsi etiam comites hortatu instare frequentes,
774 armatus Syriae regendam invaderet oram ;
775 mox fore continuo, ut sua sub juga mitteret armis
776 quodcumque Oceanus terrarum anfractibus ambit,
777 immensumque novis frenaret legibus orbem.
778 Cum vero hortantes urgerent, protinus ipse
779 occuluit sese montesque aufugit in altos.
780 Immanes tamen invidia et crudelibus isti

781 insurgunt odiis poenasque uno ore reposcunt,
782 uniusque petunt caput omnes. Scis quibus illum
783 huc furiis traxere, quibus clamoribus omnem
784 implerunt trepidi captam velut hostibus urbem.
785 Ipse Patris mandata obiens tulit omnia certus
786 digna, indigna pati, nam se quaerentibus ultro
787 obtulit, et noctis cum munere posset opacae
788 defendi, bis se manifestum prodidit ipse.
789 Vidi illos tamen ad capti procumbere vocem
790 attonitos terramque gravi consternere casu.
791 Nec vero sacris aut templo demit honorem
792 nec gentis leges veterumve edicta refigit,
793 quamvis visceribus monet et lustralibus extis
794 parcendum posthac, nec jam ultra caede litandum.
795 Verum alios longe ritus moremque sacrorum
796 indicat obscura verborum ambage latere,
797 legiferique aperit voces animumque magistri,
798 quodque magis mirere, sciunt et scire fatentur
799 aereas vatem venturum lucis ad auras,
800 unus qui nobis caeli invia claustra recludat,
801 e tenebrisque pios vehat alta ad sidera manes.
802 Id patribus promissum ; omnes id volvere vates ;
803 hunc animis certi exspectant. Miseri quibus atris
804 non datur in tenebris praesentem agnoscere lucem,
805 et mediis largi sitiunt in fluminis undis.
806 Nam quem non moveant, nisi prorsum aversa voluntas
807 tanta viri virtus, tot facta ingentia, talis
808 oris honos ? Ipse ut vidique hausique loquentem
809 et dulcem toto jactantem corpore amorem,
810 fortunas, patriam, genitricem, cuncta reliqui.
811 Id socii fecere. Neque hunc me deinde secutum
812 paenituit. Verum quantum ingens saepe favilla
813 surgit ab exigua semperque fit acrior ignis,
814 hujus amor tantum visus mihi crescere in horas
815 et mage cor dulci semper flammescere cura.
816 Quique adiere semel, validis compagibus haerent.
817 Nec nos aut donis aut verbis fallere crede
818 pollicitis blandis illectos. Omnia nobis
819 aspera promittit, cunctos diversa manere
820 scilicet exilia extorres passimque vagantes.
821 Promissis nec vana fides, adeo usque malorum
822 pullulat ex alia atque alia densissima silva.
823 Unius ferro tantum caput excipit ; unum
824 quisquis is est, placida clausurum lumina morte,
825 ast alios caedes omnis instare cruentas.
826 Nostra jubet nos interea contemnere opesque
827 partiri atque inopi miserorum impendere turbae
828 quos circumveniunt morbique aliorum famesque
829 pauperiemque pati rebusque assuescere egenis.
830 Multi nos ideo viderunt saepe per agros
831 aut silice in nuda projectos ducere somnos
832 aut gravidas fessos rerum decerpere aristas,
833 indomitique famem solari frugibus, undamque
834 alta haurire cavis pronos ad flumina palmis,
835 aut si quos usquam tellus dabat arida fontes.
836 Non mihi perpetuam si centum pectore ahenis
837 sufficiant vocem linguae, percurrere possem
838 quantas quoque modo aerumnas quantosque labores

839 hoc ducente animis durantes hausimus aequis.
840 Nam licet interdum penuria adaxit edendi
841 exhaustos rerumque inopes quas flagitat usus,
842 regum opibus tamen usque animos aequavimus altos
843 et mens in parvis aderat ditissima cuique.
844 Nec minus ingentem huc comitum adventare novorum
845 cernere semper erat numerum, matresque virosque,
846 omnibus idem animus quibus et mens certa sequendi.
847 Haud secus ac bellum si cui rex maximus urbi
848 indixit, jamque arma ciet, jamque agmina cogit,
849 cladem orae exitiumque ferens populisque ruinas,
850 non tantum jurata manus lectaeque cohortes
851 incedunt, sed praeterea quos dirus habendi
852 duxit amor, varia cupidos ditescere praeda,
853 agglomerant multi atque injussi castra sequuntur.
854 Non sat erant lataeque viae campique patentis
855 tot populis, iret quacumque, sequentibus ultro.
856 Saepe heros sese ingenti subducere turbae
857 et montes petere et desertos quaerere saltus.
858 Atque equidem memini, cum propter stagna profectus
859 ferret iter passimque manus praetexeret ingens
860 litora et urgeret supra densissima morem,
861 proripuit sese ac cymbam, quae forte parata,
862 insiliit, subitoque jubens praecidere funem
863 teli intra jactum liquidum processit in aequor.
864 Constitit hinc, terramque adspectans plenaque circum
865 litora, divinis affari vocibus orsus,
866 justitiaeque aperire viam et vestigia recti.
867 Hic illic stabant arrectis auribus omnes
868 interclusi undis, inhiabantque agmine longo
869 attoniti, miraque animos dulcedine capti.
870 Ipse loquebatur ; circum sedata silebant
871 aequora, ubique modo spirantibus incita flabris,
872 frondiferaeque domus avium sine murmure circum
873 stabant immotae procurvo in litore silvae.
874 Sed non interea longaevae parcere matres
875 vocibus ; illum omnes mirari insueta loquentem,
876 felicemque uteri matrem, felicia matris
877 ubera clamabant, quae talem enixa tulisset,
878 et teneris immulsisset plena ubera labris.
879 Namque docebat humi foede in tenebrisque volutas
880 ad caelum mortale genus sustollere mentes
881 et lucem aspiceret et vanis desuescere curis.
882 Tum pacem hortari : "Placidam super omnia mites
883 pacem optate viri, tumidosque remittite flatus,
884 demissique animis, nil vanae laudis egentes,
885 mortales contemnite opes, contemnite honores,
886 et duris vitam assueti parvoque beati
887 pauperiem tolerate. Brevis quaecumque voluptas
888 ista adeo atque diu nihil est mortalibus aegris.
889 Vobis haud propriae hic sedes, concessaque longum
890 regna manent meliora, graves ubi solverit artus
891 mors anima, vos stelligera pater optimus aula
892 protinus excipiet laetos melioribus oris,
893 pax ubi tranquilla et cunctarum opulentia rerum
894 et segura quies, numquam peritura voluptas.
895 Et dubitet tanta quisquam mercede laborem
896 ferre brevem terrisque sequi me sponte relictis ?

897 Ad veras emergere opes, emergere honores
 898 tendite, quos nulli casus, nulla auferat aetas.
 899 Este pii ; inter vos mentem exercete benignam,
 900 inque vicem placati animis miserescite vestri.
 901 Tum longe prohibete iras, odiisque ferendo
 902 parcite, rumoresque vagos contemnite vulgi.
 903 Nulli fas ideo accepto pro vulnere vulnus
 904 reddere, praestiterit vero pulsantibus ultro
 905 sese offerre, genisque ictum exspectare secundum.
 906 Vana alii certent armis pro laude nocensque
 907 ferrum acuant pulchramque petant per vulnera mortem :
 908 at tu mortales nullo discrimine amare
 909 disce omnes pacemque inglorius hostibus opta,
 910 nec tibi ventosae sint tanti murmura famae.
 911 Omnibus in primis sit mens interrita leti,
 912 nullaque vos animis duos vis avocet aequo.
 913 Terrenos artus homines moribundaque membra
 914 interdum exstinxisse queant et perdere ferro ;
 915 tuta anima ipsa manet durae haud obnoxia morti.
 916 Et vos omnipotens caelo Pater aspicit alto
 917 avertitque malis, cujus sine numine vestrum
 918 haud hominum quisquam valeat divellere crinem.
 919 Surnmissos vos hunc unum fas usque vereri ;
 920 huic o rite preces, huic digna piacula ferte,
 921 cui mare, cui tellus campisque patentibus aer
 922 obsequitur, nitidique tremunt plaga lucida caeli.
 923 Huic procumbite humi, prostrati huic pandite vota,
 924 vos siquidem aeternis etiam post funera poenis
 925 ipse potest sontes sub taetro urgere barathro.
 926 Nec timor admissos cuiquam sit adire leones
 927 saeclaue pictarum saevissima pantherarum.
 928 Ite mei objectu protecti nominis ; ite
 929 adversum intrepidi. Mansuescent protinus ursi
 930 vestraque parcentes allambent vulnera lingua.
 931 Quin humiles victus animis secludite curas.
 932 Observate genus pecudum, genus altivolantum :
 933 nullae illis artes, nulla illis cura futuri.
 934 Non tamen aut tegimen, victus aut copia deficit.
 935 Omnia dives alit rerum sator, omnia curat.
 936 Ille etiam injusso tellurem gramine vestit,
 937 floribus appingens sata versicoloribus arva,
 938 arboribusque comas atque umbras montibus addit.
 939 "Fraudes insidiaeque absint ac foeda libido,
 940 neve modum supra mensis gaudete paratis,
 941 desidiasque animis atque otia pellite vestris.
 942 Nec vetitos thalamos inconcessumque cubile
 943 affectate, sitisque alieni desinat auri.
 944 Quisque suis opibus contenti vivite, et ultro
 945 spes interdictas et inania ponite vota.
 946 Neve autem scelerum facies nunc persequar omnis,
 947 quid dicam quibus est cordi fraus atque libido
 948 dira juvat, ficto simulant tamen ore latentes
 949 virtutem subeuntque dolis et crimina obumbrant ?
 950 Ne, jubeo, ne talem animis assuescite pestem.
 951 Nil adeo latet, ipsa dies quin detegat ultro.
 952 Praeterea cohibete oculos ; ne quaerite vestris
 953 vulnera sponte animis. Fandi hinc compescite amorem ;
 954 saepe olim incautos non lingua coercita mersit.

955 Discite jamque ideo posthac haud falsa profari,
 956 jamque novos purgati animis inducite mores.
 957 Si qua tamen veteris culpa vestigia restant,
 958 diluite et sacris contagia vincite lymphis.
 959 Ipse ego fons veluti liquidam purissimus undam
 960 sufficiam. Properate ad aquas ; haurite liquentem
 961 matres atque viri sitientes protinus amnem.
 962 Ferte pedem huc omnes. Nec opus potantibus auro
 963 argentove : mei fontis patet omnibus unda.
 964 Sic leti vitate vias ; ita sidera aditur
 965 sidereasque domos, mutari nescia regna.
 966 Haec mihi praedixit Genitor, quae voce monerem
 967 veridica : sunt fonte mihi verba omnia ab illo."
 968 Talia dicta dabat, caeli super omnia regem
 969 placandum non visceribus, non sanguine caeso,
 970 sed votis precibusque jubens exposcere pacem.
 971 Et modus orandi quisnam foret ipse canebat :
 972 "Omnipotens genitor, sedes cui lucidus aether,
 973 sic nomen laudesque tuae celebrentur ubique,
 974 et promissa orbi incipiant procedere lustra,
 975 cum tua non minus in terris gens jussa facessat
 976 mortalis, quam caelicolae tibi in aethere parent.
 977 Nos divina hodie caelo dape reffice ab alto.
 978 Parce dehinc bonus, ut nostris ignoscimus ipsi
 979 hostibus, ac nullis adversis objice inermes
 980 tentando, prohibe a nobis sed cuncta pericla."
 981 Addidit et ventura canens, fore cum vagus olim
 982 sol claram speciem concreto lumine tectus
 983 exuat, et subito stellanti nocte perempta
 984 sufficiat nullam luna orbi argentea lucem,
 985 sanguineis faciem maculis perfusa nigrantem,
 986 praecipitentque polo passim turbata labanti
 987 sidera, quae lapsu certo spatioso feruntur.
 988 Visque ea, quae caeli irrequietos conciet orbes,
 989 desinat, incerto rapiantur ut omnia motu,
 990 atque prope avulso absiliat de cardine mundus,
 991 dum terras veluti rapidum per inania fulmen
 992 ipse iterum petat, et multis cum millibus idem
 993 adveniens hominum vitas, et crimina quaerat.
 994 Ut res promisso simul ac succenderit igni
 995 flammaram totum tempestas sparsa per orbem,
 996 continuo tellure nova caeloque recenti
 997 defunctas animas vita in sua corpora rursus
 998 evocet ad blandum lumen populosque sepulcris
 999 eliciat, secumque pios educat ad astra,
 1000 quos pater a prima praevidit origine rerum
 1001 mente suos fore et aethereo transcripsit Olympo.
 1002 Ibunt aligeri juvenes caelumque profundum
 1003 horrifico sonitu implebunt atque aere recurvo
 1004 quattuor a ventis excibunt undique gentes.
 1005 Judicis ad solium properabitur aethere toto.
 1006 Ipse alte effultus, montisque in vertice summo
 1007 arbor effulgens circumferet ora tremenda,
 1008 secernetque pios, dextraque in parte locabit.
 1009 Laeva autem coget sontes, quae plurima turba.
 1010 Qualis post hiemem exactam, cum gramine molli
 1011 pascua laeta vocant stabulis armenta reclusis,
 1012 ipse greges pastor nitidos missurus in agros

1013 sortitur ; placidas primo legit ille bidentes
 1014 dinumerans, olidasque jubet procul esse capellas.
 1015 Cernere erit liquidas longe fulgere per auras
 1016 corpora clara hominum, quibus atrae obnoxia morti
 1017 abluet omnipotens Pater, aeternumque manebunt
 1018 amplius haud rerum subjecti casibus ullis.
 1019 Nemo illam ante diem speret cum corpore sedes
 1020 aetheris, exceptis paucis quos ipse sepulcro
 1021 exurgens secum superis Deus invehet oris.
 1022 Solae animae interea tali statione fruuntur.
 1023 Contra autem sontes tenebris ac nocte prementur
 1024 aeterna, et meritas pendent per saecula poenas.
 1025 Omnia quae sera nuper mihi nocte canebat,
 1026 cum caput ipsius in gremio maerore gravatum
 1027 una eadem accumbens sponda, admotusque loquenti
 1028 saepe reclinarem, maestum solamen amoris.
 1029 Quid repetam quae saepe vagi Jordanis ad undas
 1030 ediderit ? Quae Judaeae sub montibus altis
 1031 nunc caecis vera involvens ambagibus ultro,
 1032 nunc manifesta palam claro sermone locutus,
 1033 dum populi circumstant stipantque frequentes ?
 1034 Nunc se principium rerum finemque canebat ;
 1035 nunc veri fontem atque hominum lucemque viamque
 1036 nos fortunatam prognatam hoc tempore prolem !
 1037 Nos felix tellus, nos saecula laeta tulere.
 1038 Nobis divinam vocem divina loquentis
 1039 verba haurire Dei propius saepe obtigit unis.
 1040 Scilicet hinc lustris veniet labentibus aetas,
 1041 cum seri optabunt eadem vidisse nepotes."
 1042 Talia Joannes cunctis mirantibus ore
 1043 perstabat memorans, cum protinus ecce tumultu
 1044 ingenti Solymum irrumpit manus impia, et urbis
 1045 rectorem appellant poenasque uno ore reposcunt.
 1046 Diffugiunt ambo, et magnam stat adire parentem,
 1047 ignaramque diu tantarum fallere rerum.

LIBER QUINTUS.

C_5 v.1 Insonti vero Romanus parcere capto
 2 toto corde petens, huc mentem dividit atque huc.
 3 Fama viri virtusque animo egregiique recursat
 4 oris honos, nec jam obscurum genus esse deorum.
 5 Omnia respondent auditis. Denique ad ipsos
 6 conversus Solymos fremitu tectum omne replentes,
 7 "Ite, ait, et posito mox huc certamine adeste.
 8 Sit qui pro cunctis numero delectus ab omni
 9 fando aliquis doceat, quo tandem is crimine morte
 10 mulctandus, quod tantum obstet scelus, ordine pandat
 11 insonti." Simul haec, simul illi abiire frementes

12 Christo animis certi numquam desistere vivo.
13 Parte alia, regem qui foede prodidit hosti,
14 mutatus scelus agnoscit perjurus Iudas.
15 Ah miser, infectum quam vellet posse reverti !
16 Nulla quies animo ; saevire in pectore dirae
17 ultrices caecasque ob noxam sumere poenas,
18 nec capit insanos curarum pectore fluctus.
19 Hinc secum aera manu sceleris causam attulit amens,
20 quae Solymi magno dederant in munere pacta,
21 Atque sacerdotum sacrata ad limina venit
22 vociferans : "Vestrum hoc argentum, haec munera vestra,
23 accipite ! En scelerum pretium exitiale repono.
24 Heu heu, quid demens volvi mihi ? Quo scelus ingens
25 inductus pretio admisi ? Vera dei ille
26 progenies verusque deus, nunc denique cerno ;
27 discussaeque abeunt tenebrae et mihi reddita mens est."
28 Sic fatus, simul argentum coniecit in ipsos.
29 Olli autem flentem risere ac sera videntem.
30 Infelix abit. Hinc amens caecusque furore
31 multa putat ; curae ingeminant saevitque sub imo
32 corde dolor caelique piget convexa tueri.
33 Tum secum huc illuc flammantia lumina torquens :
34 "Hem, quid agam infelix ? Quaenam quae saecula porro
35 sera adeo tantum scelus umquam oblita silebunt ?
36 Accedamne iterum supplex crimenque fatebor,
37 atque ausim veniam sceleri sperare nefando ?
38 Quo vero aspiciam vultu, quove alloquar ore
39 quem semel indignum decepimus inque merentem ?
40 Hinc igitur longe fugiam, quantum ire licebit
41 ignotusque aliis agitabo in finibus aevum ?
42 Hinc me praecipites me me hinc auferte procellae,
43 quo fugit usque dies a nobis luce peracta !
44 At quis erit tutus tandem locus ? Omnia praesens
45 aspicit ac terras deus undique fulmine terret.
46 Et me conscia mens atque addita cura sequetur,
47 sive iter arripiam pedibus seu puppe per undas.
48 Quos ? Quibus ? At moror et ludunt insomnia mentem.
49 Vos precor o mihi vos magnae nunc hiscite terrae.
50 Quid dubito ? Nunc te tangunt scelera impia, Juda
51 infelix ! Tunc debueras, tunc ista decebant
52 cum revocare pedem cum fas occurrere pesti.
53 Nunc morere atque nefas tu tantum ulciscere dextra
54 sponte tua lucemque volens hominesque relinque !"
55 Talia jactabat certus jam abrumpere vitam
56 invisam et saevum leto finire dolorem
57 curarum hanc unam metam ratus atque laborum.
58 Fluctuat atque sibi semper tellure videtur
59 absumi aut rapido de caelo afflari igni.
60 Usque adeo ante oculos capti observatur imago.
61 Pallor in ore, acies circumlita sanguine et artus
62 argentes tremunt, instantis vestigia leti,
63 et nox multa cava faciem circumvolat umbra.
64 Omnia nigrescunt tenebris caliginis atrae.
65 Demens, qui potius veniam sperare fatendo
66 non ausus, neque enim precibus non flectitur ullis
67 Rex superum et justae bonus obliviscitur irae.
68 Ergo ille inceptis perstans et sedibus haerens
69 isdem abiit silvaeque tremens successit opacae,

70 regia quae propter frondebat plurima tecta
71 atque ibi, dum trepidat, qua tandem morte quiescat
72 incertus, latebrasne animae scrutetur acuto
73 fortiter et pectus procumbens induat ense,
74 an se praecipiti jaciat de culmine saltu.
75 Ipsae quae attonitum mortisque cupidine captum
76 ducebant semper furiae infensaeque praeibant,
77 informem prona nectentes arbore nodum
78 ostendere viam. Collo namque inde pependit,
79 ut meritus, laqueoque infami extrema secutus
80 spiramenta animae eliso gutture rupit
81 et totos subito pendens extabuit artus.
82 Nondum picta novo caeli plaga mane rubebat
83 jamque sacerdotes concursu cuncta replentes
84 vestibulum juxta astabant longisque fremebant
85 porticibus. Nempe antiquo de more licebat
86 nulli luce sacra pollutum insistere limen.
87 Tandem Romulides juvenum stipante caterva
88 fascibus egreditur patriis ostroque superbus
89 et solio ante fores sedit sublimis eburno.
90 Consedere patres pariter juxta ordine et ipsi
91 atque diu siluere. Orsus dux denique fatur :
92 "Dicite quo tandem demitti crimine morti
93 poscitis egregium juvenem. Quaesivimus ipsi
94 et genus et vitam ; nil dignum morte repertum,
95 sed potius factis fama illum ingentibus effert.
96 Ut propius vinctum vidi audivique loquentem,
97 ut stupui ! Ut visus mihi nil mortale sonare,
98 cuncta deo similis vultum vocemque oculosque !
99 Aut certe deus ille, dei aut certissima proles.
100 Cedite. Ne regem vestrum ignorate volentes."
101 His dictis cunctis penitus dolor ossibus arsit
102 ingens. Infremuere omnes gemitumque dedere.
103 Tum senior surgit fandi doctissimus Annas
104 in medio et dictis exorsus talibus infit :
105 "Si tibi non aliis per se manifesta pateret
106 res signis, Romane, vel hinc dignoscere promptum
107 cuique foret teque in primis dux multa moveri
108 convenit, huc cum tot collectos undique cives
109 convenisse vides unius crimina contra.
110 Hic auctor fandi multos sermone fefellit
111 et facie, ne cede dolis, mentitur honesta
112 virtutem. Scelerum tegit alto in pectore amorem.
113 Nonne vides haec religio quo se nova vertat,
114 orgia quo coetusque et nocturni comitatus ?
115 Seditioe potens Judaeas suscitatur urbes,
116 Ausus se passim terrarum dicere regem
117 progeniemque Patris summi, cui sidera parent.
118 Atque ideo veluti Deus ultro crimina fassis
119 dat veniam poenaeque metum post funera solvit
120 quod scelus haud aliter poterit quam morte piare.
121 Sic veteres sanxere, sed et vetera ipse retractans
122 jura, novas figit simulato numine leges
123 instituitque novos ritus, nova sacra per urbes
124 quae servent seri ventura in saecula nepotes.
125 Quin ipsas haud obscura, proh, voce minatur
126 dejecturum aras seque igni templa daturum,
127 templa olim impensis tantorum structa laborum.

128 Et jamjam volet ipsum etiam restinguere solem
 129 sideraque obsesso verbis deducere caelo.
 130 Haud scelus ille tamen fallaci pectore quivit
 131 dissimulare diu, neque enim scelerata subire
 132 tecta horret, nec se vetitis conventibus aufert
 133 admonitus sociique epulis capiuntur opimis.
 134 Quin etiam, interdum si qua tota impius urbe
 135 inventus fama ante alios ob crimina notus,
 136 continuo, paribus gaudens, adit impiger illum,
 137 nec requies donec sibi conciliarit amicum ;
 138 tantus amor scelerum, tantum illi fallere cordi.
 139 Tum festis, cum fas nihil exercere diebus,
 140 ipse tamen pellit morbos aegrisque medetur.
 141 Quid memorem ut socii vetitis impune per aedes
 142 vescantur dapibus, cereremque et pocula tractent
 143 haud prius ablutis manibus sine more, sine ullis
 144 legibus immundi contactuque omnia foedent ?
 145 Scilicet omnipotens placitos tot saecula ritus
 146 retractet pater et mentem sententia vertat.
 147 Quae nova tempestas ? Eane inconstantia caelo ?
 148 Dede neci ! Ne thuricremas quibus imminet aras
 149 destruat et posthac non ausit talia quisquam.
 150 Dede neci ! Poenas sceleri impius hauriat aequas.
 151 A sacris prohibe infandos altaribus ignes."
 152 Dixerat atque omnes eadem simul ore fremebant,
 153 Romulus at dictis nequicquam flectitur ullis.
 154 Nec nova primum audit nunc crimina. Cuncta nefando
 155 scit fabricata odio dum Christi gloria et ingens
 156 sacrilegos stimulis virtus exercet amaris,
 157 atque ait : "Haec coram fama est vos saepius illi
 158 objecisse, quibus semper sermone paratus
 159 restitit et vera victor ratione refellit.
 160 Nec se progeniem superi negat ipse parentis
 161 quem vos promissum caelo divinitus olim
 162 venturum tandem auxilio mortalibus aegris
 163 non latet, ut veteres genitoris molliat iras
 164 concilians generi vestro culpamque parentum
 165 ipse sua virtute luat. Sic ferre priorum
 166 accepi monumenta, patres id prodere vestros
 167 et rebus probat ipse. Adeo circum oppida lustrans
 168 arrexit totam monstris ingentibus oram
 169 quae non ullae artes hominum, non ulla potest vis.
 170 Quin etiam in lucem quosdam revocavit ab umbris
 171 quis penitus jam mors totos immissa per artus
 172 solverat haerentes animae de corpore nexus.
 173 Quare agite o odiis miseri desuescite iniquis !
 174 Ne frustra pugnate, Deum sed discite vestrum."
 175 Dixerat. At magis atque magis violentia gliscit
 176 omnibus. Ingenti clamore insistere et una
 177 infreni saevire humerisque abscindere amictum.
 178 Nec secus increvere animis ardentibus irae
 179 quam cum Athesimve Padumve undis laeta arva parantem
 180 diluere agricolae subiti compescere tendunt
 181 aggeris objectu, praiceps magis aestuat amnis
 182 insultans victorque altas ruit agmine moles.
 183 Forte autem rex et soboles hoc tempore regum
 184 Herodes studio sacrorum advenerat urbem.
 185 Munere Romulidum pars huic amissa paterni

186 reddita erat regni Galilaeaeque oppida habebat.
187 Quem postquam accepit rector Romanus adesse,
188 solveret ingrato quo sese munere tandem,
189 transmisit Galilaeum illi vinctum Galilaeo
190 atque ipsum jussit vitamque et crimina, si qua,
191 quaerere pro meritisque viro decernere poenas.
192 Tum vero audito Christi rex nomine laetus
193 duci intro jubet, ingenti correptus amore
194 compellare virum ac propius vera ora tueri.
195 Quem dehinc aggreditur vario sermone, sed ille
196 nil contra atque oculos nusquam avertibat Olympo.
197 Ergo illum nil supra hominem miratus et ultro
198 irridens iterum jubet ad praetoria duci
199 et rursus haud laeto Romano redditur insons.
200 Hic me deficiunt animi, mens labitur aegra.
201 Horresco meminisse, Dei quae vera propago
202 pertulerit mala factus homo Deus, auctor Olympi,
203 quem mare, quem tellus vacuique patentia tractus
204 atria nec capit immensi plaga lucida caeli.
205 Aura tuo omnipotens vires mihi reffice lapsu,
206 aura polo demissa tuo hic me numine firma.
207 Haec animi victus quoties evolvere tento,
208 omnia me circum nigrescunt. Pallida cerno
209 astra caputque atra roseum ferrugine solem
210 occulere et maestum in lacrimas se solvere caelum.
211 Tantane te pietas miserantem incommoda nostra,
212 tantus adegit amor, caeli o lux clara sereni,
213 vera dei ut soboles, verus deus aethere missus
214 tam gravia haec velles perpessuque aspera ferre
215 divinumque caput terrena mole gravatus
216 subjiceres tot sponte malis ? Haec praemia ferres,
217 nostra tua bonus ut deleres crimina morte ?
218 Nos dulces Vetita decerpsimus arbore fetus,
219 tu trunco infando pendens crudele luisti
220 supplicium, o nimium nostros miserate labores.
221 Tu, quamvis deus atque dei indubitata propago,
222 heu ! Nunc haec hominum, nunc cogeris illa subire
223 arbitria in vinclis et iudicis ora vereri
224 qui toti advenies olim datus arbiter orbi.
225 Pontius ut vinctum sua rursus ad limina reddi
226 conspicit, arbitrio nec se subducere tristi
227 posse videt, saevis curarum tunditur undis
228 jamque his jamque illis iterumque iterumque retentat
229 crudeles animos et parcere nescia corda
230 irritus ac studio frustra adversatur inani.
231 Quam magis ille animis tendit sermone mederi,
232 nunc supplex placidusque, minis nunc asper acerbis,
233 tam magis accensis crudescunt cordibus irae.
234 Tandem ait : "Haec redeunt (vestrorum antiqua parentum
235 vana superstitione) certis cum sacra diebus,
236 unum ego de multis inclusis carcere suevi
237 reddere et ex artis impune emittere vinclis.
238 Hunc igitur vobis ipsum solvine jubetis
239 insontem ? Nam quem potius dimittere possim ?
240 Et jam poenarum satis ac feritatis abunde est.
241 Aut solvo aut porro vos hinc abducite et atrae,
242 ut libet, immeritum sine me demittite morti."
243 Non tulit et medium sermonem abruptis acerbans

244 crimina falsa cohors et poenas ingravat ore.
245 Forte illis Barabas populo patribusque diebus
246 invisus, quo non scelere usquam immanior alter,
247 jamdudum in vinclis poenam exspectabat acerbam.
248 Nulla fugae spes prorsus, ei via nulla salutis.
249 Huic igitur praeses vellente, an parcere Christo
250 scitatur, sperans ita tandem evadere posse.
251 Illi autem victique odiis caecique furore
252 exsolvi Barabam poscunt veniamque precantur
253 uni omnes, Christumque absumi funere tendunt
254 atque obstant summa studiis rectoris opum vi.
255 Ille autem loris caedi virgisque salignis
256 divinum mandat (visu lacrimabile) corpus.
257 "Fors, ait, innocui potero hac exstinxe cruoris
258 arte sitim ; sic immitis miserebitur hostis
259 et lacerum totos cernentes comminus artus,
260 ipsi ultro satiati animos a morte reducent."
261 Jam largo undabat foedatum sanguine corpus
262 perfusique artus tabo, liventia crura
263 collaque brachiaque et detectae verbere costae,
264 atque ejectabat crassum roseo ore cruorem.
265 Talem in conspectu populi statuere : cruentos
266 nudum humeros pectusque ambasque a poplite plantas,
267 nam medium texto velabat carbasus albo.
268 Palluit aspectu caelum ; conterrita fugit
269 cornibus obtusis sub terram argentea luna
270 nimboaque diu latitans evanuit ore ;
271 et pariter visa astra polo cecidisse sereno.
272 Non tamen hostiles explevit sanguine poenas,
273 sed magis atque magis crudescunt corda precando
274 quae non ullae artes, quae vis non mitigat ulla.
275 Immerito letum intendunt extremaque poscunt
276 supplicia infensi ; resonant clamoribus alta
277 atria. Certatim se cuncti hortantur in iras.
278 Eumenides missique inferna e nocte ministri
279 Tartarei, tenues animae, sine corpore vitae
280 circumeunt stimulosque acuunt ardentibus acres
281 et lucem eripiunt miseris agitantque furentes.
282 Romanum interea monet ipsa exterrita visis
283 per somnum conjux, juvenis ne sanguine sese
284 polluat, abstineat capto ; portenta minari
285 magna Deum in somnis : "Is erat, is candidus ille
286 agnus, ait, (numquam ludunt me somnia vana)
287 quem circumfusique canes sudibusque petebant
288 pastorum globus omnis. Eum mox omnia ademptum
289 pascuaque et notis flebant cum saltibus agri.
290 At pater altitonans manifesta percitus ira
291 desuper auctores caedis saevibat in ipsos.
292 Turbatum extemplo visum ruere undique caelum
293 et campos late ac silvas quaterre horrida grando.
294 Tum subito audita ex alto voxque acta per auras :
295 "Parce Deo, Romane, hominum compesce furorem.
296 Credo equidem hunc (non te fallit) genus esse deorum.
297 Parce manus scelerare, pio, vir, parce cruori.
298 Ipsi haec caelicolae placidi portenta refutent
299 Judaeosque petant solos generique minentur."
300 Talibus auditis Solymos animo acrior urget :
301 Romulides certus vesano obstare furori.

302 Jamque minis agit et dictis haud amplius arcet
 303 mollibus insanos et non toleranda frementes.
 304 Jamque videbatur demptis dimittere vinclis
 305 velle virum et tantis se tandem solvere curis.
 306 Sensit atrox Erebo umbrarum regnator in imo,
 307 aeternam servans memori sub pectore curam.
 308 Ingemuit, vincique animo indignatus amaro est.
 309 Protinus horriferum latebrosa ab sede Timorem
 310 evocat atrum, ingens et ineluctabile monstrum.
 311 Tristior haud ulla est umbrosis pestis in oris
 312 scilicet atque hominum egregiis magis aemula coeptis.
 313 Frigus ei comes et dejecto Ignavia vultu.
 314 Extemplo hanc superas torpentem ascendere ad auras
 315 imperat, intonsi qua molli vertice surgunt :
 316 Phoenicum montes, Solymorumque alta subire
 317 moenia, ut Ausonii flectat ducis aspera corda
 318 dejiciens subigatque metu desistere coepto.
 319 Jussa facit ; sibi nigrantis accommodat alas
 320 nocturnarum avium, inque atros se colligit artus.
 321 Jamque emensa viae tractus obscena volucris
 322 purpurei crebra ante oculos se praesidis ecce
 323 fertque refertque volans circum importuna sonansque
 324 nunc pectus, nunc ora nigris everberat alis,
 325 immisitque gelu et praecordia frigore vinxit.
 326 Diriguit visu subito atque exalbuit ille,
 327 surrectaeque comae steterunt, gelidusque per ossa
 328 horror iit. Genua aegra labant ; vox faucibus haesit.
 329 Quem, simul ac cives sensere insueta timentem
 330 pallentemque genas et toto corpore versum,
 331 his subito arrepto clamantes tempore dictis
 332 aggressi : "Iste ausus vulgo se fingere regem.
 333 Aspirat sceptris regisque affectat honores.
 334 Quem, si forte neci mavis subducere nec te
 335 crimina tanta movent, Judaeas protinus urbes
 336 seditione potens Romanis legibus omnemque
 337 artibus avertet Syriam dicione Quiritum.
 338 Res igitur tibi si curae Romana decusque
 339 Caesaris, hanc superis pestem citus aufer ab oris,
 340 hauriat ut meritas haud uno crimine poenas,
 341 ne gentem repant contagia dira per omnem."
 342 Talia perstabant uno omnes ore frementes.
 343 Dux vero expertus genus intractabile, regis
 344 palluit ad nomen (praecordia ad intima saevit
 345 subdita pestis enim) nec jam superantibus obstat
 346 amplius, et sese victus cedensque remittit,
 347 haud ultra potis insano pugnare furori.
 348 Ceu cum rostratae sese opposuere triremi
 349 protinus adversi mediis in fluctibus Euri,
 350 luctatur primum celsa de puppe magister
 351 hortaturque viros validis insurgere tonsis ;
 352 demum, ubi se niti contra intolerabile caelum
 353 incassum videt ac ventos superare furentes,
 354 vertit iter, quocumque vocat fortuna per aequor
 355 multivium atque auris parens subremigat aeger.
 356 Haud tamen abstinuit verbis vocive pepercit :
 357 "Verum vincor, ait, nec habet vestra ira regressum.
 358 In me nulla mora est : moriatur crimine falso
 359 damnatus. Vos triste manet, speroque propinquum

360 supplicium. Vos sacrilego serique nepotes,
361 o miseri, meritas pendetis sanguine poenas."
362 Sic effatus, aquam plena jubet ocium urna
363 afferri, abstergensque manus haec addidit ore :
364 "Ut nunc his manibus maculae absunt, sic mihi nullum
365 hac in caede nefas, meque omni crimine solvo."
366 Dixit, et exurgens solio intra tecta recessit.
367 Illi autem : "Deus haec nobis gnatisque reservet
368 instauretque graves poenas, quascumque meremur."
369 Haec dum porticibus populo spectante geruntur
370 vestibulum ante ipsum, famuli ducis aedibus intus
371 armati illudunt capto irridentque silentem,
372 quodque illum populi regem optavere per urbes,
373 purpureis ornant tunicis ostroque rubenti
374 atque alte effultum sublimi sede locarunt.
375 Pro capitis crinali auro regumque corona
376 sentibus obnubunt flaventia tempora acutis.
377 Pro sceptro datur insigni fluvialis arundo.
378 Tum populo laeti portis bipatientibus omni
379 ostendunt plausu magno regemque salutant.
380 Haud aliter ludo pueri cum ex omnibus unum
381 delegere ducem, sociis qui sponte subactis
382 imperitet, laeto cuncti stant agmine circum
383 condensi assurguntque omnes regisque superbi
384 jussa obeunt ludicra, ingens it ad aethera clamor.
385 Tali intus famuli indulgent manus effera ludo.
386 Dehinc juveni vestis obtentu lumina inumbrant,
387 divinumque caput palmis et arundine pulsant.
388 Hic digitis vellit concretam sanguine barbam ;
389 ille oculos in sidereos sputat improbus ore
390 immundo et pulchrum deformat pulvere corpus.
391 Nec mora nec requies : versantque agitantque ferentem
392 omnia, nec verbis ullis indigna querentem,
393 nec dare permittunt jam lumina fessa sopori.
394 O dolor, heu ! species inhonesta, indignaque visu !
395 Non silvis avibus frondes, non montibus antra
396 quadrupedum generi desunt, ubi condere sese
397 in noctem atque suos possint educere fetus.
398 At rerum auctori, caeli cui regia servit,
399 omnibus in terris deficit locus, omnibus oris,
400 quo caput acclinat fessusque in morte quiescat.
401 Tum vero Solymi victores cuncta parare
402 supplicia atque omnes poenarum exquirere formas,
403 perferat ut saevos crudeli morte dolores.
404 Jamque illum erecto properant distendere ligno
405 affixum et lenta paulatim perdere morte.
406 Nec mora, diffidunt malos. Sonat acta securis,
407 altaque quadrifidis fabricatur roboribus crux,
408 tormenti genus. Haec olim scelera impia reges
409 urgebant poena sotesque hac morte necabant,
410 difficiles miserorum obitus longique dolores.
411 Tum neque honos erat, infami neque gloria trunco ;
412 at nunc numen habet sanctum et venerabile lignum
413 suppliciter cuncti colimus sacrisque minores
414 argento atque auro contextum imponimus aris
415 et laetum ex illo memores celebramus honorem.
416 Illa etiam caelo fulgebit lampadis instar
417 aetherae et totum lustrabit lumine mundum,

418 cum dabit exitio una dies animalia cuncta
 419 interitumque feret rebus mortalibus ignis.
 420 Vix terris lux alma aderat, cum jam undique tota
 421 urbe ruit studio visendi accita juvenus,
 422 implenturque viae, concursuque omnia fervent.
 423 Et jam purpureos habitus insignia ludicra
 424 exutum, vinctumque manus clamore trahebant
 425 dirum ad supplicium magna sectante caterva.
 426 Per medios longis raptatus funibus ibat
 427 semianimisque artusque tremens plagisque cruentus
 428 nocturnis, humeroque trabem duplicem ipse gerebat
 429 praecisis gravidam nodis ac robore iniquo,
 430 qua super infando mortales linqueret auras
 431 supplicio et duros finiret morte labores.
 432 Armati circumstant, clipeataque juxta
 433 agmina densentur ; collucent spicula longe
 434 spiculaque et rubris capitum cava tegmina cristis,
 435 aereaque alterno conspirant cornua cantu.
 436 Pars pedes insequitur ; pars sese lucidus altis
 437 fert in equis ; resonant colles clamore propinqui.
 438 Multi autem, quorum melior sententia, flebant,
 439 praecipuae matresque piaae mitesque puellae,
 440 cernentes nudis pedibus per scrupea saxa
 441 tendere et offendi crebro ad salebrosa viarum,
 442 dum monte adverso protrudit robur iniquum,
 443 ad quas suspirans heros sic ore locutus :
 444 "Ne vero, ne me matres indigna ferentem
 445 flete piaae. Vobis potius deflete propinquum
 446 exitium et vestris hinc debita praemia natis."
 447 Sic fatus linquit non aequis passibus urbem.
 448 Interea superum rex tanto in cardine rerum
 449 verticis aetherei sublimem evasit ad arcem,
 450 mortalis Nati letum ut crudele videret
 451 ipse sui spectator. Eum gens incola caeli
 452 aligeri stipant cunei et comitantur euntem.
 453 Est templum gemmis interlucentibus auro
 454 e solido factum sublimi in vertice Olympi,
 455 tectum immane, ingens, superi penetrabile parentis,
 456 sidera despiciens subterlabentia mundi.
 457 In medio divus duro ex adamante tumescit,
 458 paulatim exacuens instar fastigia pinus ;
 459 multiplices circum sedes subterque supraque
 460 dispositae gradibusque novem super aethera surgunt.
 461 Conveniunt huc caelicolae, regemque canendo
 462 ingressi thiasis lustrant ; se sedibus inde
 463 omnes composuere suis, tumulumque corusci
 464 ter late circum terna cinxere corona
 465 secreti ordinibus certis ; neque enim omnibus aequa
 466 conditio viresque pares eademque potestas ;
 467 verum, aliis alii ut praestant, ita rite locantur
 468 munere quisque suo contenti ac sorte beati.
 469 In medio pater omnipotens solio aureus alto
 470 sceptrum tenet, lateque acie circum omnia lustrat
 471 totus collucens, totus circum igne corusco
 472 scintillans radiisque procul vibrantibus ardens.
 473 Mox autem infaustis Judaeae lumina tantum
 474 defixit terris, tristemque ante omnia collem
 475 spectabat. Gens maesta simul spectabat Olympi

476 collem infelicem, sacram egredientibus urbem
 477 qui prior occurrit, humanis ossibus albus.
 478 Auctores scelerum poenas ibi morte luebant
 479 infirmi ; circum pendebant corpora passim
 480 arboribus truncis incocto lurida tabo.
 481 Huc simul atque emensus iter miserabilis heros
 482 pervenit sensitque sibi crudele parari
 483 supplicium atque trabem vidit jam stare nefandam,
 484 dejectos oculos porro huc jactabat et illuc,
 485 omnia collustrans, comitum si forte suorum,
 486 si quem forte acies inimicas cerneret inter.
 487 Fidum in conspectu nullum ; videt agmina tantum
 488 saeva virum campique armis fulgentibus ardent.
 489 Cari deseruere omnes diversa petentes,
 490 non aliter quam cum caelo seu tactus ab alto
 491 pastor, sive ferae insidiis in valle peremptus,
 492 continuo sparguntur oves diversa per arva
 493 incustoditae, resonant balatibus agri.
 494 Jamque trabem infandam scandens pendensque per auras
 495 horruit atque, Deum veluti se oblitus, acerbi
 496 pertimuit dirum leti genus ; aestuat intus,
 497 atque animum in curas labefactum dividit acres,
 498 tristia multa agitans animo, totosque per artus
 499 pallentes mixto fluit ater sanguine sudor,
 500 et patriam crebro reminiscitur aetheris aulam.
 501 Tum caelum aspectans haec imo pectore fatur :
 502 "Heu, quianam extremis genitor me summe periculis
 503 deseris ? Aut gnati quo jam tibi cura recessit ?"
 504 Audiit has summus voces Pater ; audiit omnis
 505 caelestum chorus. Ipse (alta secum omnia mente
 506 versabat genitor, nutu haud oblitus agi rem
 507 nempe suo) stetit immotus seseque repressit.
 508 At circumfusos coetus, gentem aetheris alti
 509 aligeram, injussos potis est vis sistere nulla.
 510 Omnibus exarsit subito dolor ; omnibus ingens
 511 aestuat ira. Volunt nato succurrere herili
 512 et prohibere nefas duroque resistere ferro.
 513 Bella cient ; arma ingeminant arma acrius omnes.
 514 Hic puer, haud volucris extremus de gente, recurvo
 515 aere vocare acies quo non magis utilis alter,
 516 ascensu superat celeri ardua culmina praepes,
 517 tum super axe sedens roseique in vertice caeli,
 518 signa canit belli. Latus dissultat Olympus
 519 undique, et insolito tremuerunt sidera motu.
 520 Audiit et sonitum, si quem procul orbe remoto
 521 distinet incedens humili luna humida gressu.
 522 Audivere, quibus generis custodia nostri
 523 in terris olim sorti data, vastaue tellus
 524 protinus ingenti tremuit concussa fragore.
 525 Tum quos rex superum varias legarat in oras,
 526 aereos relegunt tractus mandataque linquunt
 527 imperfecta fugaue poli super ardua tendunt.
 528 Ac velut in pastus celsa quae sede columbae
 529 exierant varios, cum tempestate repente
 530 urgenti caeco misceri murmure caelum
 531 incipit et nigrae cinxerunt aethera nubes,
 532 continuo linquunt arva undique et ardua pennis
 533 tecta petunt celeresque cavis se turribus abdunt.

534 Jam passim ingentis properatur vertice Olympi
 535 et toto ancipitis ferri caelo ingruit horror,
 536 aeratique sonant currus, gemitusque rotarum
 537 audiri sonitusque armorum desuper ingens.
 538 Tam vastos motus axis miratur uterque,
 539 miranturque ignes caelique volubilis orbis,
 540 cum tenues animae, cum sint sine corpore vitae,
 541 sensibus a nostris quibus est natura remota.
 542 Saepe autem, seu mortales mittuntur ad oras
 543 sive opus in fratres olim capere arma rebelles,
 544 corporis afficti sibi quisque accommodat alas
 545 aereosque artus, simulacrumque aptat habendo,
 546 spiritus ut queat humanos admittere visus.
 547 Ergo illi rapido circumdant turbine densa
 548 corpora sub nostros etiam venientia sensus,
 549 circumdantque humeris desueta micantibus arma
 550 aetheris aerisono subito de poste refixa
 551 caelicolum exuvias, belli monumenta nefandi,
 552 quod socios olim contra gessere furentes.
 553 Hic bonus armatur jaculis hastamque trabalem
 554 crispat agens ; rapit ille faces ; rapit ille sagittas
 555 suspenditque humeris lunatum ardentibus arcum,
 556 atque alius palmas insertat caestibus ambas ;
 557 pars tereti funda dextram implicat. Omnibus ensis
 558 aureus in morem vagina pendet eburna,
 559 infrenant alii caeli per caerula currus ;
 560 cetera pars pictis librare celerrima pennis
 561 corpora : non eadem vis omnibus ipsa volandi.
 562 Mobilitate vigent varia : pars remigat alis
 563 binis alternante humero ; pars ordine ad auras
 564 tollunt se triplici pennatis undique plantis.
 565 Haud unam in faciem, sed nec color omnibus idem.
 566 Namque hos punicea cernas effulgere pluma
 567 flammipedes, igni assimilés rutilantia terga,
 568 herbarum hos speciem viridesque referre smaragdus,
 569 terga illis croceo lucent circumlita luto ;
 570 centum aliis alii pinxere coloribus alas.
 571 Qualis ubi exactos post aestus arbore ab omni
 572 exornat pomis se versicoloribus annus,
 573 et caput Autumnus circumfert pulcher honestum.
 574 Et jam pennipotens liquidis exercitus ibat
 575 tractibus, ac volucris cingebant agmine caelum,
 576 millia quot numquam nascentum ab origine rerum
 577 visa hominum in terris coisse, ter agmina terna,
 578 terque duces terni. Toto dux vertice supra est,
 579 nuper Iapygii Gargani e vertice vectus
 580 armipotens, veteris quem quondam gloria pugnae
 581 sublimem longeque alios super extulit omnis.
 582 In medio ibat ovans, galea cristisque superbis
 583 aureus et longe gemmis lucentibus ardens.
 584 Nunc etiam spolia edomiti fulvamque draconis
 585 pellem ostentabat spiris ingentibus, ipsumque
 586 innixus tergo pedibusque hastaque premebat.
 587 Arma procul radiant ; umbo vomit aureus ignes,
 588 stellantique procul micat ensis jaspide fulgens.
 589 Ventum erat ad caeli portas. Hic omnibus irae
 590 incaluere magis, belli ut monumenta prioris
 591 sunt oculis oblata. Vident nam turribus altis

592 pendentes currus suspensaue postibus aera,
 593 spiculaue et clypeos, victis de fratribus arma
 594 olim, immane nefas ! Caelo crudeliter orsis,
 595 dum frustra aspirant sceptris felicis Olympi
 596 immemores victique animis et vana tumentes,
 597 quos ipsi contra steterant meliora secuti,
 598 aethereque expulerant certamine debellatos.
 599 Quam pugnam in foribus quondam caelarat aenis
 600 artificum manus atque operoso impresserat auro.
 601 Cernere erat liquidas caeli pendere per auras
 602 hinc acies atque hinc acies certamen adortas,
 603 nunc huc, nunc illuc ultro citroque volare,
 604 aetheraue in medio venientibus obscurari
 605 missilibus, jamjam certari cominus armis,
 606 miscerique acies et jam, quis spicula deerant,
 607 crinibus implicuere manus hostilibus uncas,
 608 suspensosque comis circum per inane rotabant.
 609 Jamque hos paulatim concedere, desuper illos
 610 urgere aspicias, donec toto aethere versi
 611 palantesque fugae simul hostes terga dedere,
 612 praecipiti assimiles nimbo atque procacibus Austris.
 613 Nam pater omnipotens armatus fulmine dextram
 614 deturbabat agens flammisque sequacibus arce
 615 siderea excussos Erebi domus atra recepit.
 616 Pugnae igitur superi admoniti veterisque tropaei
 617 aetheris ardebant fractis erumpere portis.
 618 Jamque adeo evassent omnes terrisque potiti
 619 sontem incendissent oram, jamque urbibus igni
 620 correptis, Judaea nocens, commissa luisses,
 621 ni pater altitonans stellanti nixus Olympo
 622 (motus enim tanto subito flagrante tumultu)
 623 coepta redargueret verbisque inhiberet acerbis
 624 bellum importunum, cunctis haud mollia mandans.
 625 Nam circumspiciens, sibi centum astare ministras
 626 virgineas volucrum humana sub imagine formas
 627 hinc atque hinc videt et nutum observare paratas.
 628 Quarum quae placido mitis clementia vultu est,
 629 eligitur numero ex omni, cui talia mandet :
 630 "Vade, ait, et volucris per caelum labere curru.
 631 Fratibus haec fer dicta tuis. Non aetheris illis,
 632 non illis vasti commissas orbis habenas,
 633 ut ferro injussas meditantibus edere pugnas
 634 omne ausint miscere meo sine numine caelum
 635 terramque et tantos animis accendere motus.
 636 Considerant, positisque adsint huc ocius armis."
 637 Dixerat. Illa viam raptim secutae alite curru
 638 et Patris ingentes passim denuntiat iras,
 639 ni redeant positisque quiescant protinus armis.
 640 Addunt se comites Pietas Paxque aurea ; ita una
 641 Spesque Fidesque piique parens placidissima Amoris
 642 omnibus in manibus rami canentis olivae.
 643 Quaque egere viam, videas procul illicet arma
 644 projicere et studiis cunctos mitescere versis.
 645 Jamque in conspectu positus exercitus armis
 646 regis adest, dicto parentes. Sede locarunt
 647 ordine sese quisque suas pariterque quierunt,
 648 hic tum nimbipotens genitor circumtulit ora.
 649 Ter torquens illustre caput, ter cardine moto

650 terribilem increpuit sonitum ; dein farier inquit :
651 "Quae superi vetitum contra haec insania ferri ?
652 Quo ruitis ? Quia ne auxilio subsistere nostro
653 non queat ille, meae aut sint fractae denique vires ?
654 Ne saevite animis atque hanc deponite curam,
655 quandoquidem haud fert haec nostro sine numine Natus,
656 scitis enim ut moriens crimen commune refellat.
657 Sic generi humano clausum stat pandere Olympum.
658 Illum ideo duros volui exercere labores
659 atque agere in terris extrema per omnia vitam,
660 finibus exactum cunctis, inopem, omnium egentem.
661 Jamque ad supremum ventum. Manet exitus illum
662 hic hodie gravis insontem, irrevocabile letum,
663 et morti caput ipse sua sponte obvius offert.
664 Nunc autem subito visu horruit et timor illi
665 confusam eripuit, leti ipso in limine, mentem.
666 Quippe, Deum velut exutus, mortalis, inermis
667 restitit et telis mansit violabile corpus.
668 Nil aliter vis divinos valuisset in artus
669 ulla hominum, et cunctis foret impenetrabilis armis.
670 Non adeo vires, non parva potentia nostra,
671 ut nequeam, si versa retro sententia, Natum
672 eripere in medio versantem turbine leti,
673 contra illum insurgant omnes, ab origine rerum
674 quidquid ubique hominum natum exstinctumque per aevum
675 non ita me experta est Babylon, ubi ad astra gigantes
676 tentavere vias educta turre sub auras,
677 et poterant magnos manibus divellere montes ;
678 nunc etiam fumant prae fractae fulmine turres.
679 Ut nimborum acies tempestatumque quiescant,
680 quae vastum rapiant convulsum a cardine mundum,
681 ipse manu terras quaterem, caelum omne cierem
682 diluvio cuncta involvens. Me me ignibus atris
683 nunc nunc accinctum teloque tricuspide dextram
684 armatum mortale genus saevire videret,
685 hunc difflare globum, haec passim metere agmina ferro.
686 At sinite, adveniet (neque enim mora longior) urbi
687 tempus ei, frustra hunc cum magno optaverit emptum
688 haud tetigisse, genus cui ducitur aethere ab alto."
689 Sic ait, et moto tremefecit vertice mundum,
690 terrifico quatiens tonitru caelestia templa.
691 Continuo superum furor acer et ira quievit.
692 Prosequitur tantum votis chorus omnis amicis,
693 atque deum e summo taciti miserantur Olympo.
694 Sicut ubi inclusi saeptis vacuo aequore campi
695 pro laude ac decore accensi certamina miscent
696 inter se aequatis juvenes duo comminus armis ;
697 hinc spectat procul atque hinc circumfusa juvenus.
698 Tum si forte alter minus ac minus utilis, ore
699 palluit aut terra cecidit deceptus iniqua,
700 consumant fidi aequales studiisque sequantur.
701 Quam vellent, nisi pacta vetent, succurrere amico !
702 Stant aegri et casum longe exsecrantur acerbum.
703 Haud secus indefensus, inermis restitit heros.
704 Illum nudum humeros, nudum omne a vertice corpus,
705 directum longo malo applicuere furentes.
706 Nuda dehinc tendunt transverso brachia ligno
707 diversaque ambas affigunt cuspede palmas

708 hinc atque hinc ; mucrone pedes terebrantur eodem
709 confixi. Largum manat de stipite flumen.
710 Instant vi multa. Ferro ardua robora adacto
711 dant gemitum ; reboat diro stridore supinus
712 mons circum ingeminans ictusque resultat imago.
713 Tum supra caput et nomen patriamque necisque
714 inscripsere notis variis in stipite causam.
715 Dextra autem laevaue duos gemina arbore fixos
716 addiderant socios quos ob commissa merentes
717 leges supplicium ad justum poenamque vocabant.
718 Verum ipsum amborum in medio longe altius arbos
719 extulerat, veluti scelerum exhortator et auctor
720 aut furtis foret ante alios immanior omnes.
721 Infelix Solyma, infelix Judaea propago !
722 Ultro infesta piis, non ipsis vatibus aequa !
723 Haec digna hospitia, has sedesque torosque parasti
724 caelicolum regi ? Hos socios, hunc addis honorem
725 qui mortale genus propter delapsus Olympo
726 sponte sub humana lustravit imagine terras ?
727 Hic genus ipse tuum Phariis eduxit ab oris
728 et pedibus salsas dans ire impune per undas,
729 marmoreum tibi stravit iter pontumque diremit.
730 Idem etiam te caelesti dape pavit euntem
731 per deserta tuos miseratus vastalabores.
732 Hujus ope hausisti dulcem de caute liquorem,
733 cum procul et fontes et liquida flumina abessent.
734 Hic te posthabitis aliis longe omnibus unam
735 gentibus elegit, meritis quam ad sidera ferret
736 muneribusque suis sublimes aequaret Olympo.
737 Promeritum his cumulas donis ? Haec digna rependis ?
738 Non vatium voces, non te miracula rerum
739 ulla movent aut non praesentia numina sentis ?
740 Cui umquam scelerum auctori tam dira parasti
741 supplicia, aut usquam quis tam crudeliter hosti
742 acceptus tales luit alter corpore poenas ?
743 Jamque trahi applicitus tergo alte haerebat. In illum
744 versi omnes observabant quae funere in ipso
745 signa daret quae spes aut quae fiducia victo.
746 Ille autem tacitus jamdudum cuncta ferebat
747 immotusque. Decor roseo nondum omnis ab ore
748 cessit, adhuc oculis divinum est cernere honorem ;
749 tantum respersusque genas pallentiaque ora
750 humectat cruor et mixto cum pulvere sudor
751 plurimus infectique rubent in sanguine dentes.
752 Qualis, qui modo caerulea perfusus in unda
753 Lucifer astrifero radios spargebat Olympo,
754 si mundi species violetur clara sereni
755 et subita incipiat caelum pallescere nube,
756 nondum omne occuluit jubar obtusaque nitescit
757 pulcher adhuc facie et nimbo tralucet in atro.
758 Interea matris, quam magnam nuper ad urbem
759 traxerat incertus rumor, certissimus aures
760 nuntius implevit natum extra moenia duci,
761 ad mortemque rapi captum insidiisque subactum.
762 Palluit infelix mediisque in vocibus artus
763 dirigit, licet haec Patris sciat omnia certo
764 consilio fieri atque ipsius numine Nati ;
765 altius ingenti tamen exsuperante dolore

766 cuncta oblita ruit. Resonant plangoribus aedes
 767 femineis. Frustra lacrimantem et acerba gementem
 768 solantur fidae comites jamque illa per urbem
 769 atque huc atque illuc errat tristemque requirit
 770 indefessa locum ; nunc hic, nunc haesitat illic
 771 vestigans oculis atque auribus omnia captans,
 772 sicubi concursum voces aut hauriat ullas.
 773 Ac veluti pastu rediens ubi vespere cerva
 774 montibus ex altis ad nota cubilia, fetus
 775 jamdudum teneri memor, omnem sanguine circum
 776 sparsum cernit humum catulos nec conspicit usquam ;
 777 continuo lustrans oculis nemus omne peragrat
 778 cum gemitu ; tum si qua lupi, si qua illa leonis
 779 raptoris signa in triviis conspexerit, illac
 780 insequitur tota observans vestigia silva
 781 perque viam passim linquit pede signa bisulco.
 782 Haud aliter, simul atque jugo prospexit in alto
 783 collis oliviferi, late qui maximus urbi
 784 incubat, ingentem concursum et lucida circum
 785 spiculaque clypeosque et fulgentes equitatus,
 786 per medios ruit et cursum extra moenia torquet.
 787 Illam porticibus spectant altisque fenestris
 788 effusae matres longe et miserantur euntem.
 789 Jamque hos jamque ruens cursu praevertitur illos,
 790 ungula crebra licet volucrum proculcet equorum.
 791 Addunt se flenti comites pariterque sequuntur
 792 fidus Joannes cum matre atque innuba Martha
 793 et soror et Salome et conjux aegra Cleophae ;
 794 cunctae atro pariter velatae tempora amictu.
 795 Ecce autem videt infando jam proxima monti
 796 erectamque trabem et scalas defixaque signa.
 797 Quamvis nescit adhuc quae sint ea robora porro,
 798 horruit illa tamen metuens et pectus honestum
 799 terque quaterque manu tundens pectusque caputque :
 800 "Hei mihi, nescio quid moles atque illa minatur
 801 machina, triste inquit, gentis scio acerba furentis
 802 circumfusa odia et genus undique Judaeorum,
 803 jamdudum nobis infensum, exposcere poenas.
 804 Hoc erat, hoc tota insomnis quod nocte videbar
 805 cernere signum, olim Isacidae quo summa notarunt
 806 limina quisque suum, fuso agni rite per aedes
 807 sanguine post longa exsilia indignosque labores
 808 Niliacis moniti furtim decedere terris."
 809 Haec memorans simul ibat. Eam sine more ruentem
 810 rumpentemque aditus per tela, per agmina densa,
 811 rejiciunt clypeorum objectu et longius arcent.
 812 Jam magis atque magis non vani signa timoris
 813 clarescunt propiusque in vertice conspicitur crux,
 814 ingens, infabricata et iniquis aspera nodis.
 815 Ut vero informi mulctatum funere natum
 816 affixumque trabi media jam in morte teneri
 817 aspexit coram infelix, ut vidit aena
 818 cuspide trajectas palmasque pedesque,
 819 vulnificisque genas foedataque tempora sertis,
 820 squalentem ut barbam, turpatum ut sanguine crinem,
 821 dejectosque oculos dura jam in morte natantes,
 822 inque humerum lapsos vultus morientiaque ora ;
 823 Alpino stetit ut cautes in vertice surgens,

824 quam neque concutiunt venti neque saeva trisulco
 825 fulmine vis caeli, assiduus neque diluit imber
 826 hispida, cana gelu longoque immobilis aevo.
 827 Ipsi illam montes, ipsa illam flumina longe
 828 videre ingentem fessae miserata dolorem,
 829 eque sacro aereae lacrimarunt vertice cedri.
 830 Filius at postquam pinu conspexit ab alta
 831 dilectam genitricem, animi miseratus in illa,
 832 ut potuit, subito morientia lumina fixit
 833 semianimis dulcemque oculis respondit amorem.
 834 Mox sic exsanguem visu victamque dolore
 835 affari extremum curasque avertere dictis :
 836 "Hactenus, o mulier, stetimus. Non te tamen aegram
 837 tantus edat tacite dolor. Haud sine mente Parentis
 838 haec ferimus, solo qui temperat omnia nutu.
 839 Hic tibi pro nato - adnotum nam forte Parentis
 840 vidit Joannem lacrimantem et multa gementem -
 841 semper erit." Juvenem mox idem affatur amicum :
 842 "Haec tibi erit genitrix. Oro tutare relictam
 843 tu saltem et matris serva communis amorem."
 844 His dictis lacrimas percussis mentibus hostes
 845 non ipsi tenere ; ferae ingemuere cohortes.
 846 Hic demum matri rediit vox faucibus aegrae
 847 ingentemque dedit gemitum. Tum robora largo
 848 tristis inexpletum lacrimans lavit humida fletu,
 849 et tales amplexa trabem dabat ore querelas :
 850 "Nam quem te miserae matri, pulcherrime rerum
 851 nate, refers ? Talin' voluisti occumbere leto ?
 852 Nec tibi noster amor subiit, ne funera adires
 853 talia, ne culpam alterius hac morte piases
 854 et letale dares miserae sub pectore vulnus ?
 855 Heu ! quem te, nate, aspicio ? Tuane illa serena
 856 luce magis facies aspectu grata ? Tuine
 857 illi oculi ? Quae tam scelerata insania tantum
 858 ausa nefas ? Heu ! quam nato mutatus ab illo
 859 cui nuper manus impubis omnisque juvenus
 860 occurrit festam venienti laeta per urbem,
 861 perque viam ut regi velamina picturata
 862 arboreasque solo frondes et olentia sarta
 863 sub pedibus stravere, Deum omnes voce fatentes ?
 864 His exornatum gemmis, hoc murice cerno ?
 865 At non certe olim praepes demissus Olympo
 866 nuntius haec pavidae dederat promissa puellae !
 867 Sic una ante alias felix ego, sic ego caeli
 868 incedo regina ? Mea est haec gloria magna,
 869 hic meus altus honos ? Quo reges munera opima
 870 obtulerunt mihi post partus ? Quo carmina laeta
 871 caelestes cecinere chori, si me ista manebat
 872 sors tamen, et vitam cladem hanc visura trahebam ?
 873 Felices illae natos quibus impius hausit
 874 insontes regis furor ipso in limine vitae,
 875 dum tibi vana timens funus molitur acerbum.
 876 Ut cuperem te diluvio cecidisse sub illo !
 877 Hos, hos horribili monitu trepidantia corda
 878 terrificans senior luctus sperare jubebat
 879 et cecinit fore, cum pectus mihi figeret ensis.
 880 Nunc alte mucro, nunc alte vulnus adactum.
 881 Saltem huc ferte oculos, vos o quicumque tenetis

882 hac iter et comitem dulci me reddite nato,
 883 quando nulla mihi superant solacia vitae
 884 atque meo major nusquam dolor. Addite meme
 885 huic etiam, si qua est pietas, et figite trunco.
 886 Aut vos o montesque feri, quaeque ardua cerno
 887 me supra frondere cacumina, parcite, quaeso,
 888 vos saltem. Vos, o nostro exsaturata dolore
 889 respicite et miserae tandem succurrite matri.
 890 Nunc, nunc praecipiti casu convulsa repente
 891 in me unam ruite et tantos finite labores."
 892 Hos virgo atque alios dabat ore miserrima fletus,
 893 nec comites possunt flentem illam abducere fidae.
 894 Attamen armati morienti illudere pergunt
 895 (estque hosti duro in bello multo optimus hostis) ;
 896 crudeli quassant risu caput. Undique circum
 897 insultant tolluntque has laeti ad sidera voces :
 898 "En, qui se caelo missum superique parentis
 899 progeniem jactat temploque urbique minatus
 900 seque Deum factor fandi mentirier audet.
 901 I, sequere, illiusque pius nunc numen adora !
 902 Qui multos leti eripuit de faucibus olim,
 903 non potis ipse sibi tali in discrimine adesse.
 904 Falsus abest illi longe, nec talia curat
 905 nunc genitor. Sane infami nunc liber ab orno
 906 desiliat, si numen habet, vincla omnia rumpat.
 907 His quoque nos signis missum credemus Olympo !"
 908 Talia jactabant mediaque in morte dolore
 909 semianimem hoc etiam cumulabant. Cuncta ferebat
 910 ille animi invictus. Saevis clementius aequo
 911 hostibus orabat veniam Patremque rogabat
 912 parceret ignaris rerum caecisque furore.
 913 At vero inter se adversis decernere dictis
 914 auditi, poenas qui juxta ob furta luebant
 915 supplicio aequali juvenes gemina arbore fixi.
 916 Alter enim furiis longisque doloribus actus
 917 ipse etiam verbis morientem heroa superbis
 918 stringebat miser ac tales dabat ore loquelas :
 919 "I nunc, et templi multa constructa virum vi
 920 demolire adyta et post tris rursus erige lucas.
 921 Nunc, tibi si genus e summo traheretur Olympo
 922 eque Deo Genitore fores, ut te ipse ferebas,
 923 his te nos pariterque malis prohibere liceret.
 924 Verum, omnes quando jactasti vana per urbes,
 925 nobiscum moriere, Dei mentita propago."
 926 Non tulit haec alter dextra qui in parte propinquus
 927 jam morti pendebat et haec extrema profatus :
 928 "Infelix, quae tanta animo dementia sedit ?
 929 Nos ambo merito luimus peccata. Sed insons
 930 proditur hic odiis. Quin nos commissa fatentes
 931 aequius hic fuerat veniam pacemque precari."
 932 Sic ait. Hinc divum conversus lumina in ipsum
 933 talibus orabat : "Superi tu certa parentis
 934 progenies (nam celsa manent te sidera), ab alto
 935 respice me et dexter morienti protinus adsis !"
 936 Annuit et verbis Deus est dignatus amicis :
 937 "Tu partem laudis capies, tu gaudia mecum.
 938 Quae me cumque hodie, una eadem te regna beatum
 939 accipient, ait : astra alacri jam concipe mente."

940 Vix ea, nam vitae labentis fine sub ipso,
941 dum luctante anima fessos mors exuat artus,
942 aestuat. It toto semper de corpore sudor
943 largior et siccas torret sitis arida fauces.
944 Tum vix attollens oculos jam morte gravatos
945 exiguum sitiens laticem suprema poposcit
946 munera. Vix tandem corrupti pocula Bacchi
947 inficiunt felle et tristi perfusa veneno,
948 ingratosque haustu succos, inamabile virus
949 arenti admorunt morientis arundine linguae.
950 Quae, simul extremo libans tenuis attigit ore,
951 respuit, atque diu labris insedit amaror.
952 Interea magno lis est exorta tumultu,
953 dum tunicam, nato genitrix quam neverat olim,
954 partiri inter se famuli certamine tendunt
955 exuviasque petunt ; sed erat haud sutilis ipsa
956 vestis et in partis ideo non apta secari.
957 Sorte trahunt igitur concordēs : sic fore quondam
958 praedixere sacri corda haud improvida vates.
959 Jamque fere medium cursu trajecerat orbem,
960 cum subito ecce polo tenebris caput occulit ortis
961 sol pallens, medioque die (trepidabile visu)
962 omnibus incubuit nox orta nigerrima terris,
963 et clausus latuit densis in nubibus aether,
964 prospectum eripiens oculis mortalibus omnem.
965 Hic credam, nisi caelo absint gemitusque dolorque,
966 aeternum genitorem alto ingemuisse dolore
967 sidereosque oculos terra avertisse nefanda.
968 Signa quidem dedit et luctum testatus ab alto est.
969 Emicuerē ignes ; diffulsit conscius aether,
970 Concussuque tonat vasto domus ardua Olympi
971 et caeca immensum percurrunt murmura caelum.
972 Dissiluisse putes divulsi moenia mundi,
973 sub pedibus mugit tellus ; sola vasta moventur ;
974 tecta labant ; nutant succussae vertice turre.
975 Obstupuere humiles subita formidine gentes
976 et positae extremis terrarum partibus urbes.
977 Causa latet, cunctis magnum ac mirabile visum,
978 et populi aeternas mundo timuere tenebras
979 attoniti, dum stare vident caligine caelum.
980 Ipsam autem propior Solymorum perculit urbem
981 ac trepidas stravit mentes pavor. Undique clamor
982 tollitur in caelum ; sceleris mens conscia cuique est.
983 Templā adeunt subito castae longo ordine matres ;
984 incedunt mixti pueri intactaeque puellae,
985 perque aras pacem exquirunt, quas ture vaporant
986 suppliciter, sacrisque adolent altaria donis.
987 Ecce aliud caelo signum praesentius alto
988 dat Pater altitonans et templum saevit in ipsum.
989 Velum latum, ingens, quod vulgi lumina sacris
990 arcet inaccessis, in partis finditur ambas,
991 et templi ruptae crepuere immane columnae.
992 Jamque deus rumpens cum voce novissima verba
993 ingenti horrendumque sonans : "En cuncta peracta !
994 Hanc insontem animam tecum, Pater, accipe !" Dixit,
995 supremamque auram ponens caput exspiravit.

LIBER SEXTUS.

C_6 v.1 Jamque nigrescenti properabat vesper Olympo.
 2 Corpora adhuc stabant inhumata infletaque cano
 3 vertice, stipitibusque etiam nunc fixa manebant.
 4 Talia Josephus veniens Arimathide ab ora
 5 non tulit egregiusque animi praestansque juvena
 6 et bellis assuetus, agri ditissimus idem
 7 atque auri. Is Christi miratus maxima facta
 8 addiderat comitem modo se, quocumque vocaret.
 9 Ergo dum silvis alii formidine turpi
 10 speluncisque vagi passim conduntur in altis,
 11 protinus ipse animi intrepidus fretusque juvena
 12 aggreditur gentis rectorem ac talia fatur :
 13 "Optime Romulidum, te cari in caede magistri
 14 quem gens nostra odiis leto mulctavit iniquis
 15 fama pias servasse manus caecumque furorem
 16 adversus totis nequicquam viribus isse.
 17 Scis falsa exceptum sub prodicione quod illis
 18 obstaret coram scelera urgens impia verbis.
 19 Quod potes, exanimum terrae succedere corpus
 20 da saltem, sociis casus solamen acerbi.
 21 Ipse novo condam mihi quod de more paravi
 22 funera mecum animo dum verso incerta, sepulcro."
 23 Pontius haec contra : "Ut potius concedere vivum
 24 nunc corpus cuperem ! Vos veri conscia testor
 25 numina, tentavi versans mecum omnia, si qua
 26 insontem morti excipere ac dimittere possem.
 27 Et nobis pietas colitur sanctique penates.
 28 Sed nihil invita tandem profecimus urbe ;
 29 crudelis vicit gentis furor. Ite, sepulcro
 30 muneribusque pii exanimum decorate supremis."
 31 Dixerat. Ille gradus montis contendit in altos,
 32 cui sese comitem jungit Nicodemus et ipse
 33 multum animo cari concussus funere amici.
 34 Jamque propinquabant paribus vestigia curis
 35 figentes, unde infaustus de colle videri
 36 jam poterat locus. Ecce autem fulgentia circum
 37 arma vident cinctumque armato milite clivum.
 38 Nam, ne luce sacra pendentia corpora truncis
 39 solemnem funestarent laetae urbis honorem,
 40 primorum missu armati venere ministri,
 41 semineces qui stipitibus de more reflexos
 42 hoc ipso injecta tumularent vertice arena.
 43 Stabant, supplicium meritum qui hinc inde luebant
 44 semianimes et adhuc spirantes funere in ipso
 45 optabant duros leto finire labores
 46 et montem implebant lacrimosis vocibus omnem.
 47 Protinus hinc atque hinc longis hastilibus instant
 48 armati franguntque viris tabentia crura
 49 et miseris mortem properant trabibusque refigunt ;

50 deinde cava infodiunt projecta cadavera terra.
51 At simul exanimem, qui nostra ob crimina poenas
52 pendebat, videre, manum abstinuere nec ultra
53 sunt passi saevire in cassum lumine corpus ;
54 mirati properos obitus collapsaque membra
55 tam cito et ora modis jam tum pallentia miris.
56 Quidam etiam vidisse ferunt pendere per auras
57 caelivagos juvenes feralia robora circum
58 plaudentes alis niveaque in veste coruscis
59 divinum multo stillantem e vulnere rorem
60 suscipere et superas pateris perferre sub auras.
61 Hic ausus solus lato cui lancea ferro
62 longinus sanctos violare ignobilis artus ;
63 irruit et longa transverberat abiecte costas.
64 Intepuit ferrum ; sanctum ebibit hasta cruorem.
65 Vulnere quo perhibent bicoloris fluminis instar
66 et purum laticem et rorem exsiliisse rubentem.
67 Diluta est humus ; erubuerunt gramina circum.
68 Huc sese in medios Arimathes urbis alumnus
69 infert conscenditque trabem atque exsanguem magistri
70 detrahit et densis procul aufert corpus ab armis
71 veste tegens modo quam tales mercatus in usus.
72 Huc volucres pueri caelique effusa Juventus
73 fert pedem ; aeterni largum date veris honorem.
74 Pallentem violam calathis diffundite plenis
75 narcissisque comas ac maerentes hyacinthos
76 et florum nimbo divinum involvite corpus.
77 Ecce autem late reboant plangore propinqui
78 femineo montes ; responsant flebile saltus.
79 Omnia flere putes sola lamentabile letum.
80 Ipsa sedet vivo genitrix maestissima saxo,
81 aegro corde, comis passis totoque cruentum
82 heu ! Natum complexa sinu, miserabile corpus,
83 atque oculos fovet ore patensque in pectore vulnus.
84 Nec jam ullos gemitus, nec jam ullos amplius edit
85 singultus, magno sed enim exanimata dolore
86 frigida muta silet gelidoque simillima saxo.
87 Circumstant aliae tunsae omnes pectora palmis.
88 Pars calidis corpusque lavant et vulnera lymphis ;
89 textilibus membra involvunt pars squalida donis.
90 Haec siccat fuso rorantia genua capillo
91 vulneribus super accumbens haerensque cruentis ;
92 Oscula dat manibus pedibusque rigentibus illa.
93 Indulgent omnes lacrimis tristisque ululatu
94 cuncta replent. Vix inde viri divellere possunt,
95 ipsi etiam guttis humentes grandibus ora.
96 Tum corpus miseris solati exsanguem sepulcro
97 condunt marmoreo atque affati extrema recedunt
98 et magnam comites genitricem in tecta reportant.
99 At Solyms penitus nondum omnis cura reliquit
100 sollicitos, sed adhuc timor acer corda premebat.
101 Saepe etenim audierant sociis maerentibus hostem
102 sese olim superas rediturum lucis ad auras
103 promississe palamque sacros id prodere vates.
104 Id veriti armatos subito misere viros qui
105 noctes atque dies servarent flebile bustum,
106 ne forte auferret furto quis nocte sepultum
107 et totam impleret falsis rumoribus urbem,

108 defunctum vita rediisse ad luminis oras
 109 vitalesque auras haurire atque aethere vesci.
 110 Aura veni afflanti patris omnipotentis ab ore,
 111 aura potens caeli numen superumque voluptas :
 112 quicquid adhuc superat mihi dira e caede dolorum
 113 mente fuga laetosque animi nunc reffice sensus
 114 et placidos per membra riga mihi numine motus.
 115 Sit fas laetitiae sentire in pectore lapsus,
 116 laetitiae, qua gens fruitur felicitis Olympi,
 117 larga ubi latifluo passim torrente redundant
 118 gaudia nec fines novit diffusa voluptas.
 119 Vertitur hic rerum facies ; hic gaudia nostra
 120 incipiunt. Longe in melius versa omnia cerno.
 121 Jam Deus, ut sacros vates et sancta piorum
 122 concilia educens tenebris inferret Olympo,
 123 corporeis liber vinclis concesserat imos
 124 spiritus ad manes, animarum regna silentum,
 125 per caecos aditus et praecipites anfractus,
 126 solis inaccessos radiis, loca nocte perenni
 127 obsita, terrificam caecae formidinis aulam.
 128 Hic stabulant vivisque tenent impervia regna
 129 noctivagi fratres, superi quos ira parentis
 130 caelo immane nefas animis excussit adortos
 131 Tartareisque genus miserabile mersit in antris,
 132 quando illos tenuit regnandi tanta cupido.
 133 Nunc miseros poenis manes - miseri magis ipsi -
 134 exercent vinctosque tenent nigrantibus oris.
 135 Interiora habitant barathrum irremeabile clausae
 136 crudeles animae ad superos dum vita manebat.
 137 Nunc merita expendunt vasta fornace sepultae
 138 supplicia undantemque ferunt caligine fumum.
 139 Ignis ibi aeternus, semper nova flamma renascens.
 140 Innocuae circum sedes secretaque longe
 141 atria circuitu longo. Hic incendia nulla,
 142 nulli obsunt penitus flammis ultricibus ignes,
 143 umbrarum sed iners requies penitusque silentis
 144 mundi temperies. Secretae his sedibus aevum
 145 insontes degunt animae, quibus haud sua damno
 146 admissa, at primi scelus exitiale parentis
 147 detinet hic clausas, nostrae nil lucis egentes,
 148 poenarum prorsum expertes, nisi luce carerent
 149 jucunda, qua gens gaudet stellantis Olympi.
 150 Hic patres sanctum genus antiquissima proles,
 151 qui vitam vinclo nullo, non legibus ullis
 152 compositam incultos primi degere per agros
 153 inter oves, patrio tantum se more tenentes,
 154 justitiae memores ultro rectumque colentes.
 155 Hic vatesque pii, qui quondam numine pleni
 156 ventura intrepide magnas cecinere per urbes
 157 quique dedere orbi leges divina reperta
 158 quosque datis olim juvat parere volentes,
 159 matronae atque viri vitaeque in limine rapti.
 160 Omnibus unus amor caelique arrecta cupido.
 161 Et jam promissi memores, tum forte per umbras
 162 saecula recensebant tacitis volventia lustris
 163 ducebantque animis finem adventare malorum.
 164 Atque haec inter se laeti sermone serebant :
 165 "En tandem volvenda dies, en imminet illa,

166 cum lucem liceat supera et convexa tueri.
 167 Hanc claro pater omnipotens manifestus Olympo
 168 ostendit nobis divino numine plenis.
 169 Nos aliis subito mortalibus ore canentes
 170 optandam votis venienti liquimus aevo.
 171 Jamjam aderit lux nostra, Dei indubitata propago :
 172 ille erat, ille feri sub imagine saepe leonis
 173 ostensus nobis oculos caligine pressis,
 174 unus pro multis qui sese proderet ultro
 175 morti defensosque daret nos hoste subacto.
 176 Vicit, io ! Tandem leo magni a sanguine Judae
 177 Davidae genus ! O passim gaudete, beati
 178 mortales, gaudete animae jam corpore functae !
 179 Jam vos astra vocant ; nunc, quae tot clauditur anno
 180 janua siderei nobis aperitur Olympi !
 181 Jamque erit, ut nostris promissum vocibus olim
 182 laetitia exsiliant montes collesque resultent,
 183 pampineis vincti formosa cacumina sertis,
 184 quales creber agris aries oviumque minores
 185 subsiliunt foetus mollique in gramine ludunt,
 186 balatus matrum dum per juga longa sequuntur.
 187 Ipsi jam fontes ipsa et vaga flumina passim
 188 melle fluant, niveo passim vaga flumina lacte,
 189 lacte mero, et dulci distillent nectare rupes !"
 190 Talia perstabant memorantes ; cuncta fremebant
 191 intus laetitia ingenti plausuque secundo.
 192 Sicut ubi cives longa obsidione tenentur
 193 urbem intra et vallum portarumque obice tuti,
 194 dum circum sonat atque in muros arietat hostis,
 195 tum si forte acies procul auxiliaribus armis
 196 adventare vident socias e turribus altis,
 197 consurgant animosque alacres spe ad sidera tollant.
 198 Ecce autem foribus succedens maximus ultor
 199 haud cunctatus adest divina luce coruscus !
 200 Porta ingens adversa manet centum aerea vastis
 201 vectibus, aeterni postes. Hanc nulla neque igni
 202 vincere vis valeat neque duri robore ferri.
 203 Constitit hic Deus ac dextra stridentia claustra
 204 impulit, intremuit quo late exterrita tellus
 205 impulsu ; vaga contremuerunt sidera mundi
 206 regiaque umbrosis immugiit atra cavernis.
 207 Ad sonitum horrifico adventu de vallibus imis
 208 lucifugi raptim trepido adsunt agmine fratres,
 209 humana facie crurum tenus, inde dracones.
 210 Tum rudere insuetum dirumque e faucibus ignem
 211 efflare atque domum piceo omnem involvere fumo.
 212 Continuo patuere fores ; procul ecce repente
 213 sponte sua absiliunt convulsi a cardine postes.
 214 Apparet confusa intus domus altaque circum
 215 atria ; rarescunt tenebrae et nox caeca recessit.
 216 Nam Deus haud secus obscuris inspectus in antris,
 217 perstringens oculos divina luce refulget
 218 quam cum gemma ignes splendore imitata corusco
 219 in noctem thalamis lucet regalibus atrasque
 220 exsuperat tenebras, large et loca lumine vestit
 221 purpurea circum perfundens omnia luce.
 222 Ut vero in mediis divum penetralibus hostes
 223 videre et faciem invisam agnovere per umbras,

224 ardentem radiis ac mira luce coruscam ;
 225 protinus aspectu subito terrentur et imas
 226 conjiciunt sese in latebras linguaque remulcent
 227 commissas utero caudas stratique tremendum
 228 nequicquam umbrosis in spelaeis ulularunt,
 229 quales quae celsis habitantes Alpibus Euros
 230 semiferae gentes semper patiuntur et imbres,
 231 Romanas si forte procul fulgentibus armis
 232 ora exsertantes antris videre phalangas,
 233 fumosa extemplo palantes tecta relinquunt
 234 dispersique jugis, si qua altius exit in auras,
 235 rupe sedent longaeque duces mirantur euntes.
 236 At casti circum manes fulgore repente
 237 lustrati passas tendunt ad sidera palmas
 238 laetitiaeque fremunt subita lacrimasque dedere
 239 nec saturare queunt animos oculosque tuendo.
 240 Tum laeto ultorem propius clamore salutant
 241 una omnes : "Ut te, caeli lux clara sereni,
 242 optatum aspicimus, nec nos spes nostra fefellit,
 243 qui revehis mundo primo concessa parenti
 244 munera et humanum genus omne in pristina reddis
 245 ignotasque vias aperis ad sidera caeli !
 246 Venisti ; aetherae facies tua lampadis instar
 247 diffulsit, tandemque oculis lux reddita nostris.
 248 Sed quibus exhaustum aerumnis quantisque procellis
 249 jactatum accipimus ! (Nigras ea fama sub oras
 250 detulit) indigno quis sanctum vulnere corpus
 251 foedavit ? Quaenam hasta tuo intepuisse cruore,
 252 quod ferrum tulit ? An tantum mortalibus ullis
 253 in terris licuit scelus ? O quae clausa remotis
 254 aequora litoribus terrarum cingitis orbem,
 255 quae vos, quae tenuete morae ? Quibus abdita claustris
 256 leto opifex tam crudeli cum vester obiret ?
 257 Vos tum diluvio mortalia cuncta decebat
 258 obruere et terras penitus delere nocentes !
 259 Nosne per haec superi soboles certissima regis
 260 vulnera servamur ? Non, o non praemia tanti,
 261 non tanti ipsa salus erat olim nostra ! Tua ingens
 262 haec pietas. Adeo tibi curae incommoda nostra,
 263 o hominum dulcis requies superumque voluptas ?
 264 Nos Patris aversi nostro irritavimus iras
 265 crimine ; tu diras solvisti sanguine poenas."
 266 Talia per campos jactabant undique inanes.
 267 Tum laeti obscuro pariter se carcere promunt
 268 ultoremque Deum supera ad convexa sequuntur,
 269 sedibus ut placidum degant stellantibus aevum
 270 felices animae. Gens jam defuncta periculis
 271 humanis, secreta operum, secreta laborum !
 272 Primus it ipse hominum generis pater ante nec ora
 273 conscius antiquae noxae audet tollere caelo ;
 274 primores procerum inde alii, non vana futuri
 275 pectora quis nivea velantur tempora vitta.
 276 Ingemuere illi quos ob commissa cremandos
 277 sorbet in abruptum fundoque exercet in imo
 278 Tartarus eructansque incendia dira caminus
 279 unde animis miseris nullo patet exitus aevo.
 280 Praecipue rex ipse aulae illaetabilis alto
 281 cum sociis maerens ducit suspiria corde

282 et fortunatis sedem quam liquerat ipse
 283 invidet aetheream, furiis immanibus actus.
 284 Illi iter ad caeli debentia regna tenebant
 285 aera per tenerum laeti regemque canebant,
 286 felices animae quibus est in saecula vitae
 287 jam nunc parta quies praeclusaque janua leti.
 288 Applaudunt volucres purum tranantibus aerae.
 289 Subsidunt Euri ; fugere ex aethere nimbi
 290 arridetque procul clari liquidissima mundi
 291 tempestas ; caelo arrident rutila astra sereno.
 292 Assurgit matutinis aurora volucrum
 293 cantibus ; assurgit rubefacta vesper ab aethra.
 294 Atque ea dum longe vastum per inane geruntur,
 295 jam lux Eois properabat tertia ab oris
 296 et Pater omnipotens Nato immortalia membra
 297 illustrans penitus divinum afflavit honorem ;
 298 quodque fuit mortale modo et violabile corpus
 299 immortale dedit. Non tanta luce sereno
 300 sidera clara polo, non aureus ipse nitet sol.
 301 Ceu qui per noctem imposito cinere obrutus ignis
 302 delitet et nusquam tecto se lumine prodit,
 303 si quis eum flabris exsuscitet arida circum
 304 nutrimenta serens, subitis ad tecta favillis
 305 emicet et totas lustret splendoribus aedes.
 306 Talis, ubi turpe irrepsit senium, unicus ales,
 307 congescitque sibi ramis felicibus altum
 308 summo in colle rogam posuitque in morte senectam,
 309 continuo novus exoritur nitidusque juvena
 310 effulget cristis et versicoloribus alis.
 311 Innumerae circum volucres mirantur euntem ;
 312 ille suos adit Aethiopas Indosque revisit.
 313 Jamque adeo in terris hominum miranda paventes
 314 terruerant animos visa. Umbris orbe fugatis
 315 sole recens orto, maestissima Magdalene,
 316 amissi desiderio perfixa magistri,
 317 cum sociis ibant prima sub luce ferentes
 318 in gremiis molles patriae felicitis odores
 319 myrrhamque et costum spicaeque unguenta Cilissae,
 320 supremum tumulo munus varioque serebant
 321 multa inter sese tristes sermone per agros :
 322 "Nos miseras, quas non secum lacrimabilis heros
 323 duxerit ad letum ! Vigiles quis fallere nobis
 324 custodes dabit aut quis grandia saxa sepulcro
 325 evolvit clauso ut saltem fungamur inani
 326 munere deserto solventes debita busto ?"
 327 Talia fundentes, tumulum venere sub ipsum,
 328 jactantesque oculos faciles huc plurima et illuc,
 329 milite conspiciunt collem et custode vacare,
 330 claustraque mirantur secum patefacta sepulcri.
 331 Accedunt. At ubi tumulum conspexit inanem
 332 naribus unde ingens fluctus se evolvit odorum,
 333 hoste putans clam sublatum, pulcherrima virgo
 334 flebat inornatum vellensque a vertice crinem
 335 et nemora et montes gemitu silvasque replebat.
 336 Cui juvenis subito effulgens in vestibus albis
 337 aligerum genus et caeli de gente : "Quid, inquit,
 338 quaeritis o matres ? Longo Jam parcite luctu
 339 atque animis maestum tandem revocate timorem.

340 Laetitiam certa jam spe praesumite vestram,
 341 quandoquidem quem vos adeo lugetis ademptum
 342 funestaeque trabi fixum ut scelus omne piaret
 343 vestraque sponte sua deleret crimina morte
 344 unus pro cunctis, Erebi jam rege subacto
 345 manibus ex imis has rursus lucis in oras
 346 victor iit superaque etiam nunc vescitur aura
 347 corporis ablutus quaecumque obnoxia morti."
 348 Haec ait, et nubi volucer se immiscuit atrae.
 349 Ipsa etiam res ecce oculis oblata repente
 350 firmavit dubiumque animum tenebrasque resolvit.
 351 Namque morae impatiens atque acri saucia amore
 352 dum virgo sedet ac miratur inane sepulcrum
 353 artificumque manus, videt ipso in marmore fictum
 354 litus arenosum, porrectum in litore pisces,
 355 fluctivomum, ingentem ; nant aequore qualia in alto
 356 mole nova ignaros nautas terrentia cete.
 357 Monstrum turpe, atrum, spatiosi bellua ponti,
 358 cujus ab undivomo vates imperditus ore
 359 redditus aereas rursus veniebat ad auras.
 360 Tum secum : "Superi nunc, o nunc visa secudent
 361 praesentes. Veterum agnosco non vana futuri
 362 signa, inquit, nempe, ut monstri deformis in atro
 363 tres vates latuit luces, tris gutture noctes
 364 ingluviem passus vastaeque voraginis antrum ;
 365 sic heros multum ad superos defletus amicis
 366 inclususque cavo saxo terraque sepultus
 367 delituit, saepe ut (memini) praedixerat ipse,
 368 ad caelum rediit saxumque reliquit inane."
 369 Talia versanti subito sub imagine falsa
 370 ignoti agricolae sese Deus obtulit ipse
 371 et tumulum juxta astabat. Mox farier orsum
 372 Virgo amens animi agnovit conversaque luce
 373 respicit ecce nova illustrem radiisque coruscum.
 374 Corruit ac genua amplexans, satis ora tueri
 375 clara nequit corpusque oculis obit omne volutis
 376 et maestum aspectu dulci saturavit amorem.
 377 Continuo tristi penitus de pectore maeror
 378 omnis abit rediitque decor suus ilicet ori
 379 marmoreo. Sed adhuc turgentibus humida gemmis
 380 lumina inornatique fluunt per colla capilli.
 381 Sic ubi rore madens pluvio rosa languida honestum
 382 demisit caput atque comam largo imbri gravatam ;
 383 tum si purpureo sol lumine vestiat arva
 384 et redeat madido facies innubila caelo,
 385 protinus attollens sese rursus illa resurgat
 386 puniceique sinus divinum pandat honorem ;
 387 talis erat posito virgo pulcherrima luctu.
 388 Ardet amans ipsum affari regemque Deumque
 389 et coram solitas haurire ac promere voces.
 390 Dum trepidat quae prima haerens exordia sumat,
 391 mortales visus adoptertus nube reliquit.
 392 Fama Palaestinas subito haec impleverat urbes.
 393 Jamque sacerdotes trepidare et quaerere, si qua
 394 multiplici vulgi sermoni occurrere possint
 395 rumoremque astu premere atque extinguere famam.
 396 Custodes busti in primis qui cuncta canebant,
 397 muneribus superant subiguntque haud vera profari,

398 sublatum furto intempesta nocte cadaver.
399 Sed non ulla datur verum exsuperare facultas
400 quoque magis tendunt serpentem sistere famam,
401 amplius hoc volat illa omnemque exsuscitat oram.
402 Sunt etiam qui se ore canant vidisse patentes
403 sponte sua tumulos multosque exisse sepulcris
404 quorum jampridem tellus acceperat ossa.
405 Interea socii, quos in diversa paventes
406 jamdudum terror longe disjecerat omnes,
407 tabescunt maesti. Caelo cecidisse videtur
408 omnibus extinctum aeterna caligine solem
409 et penitus mundo jucundum lumen ademptum.
410 Tandem conveniunt et adhuc loca nota frequentant
411 tectaque, quae vivo sibi quondam rege fuissent
412 dulcia, sed casu nunc desolata recenti.
413 Dux nusquam ; miseris nusquam datur illa tueri
414 ora illosve oculos aspectu luce serena
415 jucundos magis aut caelo radiantibus astris,
416 et cunctis nomen dulce obversatur ad aures,
417 aegrescunt maesti ; squalent circum omnia luctu.
418 Haud secus atque olim exemit cum subere pastor
419 cerea dona cavo vacuumque alveare reliquit :
420 tunc etiam, fumus quas longe dispulit ater,
421 hinc illinc glomerantur apes et inania frustra
422 tecta adeunt denso volitantes agmine circum,
423 direptosque favos aegrae populataque passim
424 mella vident, nequicquam hiemi congesta futurae.
425 Ecce viros autem tali maerore sepultos
426 attonitae miris matres rumoribus implent :
427 vidisse aligeros caeli de gente ministros ;
428 regem ipsum vidisse novo fulgore micantem,
429 et vacuum porro tumulum vestesque relictas.
430 Protinus ergo alii montis petere ardua cursu
431 contendunt rapido festini, ubi inane sepulcrum.
432 Ast aliis incredibile ac mirabile visum,
433 et primo ancipites delusos credere matrum
434 effigie pavitantum oculos et imagine falsa,
435 ut nobis saepe in somnis spectare videmur
436 absentum vultus simulacraque luce carentum,
437 donec sera illis sub luce in tecta coactis
438 ingrediens sese ostendit manifestius heros
439 voce habituque deum confessus, imagine nota,
440 divinum toto jaciens de corpore lumen.
441 Hinc Thomas aberat Didymus, vicina pererrans
442 oppida, quo metus impulerat duce nuper adempto.
443 Isque ubi dein rediens est sacrae redditus urbi
444 acceptusque domo, socios videt ecce recenti
445 attonitos casu ac caeco terrore silentes,
446 quales aut templum domini aut ubi divitis aedes
447 marmoreas petiit ruptis de nubibus ignis
448 terrificisque locum implevit splendoribus omnem,
449 stant intus pavidi cives ; quatit omnibus horror
450 pectora ; vix longo post tempore corda residunt.
451 Obstupuit visu ignarus causamque requirit
452 et socios dictis Didymus demulcet amicis,
453 quem senior Petrus amplexus lacrimisque profusis
454 menti canitiem humectans sic denique fatur :
455 "Vidimus, o jam nos felices ! Vidimus ipsum,

456 ut soliti, regem spirantem aurasque trahentem
457 caelicolum regem, qui nos modo morte reliquit !"
458 Haec ait exsultansque animo caelum usque tuetur.
459 Ille autem (neque enim narranti talia credit)
460 "Ipsene rursus, ait, caeli hoc spirabile lumen
461 aspicit ? An potius simulacri apparuit umbra
462 atque oculos fallax vestros elusit imago ?"
463 "Immo, ait, illum ipsum divino illa ipsa gerentem
464 vulnera et antiquam servantem corpore formam
465 vidimus ac veros manibus tractavimus artus.
466 Vidi oculis, vidi ipse meis et vulnera novi !
467 Vesper erat clausaeque fores clausaeque fenestrae.
468 Nos intus pavidi latitare et corpora victu
469 curare ac positis maesti discumbere mensis.
470 Ecce autem tecti in mediis penetralibus ipse
471 improvisus adest et inobservabilis heros
472 effulget, clausis ingressus limina portis ;
473 improvisus adest inopinaque gaudia portat.
474 Continuo ad lucem visum tectum omne cremari.
475 Nos trepidare animis subitoque horrescere visu
476 attoniti. Verum ille metus vanumque timorem
477 increpitans, vetuit trepidos exsurgere mensis.
478 "Ipse ego sum ; pacem unanimes agitate metusque
479 solvite," tentandosque dabat simul omnibus artus,
480 vulneraque, insigni quae corpore quina gerebat.
481 Quin etiam parcis nobiscum accumbere mensis,
482 non fugiens, solito est coram de more locutus,
483 ceu mortalis adhuc quae verba novissima nuper
484 ad mortem properans nobis memoranda reliquit.
485 Tum demum liquidis abiens se immiscuit auris."
486 Haec senior sociique eadem simul ore canebant.
487 Necdum finis erat verbis, cum protinus ecce
488 cum clamore ruit Cleophas, fidissimus unus
489 e multis quos bis senis subjunxerat heros,
490 atque haec dicta dabat : "Vos, o jam solvite luctu !
491 Vivit adhuc, socii, leti jam lege solutus,
492 vivit adhuc : vidi his oculis, vidi ipse, Deique
493 auribus his hausi vocem consuetaque verba.
494 Audiit hic etiam mecum viditque loquentem"
495 (atque manu nutuque propinquum Amaona signat)
496 "Nam modo forte animis maesti dum incedimus ambo,
497 qua se demissi incipiunt subducere montes,
498 extulit aereas Emaus ubi turribus arces,
499 advena in ignota nobiscum veste profectus,
500 externosque gerens habitus comes additur ultro.
501 Taedia dumque viae vario sermone levaret,
502 interdum eruptis roramus fletibus ora,
503 et gemitus imis dolor exprimit ossibus ardens,
504 ille aegros dictis solari et quaerere causas
505 crebra resurgentis luctus. Nos ordine cuncta
506 pandimus atque ducis letum crudele profamur,
507 quo moriente simul perierunt gaudia nostra,
508 ut factis verbisque animos spe arrexit ingens
509 ingenti, sed dehinc nos morte fefellerit omnes.
510 Non tulit ulterius contraque haec reddidit ille :
511 "Non pudet, o semper caecos et lucis egentes ?
512 Nonne ducis vestri quondam crudelia vates
513 funera praedixere omnes casusque nefandos

514 tot veterum monimenta docent, haud credita vobis ?
 515 Sponte sua leto caput obvius obtulit ipse,
 516 unus pro multis, patrias quo flecteret iras,
 517 atque iter ipse suo signaret ad astra cruore.
 518 Haud ita vos ille erudiit. Nam saepe futura
 519 haec eadem de se longe ante retexit amicis.
 520 Atque equidem memini, nuper media urbe canebat,
 521 obscura sed verborum rem ambage tegebat.
 522 Nunc autem manifesta patent, nunc omnia aperta,
 523 nube palam ablata, nec spes fovistis inanes.
 524 En rex, qui positas conseverat ordine vites,
 525 praetendens saepem insidiis hominumque ferarumque,
 526 omnibus immissis incassum ex urbe ministris,
 527 quos leto dedit insontes manus effera agrestum.
 528 Demum infelices natum ipsum misit in agros.
 529 Nam Pater omnipotens, post tot fera funera vatum,
 530 ipse suum jussit natum descendere Olympo.
 531 Ecce Palaestini, furiis immanibus acti,
 532 natum etiam hauserunt crudeli funere herilem.
 533 Haud impune tamen : rex urbe ultricibus armis
 534 jamjam aderit, flammisque feros agitabit agrestes,
 535 et pangenda aliis credet vineta colonis."
 536 Sic fatus, coepit voces ex ordine vatum
 537 obscuras veterumque evolvere facta parentum,
 538 cuncta docens letum Christo crudele minari,
 539 quo mortale genus tenebris educeret atris.
 540 Ut clara antiquis portendi haec omnia signis
 541 monstrabat ratione, oculis caligine abacta !
 542 Ut nostros mira inflexit dulcedine sensus !
 543 Ut resoluta novo ardebant praecordia amore !
 544 Qualiter aut aeris rigor acri solvitur aestu,
 545 aut glacies concreta novo sub sole liquescit.
 546 Non illum tamen immemores agnovimus ante
 547 quam ventum ad sedem parvamque subivimus urbem
 548 namque iter ulterius fingentem seque ferentem
 549 longe alias sedes petere, ambo oravimus, isdem
 550 nobiscum haud asper tectis succederet hospes.
 551 Id quoque praecipiti suadebat vesper Olympo,
 552 jam piceo terras infuscans noctis amictu.
 553 Paruit et mensas comitum est dignatus egenas.
 554 Ut primum fruges tostas cerealia liba
 555 attigit et solito fregit de more, repente
 556 nox abiit, tandemque oculis lux addita nostris.
 557 Agnosco, et supplex manifestum numen adoro.
 558 Sed subito volucres abiens ceu fumus in auras
 559 respuit humanos visus sensusque refugit."
 560 Talia narrabat Cleophas, quae, credita cunctis,
 561 vera negat Thomas et coeptis perstat in isdem.
 562 "Haec mihi (dicam iterum) nemo persuaserit umquam,
 563 illum ipsum his oculis clara nisi luce videndum
 564 hausero et his manibus nisi vulnera contrectaro."
 565 Sic fatur. Simul ecce Deus cum lumine largo
 566 improvisus adest iterum sociosque revisit.
 567 Et clausae mansere fores, mansere fenestrae.
 568 Non aliter vitri, quod tectis summovet auras,
 569 lumine sol penetrat splendentes aureus orbis,
 570 insertim radios jaciens in opaca domorum,
 571 nec tamen ulla viae apparent vestigia adacta

572 luce, sed illaeso saepe itque reditque metallo.
573 Sternunt sese omnes terrae genibusque salutant.
574 Ut vero Didymus manifesto in lumine vidit
575 vulnera monstrantem et se nomine compellantem,
576 horruit et prono confestim corruit ore
577 multaue se incusans animo sic denique fatur :
578 "Vera mihi facies, verus Deus, omnia novi.
579 Haud equidem, fateor, vivum te credere quibam
580 post obitus caeli hoc iterum spirabile lumen,
581 has auras haurire. Animo tua dicta labanti
582 exciderant penitus, modo quae suprema dedisti.
583 Demens, qui te obita non posse huc morte reverti
584 crediderim, cum quarta alios jam luce sepultos
585 ad superas caeli nuper revocaveris oras,
586 et memini atque aderam. Sed me mens laeva tenebat.
587 Forsan at haec tamen haud vestro sine numine tanta
588 (credo equidem) venit dementia. Forsitan olim
589 proderit hic seris haesisse nepotibus unum,
590 et manibus voluisse prius contingere corpus,
591 ne facies aut vana oculos eluderet umbra."
592 Talibus orantem deus et lux ipsa reliquit
593 nunc hos, nunc adiens alios et pectora firmans.
594 Nec prius evasit mundi mortalibus oris
595 quam quater exoriens dena sol luce rediret.
596 Forte igitur Petrus et socii vada salsa secabant
597 remigiis lembum subigentes, dum sibi victum
598 arte parant solita piscesque in gurgite captant.
599 Et jam per totam vano quam longa labore
600 defessi noctem frustra madefacta legebant
601 retia, cum juvenem egregium videre liquentis
602 fluctifrago tractus e litore prospectantem.
603 Nec primo agnovere Deum divinaque membra,
604 quandoquidem se mortali celaverat ore.
605 Ipse dehinc tali compellans voce natantes :
606 "Dextram, ait, "affectate, viri. Huc appellite puppim.
607 Hac dabitur vanum non effudisse laborem."
608 Nec mora, praeceptis parent dextraque per undas
609 detorquent alacres cursum nodosaque lina
610 projiciunt ; moti sonuit plaga caerulea ponti.
611 Jamque senex tacito sociis Petrus innuit ore
612 auxilioque vocat nutuque manuque silentes,
613 significans praedam innumeram. Vix retia cuncti
614 plena trahunt ; capti saliunt per vincula pisces.
615 Sensit Joannes hic numen et : "Heus, prior inquit,
616 o socii, non fallor, adest Deus, ille magister,
617 Ille quidem ! Agnosco divinos oris honores.
618 Laetitiam ut jactat vultuque oculisque decoris !"
619 Quod simul accepit Petrus, haud cunctatus, ab ipsa
620 desiliit rate et aequoreas se jecit in undas,
621 quo regem salsos per fluctus primus adiret,
622 quamvis multa timens gliscentibus aequore ventis.
623 Cetera deinde manus terrae advertuntur, et omnes
624 remivaga siccum cupidi tenuere carina.
625 Tum victu ut vires revocent, cerealia mensis
626 dona onerant jussi, vivosque in litore pisces
627 una omnes torrere parant, succensaque pruna
628 suggeritur circum. Taeter petit aethera nidor.
629 Ut compressa fames, surgit rex optimus ipse,

630 confessusque Deum, sociis ita denique fatur :
631 "Pacem optate, viri ; pacem laudate quieti.
632 Salvete aeternum, socii, aeternumque valete.
633 Este mei memores : ego claro poscor Olympo.
634 Jamque adeo duris animos aptate ferendo
635 omnia, nec propius saevos adiiisse tyrannos
636 sit timor atque duces affari et vera monere.
637 Non vos majestas soliorum aut sceptrum superba
638 terrificent regum, lucis nil hujus egentes.
639 Haud longe tum quaerendum, quae tempora fandi,
640 quis modus aptus. Ego praesens adero omnibus, ora
641 vestra regens. Dabitur verborum copia cuique,
642 nec caelo vires vos et solamen ab alto
643 deficient. Cum sol decimo jubar aureus ortu
644 extulerit, Pater afflabit caelestibus auris,
645 diffusumque animis numen divinitus addet,
646 praeside quo freti, reges rerumque potentes
647 nil veriti, nostrum vulgabitur undique nomen.
648 Tum sanctum sese genus aurea tollet ad astra,
649 densus agens veluti laxis se palmas habentis
650 luxuriat, foliisque simul fetuque gravescit.
651 Denique, cum suprema dies illuxerit orbi,
652 omniaque eliciam patefactis ossa sepulcris,
653 atque iterum in lucem emergent, quos terra tegebat,
654 hanc vallem, densa hos implebunt agmina colles,
655 matres atque viri, vixque hausta luce perempti.
656 Ipse ego jura dabo mediaque in valle sedebo
657 quaesitor, vitas populorum et crimina pendens.
658 Vos etiam mecum, bis senis sedibus ipsi
659 sublimes, mortale genus censebitis una ;
660 bis senaeque tribus gentis tum vestra subibunt
661 arbitria, et vestros mirabitur orbis honores.
662 Interea, Petre, te (nulli pietate secundum
663 novi etenim) his rerum summam clavumque tenentem
664 praeficimus cunctis, ultro qui nostra secuti
665 imperia, hoc te praecipuo insignimus honore.
666 Tu regere et populis parcens dare jura memento.
667 Summa tibi in gentes jam nunc concessa potestas.
668 Jamque pios tege pace ; voca sub signa rebelles.
669 Quemcumque in terris scelus exitiale perosus
670 admonitum frustra justa devoveris ira,
671 colloquio absterrens hominum coetuque piorum,
672 idem erit invisus caelo. Non ille beatis
673 sedibus aspiret, nisi tu placabilis idem
674 dignatus venia meliorem in pristina reddas.
675 Jamque adeo tibi concessum mortalibus aegris
676 claudere siderei portas ac pandere caeli."
677 Talia mandabat, terras hominesque relinquens.
678 Sic natis moriturus oves et ovilia pastor
679 commendans caris, furta insidiasque luporum
680 edocet et pecori contraria pascua monstrat.
681 Sic sociis aevo jam fessus nauta biremem
682 credit inexpertosque docet varias maris oras
683 et brevia et Syrtes et navifragas Sirenas.
684 His animadversis totius lucida circum
685 palmiferi nubes collis capita ardua textit,
686 et curva aethereis fulserunt litora flammis.
687 Interea totum exercent nova gaudia caelum,

688 alituum caelestum acies sanctique volucres
689 dant manibus plausus et multicoloribus alis,
690 instaurantque choros ; fremitu aetheris atria fervent.
691 Pars pendent speculis et propugnacula laeti
692 caeli summa tenent et moenia celsa coronant.
693 Obvia pars portis parat ire patentibus, et se
694 quisque auris credunt ac pennis aethera obumbrant.
695 Hi plectro indulgent fidibusque ; his tibia cantus
696 dat bifores ; alii cava cornua flatibus implent,
697 raucisonasque tubas et ahenea cymbala jactant.
698 Atque ubi ter Patris ad solium pernixe chorea
699 indulgere choris, ter ludo lucida regna
700 lustravere polique e vertice decurrere.
701 Non aliter sunt ingressi volucris agmine contra,
702 concentu vario et multisono modulatu,
703 quam, prolapsa Remi cum nondum urbs alta jaceret,
704 Tarpeiaequae arces starent, lateque subactis
705 jura daret populis rerum pulcherrima Roma,
706 consul victor, ovans pugnatis undique bellis,
707 intrabat rediens Capitoliaeque alta subibat.
708 Talis nubivago tendebat ad aethera gressu
709 vera Dei soboles. Ut vero flectere quiret,
710 iratus quoties Genitor mortale pararet
711 exercere genus meritis ob crimina poenis,
712 omnia fert secum caedis monumenta nefandae,
713 in primis duplicemque trabem infandamque columnam,
714 brachia cui vinctus tulit aspera verbera, et acres
715 virgarum fasces infectaque sanguine lora
716 hastamque et calamo pendentia pocula levi.
717 Tres deinde ingentes et acuta cuspidate vectes
718 cernere erat, quibus effossus palmasque pedesque,
719 sartaque nexilibus vepribus conserta rigebant.
720 Illic et longo Romani signa senatus
721 hastili suspensa cavoque latentia cornu
722 lumina, quod superas abies tollebat ad auras,
723 quamque manu rex pro sceptro gestavit arundo,
724 omnia quae pueri caelestes ante gerebant,
725 singula quisque, polique arcem per inane petebant.
726 Suspexere viri attoniti acieque sequentes
727 alituum nubem ac regem videre per auras
728 tollentemque manus caelique serena secantem,
729 cum subito rutila haec venit vox reddita ab aethra :
730 "Ne trepidate. Quid haeretis supera alta tuentes ?
731 Cum genitore Deus regnandum accepit Olympum."
732 Nec mora, carminibus caeli domus ardua longe
733 auditur resonare modisque per astra canoris.
734 Contra etiam plausere atque haec alterna canebant
735 laeta viri, caelumque oculis animisque petebant :
736 "Omnes o plausu gentes linguisque favete
737 atque Deum canite ascensu supera alta tenentem !
738 Quadrupedum volucrumque genus mutaeque natantes
739 exsultent, tractus terrarum ubicumque patentem !
740 Ipsi dent montes, ipsa et dent flumina vocem
741 laeta suam et scatebris volventes flumina fontes,
742 quodque ambit longis terras anfractibus aequor.
743 Cuncta suum agnoscant auctorem et carmina dicant,
744 semper ut idem ingens regnarit, originis expers,
745 cum genitore Deo Deus, omnia numine complens.

746 Ut nullis mox principiis aut semine nullo
747 omnia condiderit, caelum terrasque fretumque
748 quaeque vago passim subsunt animantia caelo.
749 Ut terras ponto discluserit, aethera terris,
750 luciferis caeli lustraverit atria flammis,
751 tellurisque sinum variis appinxerit herbis,
752 sufficiatque satis fruges et vitibus alnum
753 humorem. Tu cuncta moves, tibi maximus aether,
754 quique super latices concrescunt aethere, parent.
755 Nubila te ventique timent ; te vesper et ortus
756 observant obeuntque tuo sua munera nutu,
757 et tibi monstriferi obsequitur plaga caerula ponti.
758 Tu manibus validis terrarum pondera libras,
759 atque gravem vacuo suspendis in aere molem,
760 rerum elementa locans aeterno foedere, ut omnia
761 concordi in medium tendant nitentia motu.
762 Tu liquidas per inane vias is nubibus actus,
763 aurarumque sedens veheris pernicibus alis,
764 non tibi tempus equis fugit irrevocabile adactis ;
765 semper idem ante tuos oculos praesensque moratur,
766 quodque est quodque fuit, simul et quod deinde sequetur.
767 Ipse etiam parens tibi caeli in vertice fixus
768 sol stetit. Ipsa etiam surgens in cornua luna
769 atque suos penitus requierunt sidera cursus.
770 Te mandante suam vim saepe innoxius ignis
771 dedidicit ; pueri in mediis fornacibus astant
772 illaesi, jactantque tuas ad sidera laudes.
773 Tu mare navigerum concreta dividis unda
774 et populis medios das ire impune per aestus.
775 Tu rapidos flectis, ripis mirantibus, amnes.
776 Tu largam tactis e cautibus elicis undam,
777 idem largifluos fontes et flumina sistens.
778 Ipsa tuo tremit aspectu conterrita tellus,
779 quosque procul tangis fumant ad sidera montes.
780 Assurgunt reges pavidi, tibi sceptrum, tibi arma
781 deponunt longaque tremunt et numen adorant.
782 Tu surdis aures, oculos tu lumine captis,
783 et vocem mutis et vires sufficis aegris.
784 Tu revocas in vitam obita jam morte sepultos
785 et rursus potes amissos accendere sensus.
786 Non te vis crudi perterritum horrida leti ;
787 non Erebi confusa domus, loca foeta timoris.
788 Te manes tremuere. Plagae regnator opacae
789 umbrarum passim populantem immitia regna
790 non tulit atque imis trepidus se condidit antris,
791 prostrataeque metu procul Eumenides latitarunt,
792 dum superas praeda ingenti vehereris ad arces,
793 nunc ubi jam victor regnas superumque beato
794 concilio imperitas, provisaeque tempora longe
795 disponens, reparas fugientia saecula mundo,
796 nec requiesse sinis solis volventia lustra.
797 Salve opifex rerum vastique salutifer orbis !
798 Aspice nos propius, propius genus aspice nostrum !
799 Morte tua patet aetheri cui janua Olympi,
800 et veteres tandem Pater obliviscitur iras."
801 Talia litorea laeti sub rupe canebant
802 undeni proceres omnisque effusa juvenus.
803 Non ramen exuerant vanum inter tanta timorem

804 gaudia, nondum animos firmati numinis aura
805 aetherea, sed adhuc latebras cavaque antra petebant,
806 sicut ubi accipiter celsa de sede columbam
807 sustulit apprensam, quam rostro evisceret unco,
808 diffugiunt aliae huc illuc ; mox turribus imis
809 condunt se celeres et inania murmura miscent.
810 Haud illi secus attoniti post funera regis
811 inclusi tecto stabant, promissa magistri
812 caelo exspectantes, venturum numen ab alto.
813 Jamque aderat promissa dies, deciesque tenebras
814 flammifera sol exoriens face ab orbe fugarat,
815 cum Pater omnipotens caeli regione serena,
816 sidera purpureo reficit qua purior aether
817 lumine, caelicolum in medio media arce sederet,
818 tempora dispensans secretaque foedera mundo.
819 Cui se tum exutus moribundos filius artus,
820 diffulgens radiis ac mira luce coruscus,
821 obtulit et magno Genitorem affatus amore est :
822 "O pater et sociis tandem succurrere nostris
823 tempus, ait, quos amisso duce protinus omnes
824 acer agit timor huc illuc atque omnia terrent
825 imbelles, quoniam mortali corpore creti.
826 Discute terrorem hunc animis et pectora firma,
827 ne casus nequeant alacres procurrere in omnes.
828 Illis, me propter, Solyme Judaeaque passim
829 insidias infensa odiis molitur iniquis ;
830 tu tamen hos olim fore, qui praestantibus ausis
831 per gentes canerent nostrum indelebile nomen,
832 quacumque Oceano terrarum clauditur orbis,
833 et populos nova conversos ad sacra vocarent,
834 pollicitus, Genitor, tibi nec sententia nutat.
835 Hos (quando caeli demum non abnuis arcem)
836 ipse ego saepe tua fretus pietate labantes
837 firmavi implevique animis, siquidem affore Olympi
838 promisi auxilium subito et tutamen ab arce,
839 quo freti reges regumque minacia jussa
840 contemnant alacresque ruant in funera laeti
841 sponte sua. Verae pro religionis amore."
842 Sic fatus, palmas ferro ostentabat acuto
843 trajectosque pedes et hians in pectore vulnus
844 sartaque et hamatos vepres quos hostia gessit.
845 Annuit oranti, delibansque oscula Nato
846 reddidit haec Pater aeterno devinctus amore :
847 "Jam concessa petis. Dabitur tibi, Nate, quod optas.
848 Promissa (ne tende manus) afflabimus aura
849 quos vis, atque viros nostro flammabimus igni,
850 ut pro te, blandae projecto lucis amore,
851 non ferrum aut flammam metuant morsusve ferarum
852 aut crinita rotis circum laniantibus haustra.
853 Quique reformidant nunc omnes aeris auras,
854 objicient certis alacres se sponte periculis
855 pugnando et claras animas de corpore reddent
856 contemptu necis et vera virtute superbi.
857 Non illos aestus, non illos frigora sistent,
858 letiferum aut campos cum sidus findit hiulcos,
859 caerulea aut glacie cum nectit flumina bruma.
860 Verum ultra Gangem auditi, Bactra ultima supra,
861 Ismara Bistoniasque plagas Seresque remotos

862 Gadibus et virides penetrabunt voce Britannos.
 863 Implebunt terras monitis et cuncta novantes
 864 templa, pererrato statuent tibi maxima mundo ;
 865 ad tua mutatae properabunt nomina gentes,
 866 divisae penitus toto orbe per aequora gentes,
 867 saeclaue conversis procedent aurea rebus.
 868 Quae tibi saepe ego pollicitus, scisque omnia mecum.
 869 Nec tantum tua, nate, piis haec vulnera Olympum
 870 nunc pandi meruere, nigra quos nocte premebat
 871 insontes primi scelus exitiale parentis,
 872 verum alios mox atque alios per saecula caelo
 873 efficient dignos, sua quos commissa piacla
 874 sidereis procul arcebant a sedibus olim :
 875 tanta tuae merces, ea vis, ea gratia mortis.
 876 Atque adeo, quodcumque homines ab origine rerum
 877 admisere, aliis quidquid peccabitur annis,
 878 huc coeat ; satis illa tui pars parva superque
 879 omnia diluere prorsusque abolere cruoris.
 880 Quinetiam mox tempus erit, cum scilicet olim
 881 ter centum prope lustra peregerit aethereus sol,
 882 tum veri, Graium obliti mendacia, vates
 883 funera per gentes referent tua carmine verso ;
 884 atque tuis omnes resonabunt laudibus urbes,
 885 praesertim laetam Italiae felicis ad oram,
 886 Addua ubi vagus et muscoso Serius amne,
 887 purior electro tortoque simillimus angui,
 888 qua rex fluviorum, Eridanus, se turbidus infert,
 889 moenia turrigerae stringens male tuta Cremonae,
 890 ut sibi jam tectis vix temperet unda caducis.
 891 Illic tum, nivei velut inter nubila cygni,
 892 omnibus in ripis pueri innuptaeque puellae
 893 carmina casta canent mixtique in gramine molli
 894 laudibus incipient certatim assuescere nostris,
 895 et teneri prima coetus te voce sonabunt.
 896 Haec tibi certa manent, haec vis movet ordine nulla."
 897 Sic fatus, dulcem Nato inspiravit amorem.
 898 Interea scelus infandum pellacis Iudae
 899 multa exsecrantes, socii se ad jussa parabant
 900 munera, diversas sortiti protinus oras
 901 quas peterent moresque novos, nova sacra docerent.
 902 Quove autem patribus bis senis cetera, ut ante,
 903 pareret pubes, numerum sanctumque senatum
 904 quod superest supplent, sociisque ex omnibus unus
 905 sortitu gaudes tanto praelatus honore,
 906 Matthia, obscurum genus et sine luce propago.
 907 Tum cuncti inter se maestis sic ore precari :
 908 "Si nunc, si nobis aurai caelitus almae
 909 halitus omnipotens patefacto aspiret Olympo,
 910 quandoquidem toties nobis Deus omnibus illum
 911 auxilio fore pollicitus ! Sane omnia vera
 912 praedixit ; defit veris hoc hactenus unum."
 913 Talia suspensi secum aegra mente serebant.
 914 Ecce autem caeli ruere ardua visa repente,
 915 et superum tonat ingenti domus alta fragore.
 916 Suspiciunt : nova lux oculis diffulsit, et ingens
 917 visus ab aethereo descendere vertice nimbus
 918 lucis inardescens maculis, tectumque per omne
 919 diversi rumpunt radii. Tum innoxius ignis

920 omnibus extemplo supra caput astitit ingens
921 et circum rutilis incanduit aura favillis,
922 stricturis veluti crebrae crepitantibus olim
923 dissiliunt scintillae, acres dum incudibus ictus
924 alternant chalybes, robustaque brachia tollunt
925 candentem curva versantes forcipe massam.
926 Nam Pater omnipotens superaue aequaevus ab arce
927 Filius aspirant una omnipotentibus auris
928 infunduntque viris numen. "Deus ecce repente,
929 ecce Deus !" Cunctis divinitus algida corda
930 incipiunt afflata calescere. Numine tacti
931 implentur propiore viri, sacrumque furorem
932 concepere, Deumque imis hausere medullis.
933 Nec mora, nec requies. Ter scintillantibus ignes
934 terrifico radiis fulgore, ter alitis aurae
935 turbine correpti, blando flammantur amore,
936 ignescuntque animis atque exsultantia cunctis
937 exercent acres stimulis praecordia motus.
938 Diffugiunt animis terrores. Mira loquuntur,
939 mira canunt. Eadem variis, mirabile dictu !
940 Gentibus accipitur vox haud obscura, sibique
941 quisque videbatur patrias haurire loquelas,
942 multi ut tunc ierant variis huc partibus orbis
943 sacrorum studio visendaeque urbis amore,
944 solemnem quae luce illa celebrabat honorem,
945 quinquaginta actis post orgia prima diebus,
946 orgia cum mensis epulandum apponimus agnum.
947 Hic sua verba audit tellure Libystide cretus,
948 hic Galli sua, Romulidae Parthique Scythaeque,
949 necnon subjecti glaciali sidere Thraces,
950 Afrique Cretesque Phrygumque e gente profecti,
951 atque Indi, atque Arabes et arenivagi Garamantes :
952 mirantur cuncti circum, mirantur et ipsi.
953 Namque hominem velut exuti moribundaque membra,
954 mente domos caeli peragrant arque aethera apertum
955 intenti et superum taciti sermone fruuntur,
956 Jamque canunt ventura. Animis deus expulit atram
957 lustrans corda intus nubem, quae corpora circum
958 caligatque heberatque humanas humida mentes,
959 quosque modo durae mortis formidine turpi
960 speluncis atris terrebant omnia clausos,
961 liberius nunc luce palam atque licentius audent,
962 terrorum expertes. Nec jam mortalia curant.
963 Non ferrum aut flammam metuunt morsusve ferarum,
964 sed regem vulgo testantur, morte peremptum
965 immerita, genus aethereo deducere Olympo.
966 Jamque pudet metuisse omnes, animosaque leti
967 spes magis atque magis viget acris numinis haustu.
968 Haud secus ac crebris cum rimis terra dehiscit,
969 cum sitit omnis ager, tum quae morientia languent
970 gramina, caeruleus si caelo venerit imber,
971 continuo attollant rursus capita, arvaeque ponant
972 squalorem, redeatque decor suos omnibus agris.
973 Ergo abeunt varias longe lateque per oras
974 diversi, laudesque canunt atque incluta vulgo
975 facta ducis : jamque, ut vates cecinere futurum
976 antiqui, illorum vox fines exit in omnes.
977 Audiit et si quem medio ardens aethere iniquo

978 sidere desertis plaga dividit in via terris,
979 quique orbem extremo circumsonat aequore pontus.
980 Continuo ponunt leges moremque sacrorum
981 urbibus ; infectum genti lustralibus undis
982 eluitur scelus et veteris contagia culpae,
983 religioque novas nova passim exsuscitat aras.
984 Protinus hinc populos Christi de nomine dicunt
985 Christiadas. Toto surgit gens aurea mundo,
986 saeculorumque oritur longe pulcherrimus ordo.
